

مسرحية

تأشيرة هجرة إلى الوطن

بقلم
خالد أبو الذهب



حقوق الطبع محفوظة

مكتبة جزيرة الورد
اسم الكتاب : مسرحية تأشيرة هجرة إلى
الوطن
المؤلف : خالد أبو الذهب
رقم الإيداع :
الترقيم الدولي:

الطبعة الأولى 2016



مكتبة جزيرة الورد

القاهرة : ٤ ميدان جليم خلف بنك فيصل

ش ٢٦ يوليو من ميدان الأوبرا ت : ٠١٠٠٠٠٤٠٤٦ - ٢٧٨٧٧٥٧٤

كلمة المسرحية

إنّها

ليست

نذيرَ شؤمٍ

إنّما

هي

«إنذار بالخطر»

خالد

الشخصيات

(حسب الظهور على خشبة المسرح)

- 1 - امرأة (1) (العقد الثالث)
- 2 - رجل (1) (العقد الثالث)
- 3 - رضا (عامل القهوخانة - العقد الثالث)
- 4 - علي (زبون القهوخانة وصديق حمدي وحازم - طاعن في السن)
- 5 - أيمن (زبون القهوخانة)
- 6 - الدكتور حازم (صديق حمدي وخطيب شقيقته منال - العقد الثالث أو الرابع)
- 7 - حمدي (صديق حازم وزوج ابنة عمه هند - نفس سن حازم)
- 8 - منال (شقيقة حمدي وخطيبة حازم - العقد الثالث)
- 9 - عزمي (والد هند وعم حازم - العقد الخامس أو السادس)
- 10 - هند (زوجة حمدي وأبنة عم حازم - العقد الثالث)
- 11 - أمينة (أم هند - العقد الخامس)

- 12 - المآذون
- 13 - فؤاد (والد حمدي - العقد الخامس أو السادس)
- 14 - النوباتشي
- 15 - عطية (تاجر بروتين حيواني - العقد الخامس أو السادس)
- 16 - الراقصة
- 17 - أعضاء الفرقة الموسيقية
- 18 - الضابط
- 19 - مجموعة مخبرين
- 20 - بهجت أبو العنين (رجل أعمال فاسد - العقد الرابع أو الخامس)
- 21 - مجموعة متظاهرين



الفصل الأول

المشهد الأول شقة رجل (1)

المسرحُ مظلمٌ بينما نسمعُ صوتَ بكاءِ طفلٍ رضيعٍ ..
يتدخلُ معه صوتُ بكاءِ امرأةٍ (1) وهي تقولُ:

صوتُ المرأة: اسكت بقي .. يا واد أهدم ..

(يردفُ بنبرةٍ هادئةٍ تُشجّعُ على النومِ)

صوت المرأة: نام يا حبيبي نام .. وادبح لك قرنين فلفل

(يتدخلُ مع صوتي بكاءِ الطفل والمرأة صوتُ بكاءِ
رجل (1) .. ثم نسمعه يُقولُ صارخاً)

صوت رجل (1): فلفل .. فلفل يا ولية يا مهفوفة يا بنت

الكلب .. فلفل مرة واحدة .. أنتي مش عارفه سعر

جرام الفلفل بقي بكام النهاردة (بنبرةٍ حانقةٍ)

هتفتحي لى عينين الوداع الفلفل من دلوقت ..

(يستمرُّ صوتُ بكاءِ الطفل والمرأة والرجل .. بينما نرى
ضوءاً خافتاً من مصباح كير وسين يضيءُ الجانبَ الأيمنَ منَ
المسرحِ ويتحرَّكُ مع حركةٍ منْ يحمله ، فيكشفُ لنا
محتوياتِ المكانِ المتواضعة ، التي تُشعرنا بأننا في غرفةٍ
ريفيةٍ فقيرةٍ يحيا في القرنِ الثامن عشر ، يضعُ الرَّجُلُ المِصباحَ
على مائدةٍ خشبيةٍ بالغةِ التَّواضعِ .. ثم يجلسُ على حصيرٍ منَ
الخصوصِ بجوارِ زوجته التي تحملُ طفلها الرضيع - نلاحظُ
أنَّ المرأةَ والرجلَ يبكيان بكاءً متواصلًا -)

رجل (1): بقى ده كلام تقوليه لعليل صغير

امراة (1): أعمل أيه .. أهو كلام وخلاص عشان يسكت

رجل (1): طيب ما بتضعيه

امراة (1): (بنبرة متحسرة) وهو يعنى لو فيه لبن كنت استنيت

رجل (1): بلى ريقه بقطنة

امراة (1): اخر ثلاثة سنتى عندنا .. عملت لك بيهم حقنة الشاى الى

خدتها بعد ما اتعشيت

رجل (1): (محتدأ عليها) مهو لو انتى ست عاقلة ومدبرة .. كنتى

رشدتى فى استخدام الكوز .. اشمعنى كوزك انتى الى مش
بيكمل يوم .. أنا اعرف ستات كتير بتحافظ على كوزها
وبتخليه يفضل عمران .. لحد معاد صرف الكوز الجديد

امراة (1): (بعصية) الى يسمعك يقول انه كوزى لوحدى .. طب
مهو كوزك زى ماهو كوزى .. وكمان انت ناسى ان حنة
العيلده من ساعة ما جه وهو حاطط بقه معانا فيه

رجل (1): عندك حق .. المفروض الحكومة تراعى ربنا فينا ..
وتصرف لكل زوجين معاهم طفل نص كوز زيادة فى
الصيف ..

امراة (1): (بنبرة متفائلة) متقهرش فى نفسك .. الأيام بتعدى بسرعة
.. كلها كام سنة والواد يوصل سن الكنكة .. وبعدها بكام
سنة تانى هتفرح بيه وهو فى سن المغرفة ..

رجل (1): لا .. لا كنكة ولا مغرفة .. أنا ضميرى مش هيرتاح ومش
هبقى مطمئن عليه وعليكى غير لما يوصل سن الكوز والقاه
داخل عليا بنص كوزه .. ساعتها بس ممكن أحس انى أدبت
رسالتى فى الحياة وأموت وأنا مطمئن

امراة (1): ربنا يدبك طولة العمر .. وتفرح بيه وانت شايفه مكمل
نص كوزه ومتهنى مع مراته (يرتفع صوت بكاء الطفل
فتردُّ وهي ترتب على صدره في محاولة لإسكاته) بس لو

انت هاودتنى و مشينا من الحطة المقطوعة دى .. مش كنا

لقينا حد نستلف منه قطنة مية نبل بيها ريق الواد

رجل (1): يا ولية يا مجنونة .. بقى في حد عاقل يبقى ساكن في
الزمالك ويسيبها.. انت ماتعرفيش مين اللى كان بيسكن هنا
زمان

امراة (1): عارفه .. بس ده كان زمان .. قبل ما النيل ينشف

رجل (1): (يزفر بضيق) منها لله حكومة جنوب السودان .. السد
الى بنته شفت اخر شوية ميه كانوا بيوصلوا لنا .. لولا ه كان
النيل فضل نيل .. والزمالك فضلت زمالك

امراة (1): (بعصبية) سيبك دلوقت من الزمالك وحرس الحدود ..
وقوم شوف لنا قطنة ميه عشان الواد

رجل (1): (وهو ينهض متفكرا) ارواح لمين بس يارب فى وقت زى
ده

امراة (1): الغفير بتاع ساقية الصاوى محيلتوش عيال .. روح له
يمكن يكون لسه مخلصش كوزه ويرضى بيلها لك

(ينظر نحوها بضيق .. وعندما يرى تعبيرات حُسن النية على
وجهها .. يتزعج قطعة قطن من كيس على المائدة وهو يقول)

رجل (1): طيب لو لقيته هو كمان مخلص كوزه .. أعمل أياه

امراة (1): خليه يبلها لك فكراً وثقافة

المشهد الثانى القهوة خانة

راديو المقهى يذيع طوال المشهد عدداً من أغاني النثر ذات الإيقاع الصّاحِبِ والمعاني بالغة السطحيّة، معظم رواد المقهى الجالسون فرادى والمشاركون في لعب (الدومنو والطاولة) يكون بكاءً متواصلًا .. بنبراتٍ وإيقاعاتٍ مختلفةٍ، الجميعُ دون استثناء يشتركون في نوباتٍ من الهرش، وعلى اختلاف هيئاتهم تبدو عليهم سمات المعاناة والقهر والفقر الشديد .

رضا .. (عامل المقهى، العقد الثالث، يرتدي فوق ملابسه المُتسخة بالطو طبي أبيض) يسير ممسكاً بصينية عليها عدد من المحاقن الطبيّة المُمتلئة بألوان متعدّدة من السائل، نلاحظ كذلك على الصّينية وجود عددٍ من قطع القطن المُبلّل بالماء في حجم ثمراتٍ صغيرةٍ من الليمون، يتحرّك رضا بالصّينية ويحقنُ أوردة زبائن المقهى بالمشروبات بينما يتعالى صوتُ البُكاءِ

رضا : حقنة شاي سكر خفيف لعم جلال

جلال : خف إيدك شوية يا رضا

رضا : حقنة قرفة للأسطى ولیم

وليم : (يتوجّع من غرس الإبرة) اااااااااااه

رضا : شمر دراعك بقى يا عم على عشان تاخذ حقنة القهوة

(عم علي رجل طاعن في السن، يفرد ذراعَهُ ويشنيه ا بعد تناول القهوة ثم يقول بنبرة شك)

علی : القهوة دی مش مضبوطة یا رضا

رضا : مش مضبوطة ازاي .. بعدين ايش عرفك .. كنت شوفتني
يعني وأنا بحط السكر

علي : قلت لك مش مضبوطة يا رضا

رضا : یا عم علی مضبوطة واللہ .. حتی استطعمها کویس

علي : (وهو يفرّد ذراعَهُ ويثنيها مرات عدة)أدينى استطعمت تانى
اهوه .. ومش مضبوطة زى ما قولت لك .. دى كبيرها تبقى
على الريحه

رضا : يعنى أنا هغشك

رضا : أيوه بتغشنى .. لأنى مش عبيط ولا صغير .. أنا بتعاطى
القهوة من قبل أنتا ما تتولد .. من أيام ما كانت بتتاخذ فى
العضل .

رضا : طيب هظبط لك حقنة تانية .. بس قول لى الأول بمناسبة
شيخوختك دى .. توعى على أيام ما كان المعسل بيتشرب
على حاجة قزاز مدورة بيقولوا عليها خيشة

علي : خيشة أيه يا حمار .. أسمها شيشة

رضا : (بسعادة وهو يجلس على مقع ديمواجهته) وحية
شيخوختك بتتكلم جد .. توعى ع الشيشة يا عم علي

علي : يا ابنى أوعى أيه .. دا أنا ياما كركرت

رضا : م الضحك

علي : م الأنفاس يا عبيط .. يا رضا يا ابنى هو الواحد عايش غير على
حس الأيام دى

رضا : وصحيح يا عم علي أن الشيشة دى كانت بتبقى ملياة ميع

علي : امال أيه .. وميه كتيبيير .. تحمى أتخن راجل من القاعدين
على قهوتك الزبالة دى

(أيمن ، شاب في مُقبل العم ر، يقطع نوبة البكاء ويُطبق
الجريدة في يده ويقول لعل بحدّة)

أيمن : عشان كده النيل نشف .. جيلكم قعد يكركر في الشيثة و
يستحمى بالمرتين والثلاثة في الشهر .. لحد ما جبتم أجله ..
والله انتوا المفروض تتحاكموا .. المفروض تتحرقوا بجاز
وسخ

علي : يا ابني احنا كنا على نياتنا .. محدش فينا كان فاكر إن النيل
ممکن ينشف

أيمن : كان لازم ينشف لانكم ماصنتوش النعمة .. ومعملتوش
حساب لكركرة الأجيال الجاية من بعدكم

علي : يا ابني هو أنا كنت رئيس جمهورية عشان تحاسبني .. دا أنا
حيال الله كنت موظف درجة تالته في السكة الحديد

أيمن : (صارخاً) تنكر إنك كنت بتغسل وشك وبتشطف كل يوم
الصبح

علي : لا

أيمن : تنكر إنك كنت بتغسل رجلك كل يوم قبل ما تنام

علي : لا

أيمن : تنكر إنك كنت بتغسل إيديك قبل الأكل و بعده

علي : لا

أيمن : تبقى مجرم وتستحق الشنق

علي : بتشتمنى .. يا ابني دا أنا أصغر عيل في عيالي من دور أبوك

أيمن : (وهو ينهضُ مُحْتَدًا) لو أبويا ذات نفسه اتشطف قد ما انت
اتشطفت كنت خنفته و بإيديا دول

(ينصرف أيمن ، فيلتفتُ على نحو رضا ويصرخُ فيه)

علي : أهو انت سبب قلة الأدب دى .. بعدين تعالى هنا .. مش كفاية
اخذ حقنة القهوة سادة بدل مطبوط .. كمان متنزليش معاها
ميه

رضا : انت هتفش غلك فيا ولا أيه .. حد قال لك تتباهى بالكركرة
.. عموما القطنة بتاعتك اهه

(يلتقطُ علي قطنةً مُبَلَّلَةً من على الصينية ويرفعُ يدهُ ليعصرها
في فمِهِ بينما يرفعُ لاعبُ طاولة (1) صوتهُ)

لاعب طاولة (1) : فين حقنة اللمون الساقع الى طلبتها يا رضا

رضا : أصبر شوية على مالسرنجة تسقع في الفريزر يا برنس

(يدخل دكتور حازم ممسكاً بجريدة، بدايات العقد الرابع ،
يتأمل رواد المقهى بنظراتٍ مُشفقةٍ ثمَّ يجلسُ فوق مقعدٍ
مُجاوِرٍ لعلِّي ويلتفتُ ليُخاطبَ رضا)

حازم : حقنة حلبة بحليب يا رضا .. بس م اتكترش السكر .. وهات
معاها قطنه ميه ساقعة

رضا : من عينيا يا دكتره

حازم : (لعلِّي) ازيك يا عم على

على : الحمد لله يا حازم يا أبنى

حازم : فيه أيه (وهو يتأمله) .. انت شكلك زعلان .. أول مرة
اشوفك بتبكي وانتا متضايق بالشكل ده

على : أصل دى مش دموع مرض بس

حازم : امال دموع ايه تانى ..

على : ندم

حازم : ندم ؟ هو فيه بعد الى انتوا فيه ؟!! وندمان على أيه ان شاء الله

على : (وهو ييلكي بشدة) على كل مرة كركرت فيها

(يدخل حمدي ، في عمر مُقارب لحازم ، يجلس وهو يقول
معتذراً)

حمدي : معلىش اتاخرت عليك شوية

حازم : ولا يهملك .. انا جيت من شوية صغيرين .. تحب نطلع
دلوقت

حمدي : اصطبج الأول (يلتفت نحو رضا) حجر معسل وحقنة
عنا ب ساقع يا رضا

صوت رضا : حاضر يا استاذ حمدي

حازم : خد اقرا الخبر ده

(يمسك بالجريدة من يد حازم ويطالعها فتحتد تعبيرات
وجهه)

حمدي : يا نهار أسود .. هيخصصوا شركة الهوا

حازم : من أول ألفين ميه وحداشر .. يعنى كلها كام شهر وإيصال
الهوا هييجي الطاق خمسه

حمدي : يا وقعة سودة يا جدعان

(يقتر ب رضا ممسكاً بحجر معسل مرصوص في يد وفي
الأخرى يحمل صينية عليها حقنة تحتوي على سائل أحمر

بجوار قطعة قطن.. يمسك حمدي بحجر المعسل .. ويترك
يده الأخرى لرضا الذي غرس فيها سن المحقن)

حمدي : اااااه .. يا اخي حرام عليك .. انت لو دقيت مسمار عشرة
سنتي في ايدي كان أرحم .. كام مرة اقول لك غير سن الابر
الى اتبرى ده

رضا : (وهو يستدير منصرفاً) انت الى مشاعرك م هفهفه عشان
داخل على جواز.. والنعمة ما كملت شهر مغيره يا نجم
(ينظر حمدي بغضب ناحية رضا ثم يقرب أنفه من الحجر
ويسحب شهيقاً طويلاً)

حازم : النفس الى سحبته ده .. تمنه بعد الخصخصة مش هيقبل عن
عشرة جنيه

حمدي : انشالله يبقى بحداشر .. انا ناوى ابطل تدخين بعد الجواز
حازم : هي جت عليك .. طيب وبقية الناس الى قربت تعمى من
العياط .. يبطلوا يتنفسوا .. فاتورة الهوا جت لأم وجيه
جارتنا بميتين واربعين جنيه الشهر الى فات .. مع أنها ست
وحدانية .. وعلى طول تلاقيها مطلعة راسها م الشباك عشان
تتنفس برة العداد

حمدي : تلاقي حد بيكرها بلغ عنها وعشان كده ابتدوا يحاسبوها
على الشهور اللى فاتت بأثر رجعى .. بس قول لى .. كلامك
ده بيقول ان شكك طلع فى محله .. يعنى بجديا حازم عياط

الناس له دخل بالظروف السوددة اللى بنعيشها

حازم : دخل مباشر يا حمدي .. اللى شافه الشعب ده على مدار
الميت سنة اللى فاتت خلا كل رصيده من التحمل والصبر
نفذ .. التخطيط والجهل والعشوائية والفقر والقهر والفساد
وخراب الذمم اللى استشرى .. قضى على كل رصيد للأمل
جواه و خلا كل طم وحاته فى الإصلاح و مستقبل أفضل ..
تنهار و تقتتل

حمدي : بس الحكومة بتقول غير كده .. بتقول ان الناس بتبكي
استعباط .. دلع يعنى عشان الحكومة ترخص الأسعار تانى

حازم : ومن امتى الحكومة كانت بتقول الحقيقة

حمدي : بس لو كلامك صح .. فيه حلقة مفقودة لازم بحثك
يكشفها

حازم : اللى هى ؟

همدى : ليه فيه فقرا و مظلومين ماعيطوش لغاية دلوقت .. زى أنا
وانت مثلا

حازم : لان أنا وانت والى زينا .. عندنا أكثر من باعث على التحمل
.. حلم .. هدف .. أمنية .. أنا مثلا طموحى العلمى و حلم
الجواز من منال أختك .. وانت تعيينك فى التلفزيون
وجوازك من هند بنت عمى .. لكن طبعا مش معنى ده اننا
بعيد عن السقوط

همدى : (مرتبكاً)يعنى أيه

حازم : يعنى كل واحد فينا جواه قبلة موقوتة ومش ناقصها غير نزع
الفتيل

همدى : وايه اللى ينزع الفتيل لا قدر الله

حازم : أى صدمة .. أى اخفاق مهما كان نوعه أو حجمه

همدى : يعنى احنا بقينا عاملين زى المبانى المشرخة .. خوخنا و
بوظنا من جوانا لدرجة ان أى هزة ممكن توقعنا

حازم : للأسف دى الحقيقة .. جيلنا والأجيال اللى سبقته اتعرضوا
لعمليات اقضاء ومسح وتشويه وقهر تهد جبال مش بشر ..
قضوا على كل حاجة حلوة جوانا .. شو هوا كل قيم الجمال

والاخلاق الى ربنا خلقها فينا .. قضوا حتى على ادميتنا .. عندك الى
بيحصل لجيلنا على سبيل المثال .. بنفتح عنيناع الدنيا عشان
نلاقى نفسنا زى التيران الدائرة فى دوامة معاناة لا بتقف ولا
بترحم ولا ليها اخر .. اتطحننا فى طاحونة الفقر .. اتهمشنا
واتشوشنا واتلعب بمصايرنا واتاكلت حقوقنا

فعلنا كان الصبر .. وكتمان الحسرة فى القلب .. على أمل ان بكرة يكون
أحسن .. ولما جه بكرة .. وألف بكرة .. و مليون بكرة ..
والحال متغيرش .. الأمل مات .. بعدها .. حتى الصبر على
موت الأمل هو كمان مات .. وبالتالي الكيل طفح ..

حمدى : ولما الكيل يطفح .. يطفح دموع !!؟

حازم : هو فيه أصدق من الدموع عشان تعبر عن حالة زى دى

حمدى : بس الواحد مهما اتألم بيبكى شوية وبعدين يرتاح

حازم : ده لما يكون بيبكى كرد فعل على جرح واحد أو ألم واحد أو
معاناة واحدة

حمدى : تقصد أيه

حازم : الناس دى بتبكى تاريخ من الألم والمعاناة والقهر والكبت ..

بتبكي بأثر رجعى .. بتبكي عمر كامل من الحرمان والضياع والوجع
والجوع .. كل واحد

همدى : (يصرخ فيه مقاطعاً) بس والنعمة ما أنت مكمل

حازم : أيه .. خايف تسمع باقى الحقيقة

همدى : وأيه يخوفنى وأنا داخل على أسعد وأحلى سنين عمرى ..
كلها كام ليلة وأبقى مع حلم عمرى وجهاً لوجه

حازم : ربنا يهنيك مع هند

همدى : أنت كمان ربنا يسعدك مع منال

(فجأة يدخل أيمن مهرولاً ويقول لرضا)

أيمن : هات اذاعة الاخبار يا رضا بسرعة .. يقولوا هيزعوا بيان هام

(يتحرك رضا نحو المذيع ويدير مؤشره بينما يلتفت روادُ

المقهى حول المذيع وينصتون باهتمام)

الم ذيع: لقاء جديد مع أحداث يوم جديد نبدؤها من مصر ..

تحرك سريع يهدف إلى التخفيف عن المواطن المصري

وتمشياً مع تعامل المجتمع الدولي مع أزمة نقص الموارد

المائية و اتساقاً مع توجيهات منظمة الصحة العالمية ..

جاءنا البيان التالي:

(تعلو نبرةُ صوته)

قرار السيد رئيس جمهورية مصر العربية بالقانون رقم 77 لسنة 2110

لتنظيم استخدام الماء بشكل مباشر

رئيس الجمهورية

بعد الاطلاع على الدستور

وعلى قانون حماية الثروة المائية الصادر بالقانون رقم 40 لسنة 2065

وعلى قانون حماية حقوق المواطن المصري الصادر بالقانون رقم 15

لسنة 2097

وبعد موافقة مجلس الوزراء

وبناء على ما ارتاه مجلس الدولة

قرر

القانون الآتى نصه

المادة الأولى:

يحظر بشكل نهائي استعمال الماء بشكل مباشر بغرض نظافة الجسد

إلا في حالتين:

الحالة الأولى .. عند الزواج بغرض الاستحمام .. الذي يشترط أن يكون زواجاً شرعياً .. على أن تتم مراسم الاستحمام في حضور كل من :

1- مندوب عن السيد وزير مياه الشرب

2- مندوب عن السيد مدير جهاز الرقابة الإدارية

3- مندوب عن السادة أعضاء المجالس الشعبية (حي ، مدينة، محافظة) في دائرة المواطن المُستحم أو المواطنة المُستحمة

4- المأذون الشرعي المعتمد لمحل إقامة المواطن المُستحم أو المواطنة المُستحمة

على أن لا يتم الشروع في مراسم الاستحمام، إلا بعد عقد قران المواطن المُستحم .. على المواطنة المُستحمة، لضمان عدم التذرع بالزواج من أجل الاستحمام

(يتفرض جسدٌ حمدي ويضرب كفيه مستغرباً)

حمدي : لا .. كده تبقى الحكومة باصة لى فى الجواز .. يعنى أيه ..

بعد حمام ليلة الدخلة انا ومراتى هنلحس فى بعض زى القطط

حازم : استنى لما نعرف باقى الموضوع

المذيع : الحالة الثانية .. عند الوفاة بغرض الغُسل ، على أن تتم

مراسم الغسل في حضور كل من

1- مندوب عن السيد وزير مياه الشرب

2- مندوب عن السيد مدير جهاز الرقابة الإدارية

3- مندوب عن السادة أعضاء المجالس الشعبية (حي ، مدينة،

محافظة) فى دائرة المواطن المتوفى أو المواطنة المتوفاة

4- مندوب عن السيد مدير مصلحة الطب الشرعي

5- مغسل شرعي

على أن لا يتم الشروع في مراسم الغُسل ، إلا بعد معاينة السيد
مندوب مصلحة الطب الشرعي .. لجثة المواطن المتوفى ..
أو المواطنة المتوفاة .. وذلك للتأكد من عدم التذرع بالوفاة
من أجل الغُسل .

(ينظر علي نحو حازم ويقول مستغربا)

على : على كده لما واحدة تحب تدعى لابنها .. تقول له .. روح يا

ابنى .. يا رب تموت عشان اشوفك مستحمى
حازم : اصبر بقى يا عم علي لما نشوف اخرتها ايه

المذيع : المادة الثانية

لكل مواطن في جمهورية مصر العربية ممن جاوز عمره
الثمانية عشر عاماً الحق في العناية بجسده و تنظيفه مرة
واحدة في مطلع كل شهر ميلادي ، وذلك عن طريق مسح
جسده بفوطة مبلولة

(فترة صمت تزيد خلالها تعبيراتُ الاهتمام والانصات على
المجموعة)

المذيع : وذلك في حضور كل من

1 - مندوب عن السيد وزير مياه الشرب

2 - مندوب عن السيد مدير جهاز الرقابة الإدارية

3 - مندوب عن السادة أعضاء المجالس الشعبية (حي ، مدينة،
محافظة) في دائرة المواطن الراغب أو المواطنة الراغبة في
النظافة

4- السيد رئيس مباحث قسم الشرطة .. التابع له محل إقامة
الراغب أو الراغبة في النظافة ، على أن لا يتم الشروع في
مراسم التنظيف .. إلا بعد أن يتأكد السيد رئيس المباحث
من أن الراغب أو الراغبة في النظافة من سكان دائرة القسم
وغير مطلوب أو مطلوبة على ذمة قضايا جنائية .

(يصرخ حمدي في رضا)

حمدي : كفاية .. كفاية .. (وهو يتحرك نحو المذيع) اقل الزفت ده

(يقف رضا متخشبا وهو يقول)

رضا : لا حول ولا قوة الا بالله .. يعنى ايه .. يعنى عشان الواحد

يستحمى من هنا ورايح .. لازم يطلع فيش وتشبيه

(يغلق حمدي المذيع، ينظر نحو حازم وتدمع عيناه)

حمدي : فيه كده يا حازم

حازم : مفيش .. بس لازم نصبر .. عشان أحلامنا الى مستنية نحققها
لازم نصبر

حمدي : (بغضب) هو الجربان ينفع يحلم .. دا حتى احلامه هتبقى

وسخة .. (صارخاً) هم ليه عايزين يشوهوا كل حاجة فى عنينا ..
حتى الأحلام !!؟

(يصرخ فيه حازم مقاطعا)

حازم : اوعى .. اوعى تضعف يا حمدي

(يتمالك حمدي نفسه ، ينظر نحو حازم ويقول بثقة)

حمدي : عندك حق .. مش هضعف .. مهما حصل مش ...

(يقاطعه صوت صراخ منال .. ثم تدخل لنراها في حالة
صدمة وفزع)

منال : يا لهووووووى ..

حازم : (وهو يتحرك نحو منال) ده صوت منال

حمدي : أيوه و .. (وهو يهروئ من خلف حازم) منال .. (وهو
يقترُب منها) فيه آيه .. أتكلمى

منال : بابا وماما

حمدي : مالهم

منال : جت لهم شوطة العياط الى مالية البلد

حمدي : (مصعوقاً) لا اله الا الله .. وأيه السبب ؟

منال : النقاش الى شغال في الشقة بتاعتك

حمدي : ماله ؟ .. (مُفكِّراً) هو عشان ظبطه بيخنصر في المونة .. رمى نفسه من بلكونة الشقة واتهمنى ان أنا الى رمينه

منال : لا .. هو سليم وزى القرد .. بس جه وقال لهم

حمدي : قال لهم ايه .. اتكلمى

منال : مش قادرة .. مش قادرة أنطقها

حمدي : قولها .. ولا يهكم (وهو ينظر ح ازم) أخوكى جبل ويتحمل أى حاجة .. هيكون أيه يعنى .. قال لهم ان الدهانات الى جبتها له طلعت مغشوشة .. مش مهم .. أجيب غيرها

منال : ياريت كان قال كده

حمدي : يبقى قال لهم المحارة طلعت مغشوشة ووقعت من فوق الطوب لما جه يمشى عليه الرولة

منال : ياريت يا حمدي ياريت

حمدي : يبقى الأسمنت كله طلع بايظ والحيطان وقعت .. بس عادى .. أبني أم الحيطان من تانى

منال : لا ده ولا ده .. الموضوع أكبر من كده يا حمدي

حمدي : يبقى الحديد .. أكيد الحديد اللي اتحط في الأساسات كان مغشوش والعمارة وقعت .. بس برضو مش مهم .. أنا عقدى تمليك وبحصة في الأرض .. يعنى برضوا هتبقى لى شقة في العمارة دى انشالله تتبنى بعد خمسين سنة

منال : برضوا لا يا حمدي .. العمارة ما وقعتش ..

حمدي : (وهو يتنفس الصعداء) الحمد لله .. ياما انت كريم يا ...

منال : بس برضوا يا ريتها كانت وقعت ولا كنش ده حصل

حمدي : (بعصبية ونفاذ صبر) طيب قولى .. قولى قبل ما يجينى شلل يا

منال .. قولى وما تخافيش .. وحياتك عندى ما هيحصل

حاجة .. أنا عارف انك خايفه عليا .. عشان كده عايزك

تتطمنى .. قولى يا حبيبتى .. قولى ومتخافيش

منال : النقاش قال لهم ان فيه ناس جم طردوه من الشقة وغيروا لها الكالون

حمدى : مش مهم .. أجيب كالون غيره

منال : الشقة طلعت متباعة لواحد قبلك يا حمدى .. وبعقد مُسجل
فى الشهر العقارى كمان .. وقبل ما تكتب عقدك بسنتين

حمدى : يعنى ايه .. (يتحرك فى جنبات المسرح بخطوات مُثاقلة ..
متداعية) يعنى ايه .. يعنى أيه مشتريها قبل .. يعنى ايه عقد
مسجل .. يعنى أيه شهر عقارى

(يقترُب منه حازم وهو يقول بمتهى القلق والإشفاق)

حازم : حمدى .. اهدا يا حمدى

حمدى : يعنى ايه كالون .. يعنى أيه شقة .. يعنى أيه شقا .. يعنى أيه
حلم .. يعنى أيه حب .. يعنى ايه جواز ..

(يمسك حازم بكتفيه)

حازم : اهدا .. اهدا .. ما ينفعش كده

حمدى : يعنى أيه أى حاجة .. و كل حاجة

حازم : (صارخافيه) حمدى !؟

حمدى : (وهو يجهش باكيا) يعنى أيه حمدى .. يعنى أيه هند .. يعنى
أيه حياة .

حازم : (صارخافيه) اياك تبكى يا حمدى .. اياك تبكى

(يلبي حمدي .. يلبي بحرقة .. بينما تتأمله منال بذهول)

حمدي : لا يا حازم .. أنا مش ببكى .. صدقنى .. أنا مش ببكى والله
ما ببكى

(وهو يواجه منال باكيا)

حمدي : قولى له يا منال .. قولى له انى مش ببكى

حازم : يا خسارة يا حمدي

حمدي : (صارخا بحازم من خلال دموعه) متقولش كده تانى .. أنا
مش ببكى .. ومش هبكى

(يستمر حمدي للبكاء .. ويزداد تأثير منال .. التي اقتربت منه
بخطوات وجلة)

منال : أنتا كمان يا حمدي .. بابا وماما وانت .. وفى يوم واحد

(تصرخ)

منال : فاضل لى مين

(يضمها إلى صدره .. يمسح الدمع عن عينيه وهو يقول)

حمدي : لا يا حبيبتي متخافيش .. متصدقيش حازم .. أنا مش ببكى ..

مش بيكى

(ترتعدُ تعبيراتُ وجهِ منال وه ي ترى حمدي ينهار هابطاً على
الأرض وهو يبكي بشدة .. بينما يمسكُ حازم بكتفها
ويصرخ فيها محدراً)

حازم : أمسكى نفسك يا منال .. أوعى .. أوعى تبك.....

(تبكي منال وه ي تهبطُ على الأرض وتضع رأسها على صدر
حمدي) ..

حازم : (صارخا) لا يا منال .. لا

(يرتفعُ صوتُ بكاءِ حمدي ومنال .. بينما يُظلم المسرحُ)

المشهد الثالث صالة منزل عزمى

صالة متواضعة تفتح على بايين، باب في الجدار الأيمن (باب الشقة) وباب في الجدار الأيسر (باب غرفة) وفي الجدار الثالث (المواجه) نرى شباً لفتوحاً على الشارع .

عزمى (والد هند) مع زوجته أمينة بينما تقف هند (العقد الثالث، جميلة ومتناسقة القوام). وقد بدا عليها التوتر.

عزمى : مستحيل أدى بنتى الوحيدة لعيلة معيطة زى دى ..
دى عيلة موبوءة .. جتها شوطة .. فرة .. الأب والأم والواد والبنت .. وفى ليلة واحدة؟!!!

هند : يا بابا ده قضاء ربنا

عزمى : مهو عشان قضاء ربنا أنا خدت القرار ده .. دول أكيد ربنا بيعاقبهم .. أكيد حماكى .. قصدى اللى كان حماكى .. كان ييهلب من شغله فى الجمعية الاستهلاكية .. أكيد كان بيع كراتين ا لييض الفاضية لحسابه .. ودخل على عياله فلوس حرام

هند : يا بابا حرام عليك .. أنا حمايا طول عمره راجل محترم .. عاش
حياته كلها شريف وشحات .. انت الى استغليت حب
حمدي ليا وضغطت عليهم وحملتهم فوق طاقتهم .. حد
يطلب في الأيام السوداء دى من عريس بنته أنه يجيب شقة
أوضة وصالة ومطبخ وكمان هههههههه .. وفين .. فى إمبابة ..
وفوق ده كله مرتبة السرير والمخدات والطبلية بتاعة أوضة
السفرة .. دول كانوا المفروض ينتحروا مش يعيطوا بس

عزمى : يعنى كنتى عايزانى أوافقهم ونمشى الجوازة بالنص عشان
أنتحر أنا وأمك .. بعدين تعالى هنا .. ما أنا طفحت الكوتة
على ما جبت لك باجور الجاز والزير والمقشة ال س عف
وطشت الحمووم .. هو مين الى كان هيستحمى فى الطشت ..
أنا ولا المدعوق بتاعك

هند : يا بابا أنا مقولتش أنك كنت هستحمى فى الطشت أو لا قدر
الله قصرت فى حاجة .. بس هما كمان مقصروش وجابوا
الحاجات الى حضرتك طلبتها
(نرى حازم وهو يدق على باب الشقة ومن خلفه حمدي وهو
يُغالب فى كتم صوت بكاء)

عزمى : مين ؟

حازم : أفتح يا عمى أنا حازم

عزى : عايز أيه يا حازم ؟

حازم : عايزك فى كلمتين

عزى : الزفت الى أسمه حمدى معاك ؟

حازم : أفتح لى الأول يا عمى وبعدين نتكلم

عزى : مش فاتح غير لما اطمئن ان المعيط ده مش معاك

حمدى : (وهو ينفجر باكياً) بس متقولش معيط .. اياك أسمعك بتقول
الكلمة دى تانى

عزى : أمشى من هنا يا معيط يا ابن الناس المعيطين

حمدى : (وهو ييلى) مش ماشى من هنا غير لما أق ابل هند ..
سامعنى .. مش همشى من هنا حتى لو صورت قتيل الليلة
دى

عزى : روح عيط بعيد عن هنا .. أنا مابتهدش

حمدى : (وهو ييلى بشدة) طب لو راجل أفتح لى .. أفتح لى وأنا
هفرجك

عزمي : روح امسح عينيك الأول .. بعدين تعالى اعمل دكر
حمدي : (يحتدُّ وهو يضرب البابَ بكتفه) طب والنعمة لكسر الباب
وأمسحهم في الفوطة بتاعتك .. يا ندل .. يا جبان
(يتجه عزمي نحو الباب ويفتحه بحماسٍ وحميةٍ ثم يضعُ يدهُ
على أنفه خوفاً من العدوى)

عزمي : وبتهددني في فوطتي كمان .. طب أدى الباب .. ووريني
هتيجي ناحية الفوطة بتاعتى ازاى

(يدخلُ حازم ومن خلفه حمدي ثائراً .. ثم عندما يرى هند
تسمع موسيقى رومانسية يخرج خلالها منديلًا من جيبيه و
يستعمله لمسح عينيه وأنفه فيحدثُ صوتاً مقززاً)

حمدي : خلاص .. مش هاجي ناحية فوطتك أو أى فوطة في الشقة ..
بس اياك تفتكر أن ده خوف منك .. أنا بس خايف على هند
عليها من العدوى

هند : (وهي تتأمل حمدي بنظرة حبِّ هائمة) بحبك

حمدي : (وهو يعاود البكاء) بعشقك

عزمي : (يصرخ في هند) ادخلي جوا يا بنت .. (لحمدي وهو يشير

نحو باب الشقة) وانتأطلع برة .. أنا مش عايز معيطين في بيتي .. ومن
هنا ورايح ملكش دعوة ببنتي .. لان اللى بينك وبينها انتهى ..
يلا بالسلامة

حمدى : مش ماشى من هنا .. وبنتك مش هتكون لحد غيرى

عزمى : هنشوف .. وورينى ساعتها هتعمل أيه

حمدى : (يهجم على عزمى لكنّ حازم يحول بينهما) هعمل فيك اللى
مايخطرش على عقل بشر .. لو فكرت مجرد تفكير أنك
تحرمنى من هند (يقرب رأسه من عزمى وهو يضع إصبعين
على أنفه) هانف فى وشك

عزمى : (صارخا فى حازم) عاجبك كده .. يعمل فى عمك كده وانت
واقف .. دى مجايبك يا دكتور حازم

حازم : ممكن نهذا شوية يا عمى ونتكلم بالعقل

عزمى : عقل .. هو خلا فى عقل .. بعد ما قل بقيمتى قدام مراتى
وبنتى

حازم : اعذره يا عمى .. ما انتا شايف حالته

عزمی : مهو حالته دی الی مخیلانی مصمم مجوزوش بنتی .. تقدر
تقول لی بعد الی حصل له هیصرف علیها منین

حمدی : (یقطع نوبة البكاء ویتدخلُ قائلاً) من شغلی

عزمی : والی فی حالتک دی ممکن یشغل آیه

حمدی : مذیع .. والا انت نسیت انی خریج إعلام

عزمی : والی فی حالتک دی یذیع ایه و ازای ان شاء الله .. ولا
التلفزیون هیعمل لك برنامج مخصوص ویسمیه صباح
العیاط یا مصر

حمدی : (یهجم علی عزمی مرة أخرى) بتتریق .. طب والنعمة ل ...

حازم : (ینهر حمدی ویُسکته) خلاص بقی .. مش هینفع کده .. کده
مش هنوصل لحل .. (وهو یتجه نحو عزمی) عمی .. ممکن
تسمعنی لو سمحت

عزمی : (یلتفت نحو زوجته) خدی البنّت وادخلوا الأوضة
وما تطلعوش منها غیر لما الموبوء ده یمشی

حمدی : (بمنتهی الضیق بعد ما تابع انصراف هند مع أمها) یا رب

صبرنى .. يا راجل انت لم لسانك .. أنا مناخيري بتاكلنى ومش
هيحصل كويس

عزمى : (لحازم) شوفت كلامه .. اهو رجوع يهدد تانى

حازم : اعتبره مش موجود يا عمى .. خلى كلامك معايا أنا

عزمى : طيب خلصنى .. وهات من الآخر لانى ابتديت اتخنق

حازم : الحالة الى بيمر بيها حمدى حالة مؤقتة .. يعنى مسيره هينخف

عزمى : يخف الأول وبعدين أجوزها له

حمدى : لا .. أتجوزها الأول وبعدين أخف

عزمى : على جشنى

حازم : الى قاله حمدى هو الحل يا عمى .. صدقنى .. أنا دكتور

وفاهم بقول ايه .. سبب تعب حمدى ضياع الشقة منه ..

ووجود عائق حال بينه وبين جوازه من هند .. يعنى لما

يتجوزها .. هيزول العائق ده وبالتالي هيشفى من المرض

عزمى : وعلى فرض انى وافقت .. هيتجوزها فين ان شاء الله ؟ بعد

ما شقته طارت

حازم : فى شقة العيلة

عزى : عيلة مين ؟

حازم : عيلته

عزى : على جتى .. على جتى ان ده يحصل .. بقى أنا معترض انها
تعاشر معيط واحد .. أقوم اوافق على انها تعاشر أربع
معيطين ..

حمدى : (وهو يهجم على عزى) هقتلك .. والنعمة لقتلك

حازم : بس يا حمدى .. اسكت انت .. أنا

صوت عامل (1): يا حاج عزى ..

صوت عامل (2): يا حاج .. يا حاج .. الحقنا يا حاج

(بهرول عزى نحو الشباك)

عزى : العيال الشغالين عندى جم .. هخليهم يطلعوا يقطعوك ..
(بنبرة توعد) والله لخليهم يضربوا فيك لغاية ما تضحك من
شدة الألم (وهو ينظر من الشباك) مالكم يا ولاد ؟ وأيه الى
مبهدلكم كده ؟!!

صوت عامل (1): المحل اتحرق يا حاج

صوت عامل (2): الأنوبة ضربت فيه وساوته بالأرض

يلتفت عزمي مصعوقا بينما تلمع عينا حمد ي وهو يتحرك
ناحيته

عزمي : لا اله الا الله .. شقا عمري ضاع

حمدى : (وهو يرت على كتف عزمي) ما تكتمش فى نفسك يا حميا يا
حبيبى .. أبكى احسن تيجى لك جلطة ولا يطق لك عرق

ولا تجيك مصيبة تاخذك

حازم : لا يا عمى .. متسمعش كلامه

عزمي : (محدثا نفسه) هو البكا بيرجع الى راح .. قدر الله وما شاء
فعل

حمدى : ونعم بالله .. البكا مبيرجعش الى راح .. لكنه بيريح .. بعدين
ده شقا عمرك .. مش شقا عمرك بس .. ده فيه ذكريات
طفولتك وشبابك و ..

عزمي : (بعد أن دمعت عيناه) أه .. هى الذكريات .. خصوصا انى
وارثه عن المرحوم أبويا

حازم : (محدراً) عمى .. أوعى يا عمى

حمدي : (مُغطياً على صوت حازم) يعنى شقا أبوك كمان ضاع

عزمى : (متشنجاً) الله يرحمه بناه طوبة على طوبة

حمدي : والمرحومة أمك .. هى كمان أكيد شاركته فى الشقا والمرار
ده .. مش كانت مراته وشايلة همه؟

عزمى : اه .. أمى .. (باكياً) ااه ااه ااه يا امه

(يبكي عزمي بلنفعال رغم تحذير حازم له، بينما يضم حمدي
رأس عزمي إلى صدره)

حازم : يا عمى لا

حمدي : (وهو يربت على ظهر عزمي) عيط يا ابن المعيبة .. هات من
جوة .. من جوة قوى

(يرفع صوت بكاء عزمي بينما يظلم المسرح)



الفصل الثاني

المشهد الأول شقة والد حمدي

المسرح منقسم إلى جزأين .. الأول ناحية اليمين يشغل
ثلثي المساحة. وهو عبارة عن صالة الشقة المزدهمة
بالمدعوين من الجنسين .. في الواجهة مقعدان على
أحدهما تجلس هند .. بجوار هند نرى منال وعدد
من الفتيات .. كما نرى عدداً من المدعوين وهم
يلتقطون قطع القطن المبلل بسائل أحمر (شربات
الفرح) من فوق صينية تحملها امرأة في العقد
السادس (أم حمدي)

أم حمدي: (وهي تشير نحو امرأة) خدتي قطنتك يا أم عصام ؟
أم عصام : أيوه يا حبيبتي خدتها وعقبال ما ناخذ قطنة منال
في ركن بالصالة نرى عدداً آخر من الرجال يلتفُّ من
حول كنبه بلدي يجلس عليها المأذون بين عزم ي
وحمدي .. من بينه ما فؤاد - (والد حمدي الذي

نلاحظه دائماً وهو يرمق حمد
ي بنظرات الضيق
والإزدراء) - وحازم وعدد من رواد المقهى (نلاحظ أن
جميع من في المشهد يكون ما عدا حازم وهند) ..
الجزء الثاني .. يشغل ثلث المساحة (نلاحظ اتصاله بباقي مساحة
المسرح من خلال باب يفصل بين المساحتين) .. ونراه
مظلماً ظلاماً تاماً
المأذون : (وهو يرفع المنديل ويمسح به عينيه .. يقول بصوت
يقطعه البكاء) زواج مبارك ان شاء الله
(يسحب عزمي يده من يد حمد ي بعنف .. بينما يغادر
المأذون مهرولاً)
حمدي : (بعصبية لعزمي) هو أنتا بتسحب إيدك من كلبش .. ما
بالراحة يا عم انت
عزمي : (وهو يكي بحرقه) ياريتها كانت اتكلبشت في إيد ع شماوى
ولا انها كانت تتحط في إيد واحد معيط زيك من تحت
منديل واحد أيا معيط .. يا معفن
(يهم حمدي بالرد على عزمي لكنه يتراجع ثم ينظر في اتجاه

خروج المأذون وهو يقول بعصية)

حمدي : المنديل .. (يهم بالنهوض وهو يقول لحازم) إلحق المأذون
الحلنجى ده قبل ما يمشى وهات منه المنديل بتاعى

حازم : (بعصية) احترم نفسك بقى .. منديل أيه وهباب أيه بس..
فؤاد: (لحمدي) وهو يرمقه بنظرة تأنيب واحتقار) طول عمرك معفن
وكاسفنى

حمدي : حتى انتا يا بابا .. حتى انتا .. يعنى أقوم أمشى وأسيب لكم
الفرح ده

(ينصرف فؤاد متذمراً ، بينما يميل حازم على حمدي)

حازم : مش هتنتفع عصيتك دى .. وسع خلقتك شوية .. عشان
الليلة دى تعدى على خير .. ريح اعصابك يا حمدي .. اهدى
.. حاول تسيب قلبك يفرح .. تفاعل يا أخى .. تفاعل

حمدي : (وهو يمسح دموع عينيه بكمّ الجاكت) مهو عشان الليلة
تعدى على خير لازم أدخل ومعايا منديل .. ولا انتا عايزنى
امسح فى هدومها .. بعدين يا حازم بعيد عن أى حاجة ..

مش عارف ليه حاسس ان الليلة دى مش هتعدى على خير.. حاسس
انى متشائم .. عارف يعنى ايه متشائم .. متشائم يا حازم ..
متشائم

(يخرج حازم مندبلاً من جيبه ويلقيه في وجه حمدي)

حازم : خد .. داهية تسد نفسك

(تلتفت أم حمدين نحو مجموعة النسوة)

أم حمدي : ماتسمعوننا زغرودة يا ستات

(يزغردن زغرودة يقطعها صوت البكاء)

حمدي : (لمجموعة النسوة) تترد لكم في الأفراح .. عقبال ما نعيظ
في فرح أبلك يا أم شريف

ام شريف : عقبال ما نقلبها مندبة في يوم ماربنا يرزقك بالخلفة يا
حبيبى

حازم : (لحمدي) قوم بقى عشان تقعد جنب عروستك

حمدي : (وهو ينظر متحسراً نحو المقعد الشاغر المجاور لمقعد
هند) بلاش يا حازم .. بقول لك متشائم .. عارف يعنى أيه
متشائم .. مت

حازم : (يصرخ فيه مقاطعا) متشائم يا حازم متشائم .. خلاص
عرفت .. (وهو يسحبه ويدفعه من ظهره نحو مقعده بجوار
هند) غور بقى اقعد جنب عروستك
(ينظر نحو هند مشفقاً)

همدى : خايف أعديها يا حازم
حازم : سيبك من الجهل ده بقى .. ما أنا قولت لك على السبب

الحقيقى للمرض .. وبعدين انتا بعد شوية هتدخل عليها .. يعنى لو
الوساوس الفارغة دى ليها اعتبار .. الى مش هيحصل
دلوقت هيحصل بعدين

همدى : حتى موضوع بعدين ده أنا بقيت مش ضامنه

حازم : (مصعوقاً) معقول .. بعد الحب الى حبيتهولها ده كله

همدى : الحب موجود لكن الرغبة مش موجودة .. يا حازم أنا من
ساعة ما اتصبت ببلوة العياط دى وأنا حاسس ان أنا مش
أنا .. على طول زورى ناشف ومدروخ ونفسى مقطوع
وأعصابى ساية .. ده غير الشحفة والنهضة من طول العياط
فرهدتنى .. انتا متخيل جاحات زى دى .. فى حالة زى دى

.. ممكن تؤدي لنتائج شكلها ايه

(يتلفت حازم حوله وهو يمد يده في جيبه ويخرج ورقة
سيلوفان ملفوفة على شريء بصجم حبة العدس، ثم يقول وهو
يمدها لحمدى)

حازم : خد سنة اللحمه دى حطها تحت لسانك .. متبلعهاش ..
مصها مص .. استحلها يعنى .. وانتا هتبقى تمام وزى
الحديد

حمدى : (مرتبكاً) مخدرات ؟!!

حازم : ومش أى مخدرات .. دى مخدرات ضانى .. من اخر
خروف جه تهريب من ليبيا

حمدى : (بعدها وضعها في فمه) على الله تجيب نتيجة .. بدل شوربة
كوارع الفراخ الى أمى عملتها على الغدا .. (وهو يحرك
قطعة اللحم تحت لسانه) .. ومن عند مين .. من عند الحاج
عطية اجدع تاجر ريش فراخ فى المنطقة .. يعنى مش من عند
أى ريشارجى .. قالت لى نفس الكلام الى انتا قولته وهى
بتسقيها .. لكن الظاهر ان حالتى بقت مستعصية .. ومن
ساعة ما كلتها .. مش حاسس بحاجة غير انى متشائم ..

عارف يعنى أيه متشائم .. م

حازم : (يقاطعه مصعوقاً) يعنى انتا عايز تفهمنى ان كوارع الفراخ
مجبش نتيجة معاك

همدى : (بيأس وحزن) شوفت المصيبة اللى اخوك فيها .. مع انى
مصمست رجل فرخة بالكامل .. اه والمصحف يا حازم ..
رجل فرخة من بابيه .. عشان كده بقيت حاسس ان مفيش
حاجة هتجيب نتيجة معايا .. حتى لو ادونى حقنة سمن
بلدى .. هفضل زى ما أنا

حازم : (وهو يربت فوق كتف حمدي مشفقاً) لا أطمئن .. سنة اللحمية
دى هتعمل معاك الصبح .. روح بقى عشان تقعد جنب
عروستك وسلمها لله

(ينهض حمدي، وبهم بالتحرّك نحو مقعده ، لكنّ دخول
«الروباشري» والراقصة وأعضاء الفرقة الموسيقية وعطية
الريشارجي - (نلاحظ أن جميعهم سيكون ما عدا عطية) -
يجعله يتوقف ليقول لحازم بسعادة)

همدى : الليلة شكلها هتسخن يا حزوم .. يا ريتنا كنا افكرنا ورك

فرخة .. اهو الحاج عطية بذات نفسه جه .. بس تصدق .. الواجل ده
أصيل .. من يوم ما أبويا نقط في فرح ابنه بصباغ موز وهو
مبيفوتش واجب عندنا .. في كل مناسبة لازم يجى ويعمل
الصح

النوباتشى : سمع هس ..

(يلتفت المدعون نحو «النوباتشى»)

النوباتشى : أحلى تحية من المعلم عطية يعنى الدسم كله .. و
البهاريز كلها .. أحلى سلام يا جدع للمعلم عطية ملك
الريش ورجول الفراخ وكل مشتقات البروتين الحيوانى

(تشارك الفرقة الموسيقية بالعزف فنسمع إيقاع صاخب ،ثم
نرى الراقصة وهي تمسح دموعها بكفيها وتسحب نفساً
عميقاً قبل أن تدخل في وصلة رقص بمشاركة عدد من
النسوة والفتيات بينما يكتفيا الرجال «بالحملقة» .. حتى
يرتفع صوت عطية وهو يتحرك ناحية الراقصة)

عطية : سمع هس .. أحلى مسا وتحية منى للعريس .. وأبو العريس

واللى جابت العريس .. أحلى مسا وتحية على حبيبي الاستاذ فؤاد ..
ولما اقول الاستاذ فؤاد .. يعنى الواجب كله والذوق
والمفهومية

(يلتفتُ فؤاد نحو حمدي ويرمقه بنظرة مزدرية ثم يقول
بذهو)

فؤاد : شايف يا معضن .. جدعنة أبوك وواجباته هى الى عاملة لك
قيمة وسط الناس

حمدي : (وهو يشيخُ بيده مستخفا) يا عم بطل تقطيم بقى .. ده ما
كنش صباع موز

عطية : (وهو يمد يده في جيب الجلاب) ودى تحيتى للعريس وأبو
العريس واللى جابت العريس

حمدي : (وهو يشيخ بغضب نحو عطية) يا عم خلصنا بقى .. انت
بتنقط ولا بتشتم

عطية : (وهو يخرج من جيبيه حفنة ريش) خمسين ريشة هنا وشفا على
قلب العريس ورقصنى يا جدع

(ينثر عطية حفنة الريش فوق رأس الراقصة ثم يشاركها مع
فؤاد في وصلة رقص .. ينهض حمدي ويهيمُ بمشاركة الراقصة

بالرقصة لكن فؤاد يمنعه ويدفعه بقوة ناحية مقعدة بجوار
هند .. ثم فجأة .. يدخل من الكالوس الأيمن ضابط شرطة
مع عدد من المخبرين .. يتوقف أعضاء الفرقة عن العزف ..
ترتبك الراقصة وتراجع لتختبئ خلف النسوة .. بينما يبدو
على عطية الارتباك البالغ)

فؤاد : (وهو يتقدّم نحو الضابط) فيه ايه يا فندم

(يتحرّك الضابط نحو عطية ويمسك به وهو يقول)

الضابط : مش قولت لك هتشرفنا قريب

(يستسلم عطية بينما يعيد فؤاد الكرة وهو يشير نحو عطية)

فؤاد : يا فندم ده ضيفى

الضابط : طالما ضيفك يبقى تشرفنا معاه عشان نضايحكم سوا

فؤاد : (متراجعا) ولا اعرفه يا فندم

حمدي : (وهو ينهض محتدا من فوق مقعده) لا بقى .. أنا العريس ..

وده فرحى .. يعنى من حقى افهم فيه أيه

الضابط : (وهو يشير نحو عطية) البيه عليه كذا حكم مقفول فى قضية

غش فى بروتين حيوانى

حمدى : يعنى أيه غش فى بروتين حيوانى .. يكونش بيحقن رجلين
الفراخ بالبوتكس عشان تلاحظ وتوزن معاه

الضابط : لا .. (وهو يرمى عطية بنظرة غضب) الموضوع أخطر من
كده بكثير

عطية : (بذل وتوسل) يا باشا هو انا كنت مربيها فى عشة امى .. ما
المستورد عندكم .. ولا هو عشان بيدفع مرتبات شهرية كبد
وقوانص لرجال تقال فى الدولة .. هتطمخوا عليه وتيجوا
على غلبان زى حالاتى

حمدى : (يتجهّم وجهه وهو يتحسّس بطنه) دا الموضوع شكله خطير
بجد (وهو يقترب من الضابط) يا فندم فهمنى .. أنا اخر
حاجة دخلت معدتى رجل كاملة من رجلين فراخه .. عرفنى
يا فندم انا طفحت أيه عشان حالتى النفسية متدهورش اكثر
من كده

الضابط : وانت بتاكل ملاحظتش حاجة

حمدى : وألاحظ إزاي يا فندم وأنا متربى تربية محافظة ومتعودتش
أبص حتى على رجلين الفراخ

الضابط : ملاحظتش ان حجم الضوافر فى رجل الفرخة كان أطول
من اللازم (وهو يشني سبابة يده اليمنى أمام وجه حمدي)
ومتنى أكثر من اللازم

حمدي : (وهو يمعن متفكرا) على ما وصلتنى مكشش ليها ضوافر ..
(وهو يشير نحو والدته) أصل أمى على ما بتسويها بتكون
كلت ضوافرها

الضابط : (وهو يدفع عطية من ظهره بين زوج المخبرين) عموما الى
انتا كلتها مكاتتش رجل فرخة

حمدي : (وهو يمسك ببطنه متألما) كانت رجل بنى ادم يعنى ..
(متذكرا) بس يا فندم .. دا كان لها أربع صوابع مش خمسة

الضابط : مهو أبو قردان برضوله أربع صوابع .. والبومة كمان لها
أربع صوابع .. والغ

حمدي : الغراب .. هو الغراب (يلتفت نحو حازم ويقول بعصية)
عشان لما أقول لك متشائم يا حازم متشائم تبقى تصدقنى

(يخرج الضابط مع عطية والمخبرين بينما يتحسس حمدي
بطنه متألما .. ثم يشير نحو هند ويقول صارخا)

حمدي : انتى استحلتي القعدة .. (وهو يشير نحو الباب المؤدي إلى
الجزء الأيسر من المسرح) قومى عشان نلحق ندخل قبل ما
أجيب اللى فى بطنى

(يظلم الجزء الأيمن من المسرح في نفس توقيت إضاءة
الجزء الأيسر لنكتشف أنه يحتوي على غرفة نوم حمدي ..
بينما نسمع صوت إيقاع الزفة .. مع أصوات زغاريد نسوة
يقطعها صوت بكاء .. يفتح باب الجزء الأيسر .. وتدخل
هند .. ومن خلفها حمدي .. الذي نلاحظ أنه مازال يتحسس
بطنه مُتألماً.. بينما ينقبضُ ويتنفخ صدره كالبالون مع اهتزاز
رأسه نتيجة لتهنئته وتقطع أنفاسه من شدة البكاء المتواصل
.. يتجه نحو السرير ويجلس عليه وهو يقول بنبرة حزينة
مصدومة

حمدي : يعنى يا رب حتى الكوارع اللى اكلها فى ليلة زى دى تطلع
مغشوشة

هند : (وهي تتأمله بغضب) ايه ده .. أنتا هتقعد

حمدي : تعبان يا هند .. العياط هادد حيل ومخلينى مش قادر اصلب

هند : فی لیلۂ زی دی

حمدی : آیوه .. وادعی ربنا انها تبقى اخر لیلۂ

هند : (تصرخ فيه) أنتا بتقول ایه .. لا .. أسمع .. اذا كنت فاکر هند
قبل الجواز زی هند بعد الجواز تبقى غلطان .. (تصرخ فيه
صرخة أشد) ده مش وقت عياط وهدة حیل

حمدی : (وهو يبكي) عارف .. وربنا عارف .. بس أعمل ایه

هند : تقف وتقوم من ع السریر ..

حمدی : یعنی انتی فاکرة ان ده حل .. والنعمة (وهو يبكي) والنعمة
لو مت وصحیت تانی ما فيه حاجة هتتغير (وهو يبكي
بحرقة) اسکتی یا اختی اسکتی .. انتی مش دریانة بحاجة

(تأمله هند برهة بتعبيرات وجه محتد .. بعدها تتراجع حدة
تعبيرات وجهها حتی تصل إلى درجة الاشفاق وهي تقترب
منه وتقول بنبرة خافتة حانية)

هند : حبیبی .. أنا عایزاک تقوم عشان أنا الی أقعد ع السریر ..
وأعمل مکسوفة وانتا تیجی ت....

حمدی : مش جای .. لو قعدتی ع السریر وعملتی مکسوفة خمستاشر

سنة أنا لا هاجى ولا هروح .. تعبان .. (وهو ييكي) بقول لك تعبان
هند : (تعود إلى نبرتها الحادة) يعنى خلاص .. مبقاش منك رجا ..
امال اتجوزتنى ليه

همدى : هو أنا بس الى اتجوزتك .. ما انتى كم.....

هند : (تقاطعها مصعوقة) نهارك أسود .. انتا بتقول ايه

همدى : بقول ان مش أنا بس الى اتجوزتك .. انتى كمان
اتجوزتينى .. يعنى متقعديش من أولها تقطمينى وتقوليلى
اتجوزتنى ليه اتجوزتنى ليه .. لان انتى كمان ليكى دور فى
الورطة الى احنا فيها دلوقت

هند : ورطة ؟! بتسمى جوازك منى ورطة

همدى : أيوة .. ولو كنتى فى موقفى وحاسة بلى انا حاسس بيه
هتسميها كارثة .. هتسميها مصيبة

(تتمالك نفسها وهي تتأملها بالنظرة المشفقة نفسها .. ثم
تعود لنفس النبرة الحانية)

هند : لا يا حبيبي .. لا ورطة ولا كارثة ولا مصيبة

حمدي : ماشى .. طالما التلاتة مش عاجبيننا(وهو ييكى)نسميها محنة

هند : (وهي تضحك في محاولة لمداعبته وتلطيف جو الحوار)

طيب لو جه ولد نسميه ايه ؟

حمدي : (وهو ييكى بشدة) نسميه خازوق

هند : (تربت على كتفه) اهدا .. اهدا .. هى محنة زى ما انتا قولت

.. وعشان انا مراتك .. وعشان بحبك .. وواثقة من انك

بتحبنى .. (وهي تميل عليه وتمسح بيدها فوق رأسه) هقف

جنبك لغاية ما نخرج منها

حمدي : (منكسراً) ماشى .. براحتك .. بس ما تبقيش ترعلى منى لما

تعبك كله يرسى على مفيش

هند : حاضر .. الى تشوفه .. (وهي تهبط بيديها على ربطة عنقه

وتهم بفكها) حاضر يا جوزى

حمدي : (وهو يمسك بيديها) انتى هتعملى ايه

هند : هقلعك هدومك

حمدي : (ينظر نحوها مصدوما .. وينفجر باكياً ثم يقول بحسرة) بقى

انتى .. انتى الى هتقلعيني .. وفي ليلة زى دى

هند : مش مهم يا حبيبي .. احنا الاتنين اتجوزنا وبقينا واحد ..
يعنى مش هتفرق مين فينا الى يقلع التانى .. (بحركة عصبية
تنزع رباط العنق وتلقي به فوق السرير.. ثم تقول بنبرة
مهمومة) المهم ان حد فينا يقلع فى الليلة السوداء دى (تمد
يدها وتتحسس شعر رأسه) حاسس بايه دلوقت .. يا حبيبي
.. يا قلبي .. يا ننى عين روى من جوا

همدى : حاسس انى قلعت الكرافت

هند : بس

همدى : اه وربنا بس .. وأنا هخبى عنك ليه

(تغالب شعورها بالاحباط وهي تتحسس كتفيه من فوق
الجاكت ثم تبدأ بفك أزراره مع القميص وهي تقول بنبرة
متهدجة)

هند : متأكد

همدى : متأكد جدا

(تخلع عنه الجاكت والقميص وتلقي بهما فوق الكرافت)

هند : طب وكده

حمدي : لا .. كده الوضع مختلف .. كده انا بقيت حاسس .. حاسس

هند : بايه .. حاسس بابيه

حمدي : (وهو يضم يديه على كتفيه) حاسس بالبرد

هند : (تشعر بالصدمة فتقول بعصبية) مش معقول يا حمدي .. مش

هينفع كده .. لازم تتفاعل معايا

حمدي : ما أنا متفاعل اهوه .. وساييك تقلعي فيا زي ما انتي عايزة

هند : (بحدة) سايبني !! .. هو انتا عرفت تقلعني وأنا قولت لأ

حمدي : لأ

هند : يبقى تسكت .. تستسلم للأمر الواقع ومتضيعش وقت

حمدي : حاضر .. أنا عن نفسي مش فارقة معايا .. أنا عامل على

تعبك انتي

هند : (تصرخ فيه) ملكش دعوة بتعبي .. انتي تسيبني تعامل

بطريقتي

حمدي : حاضر .. اللى تشوفيه .. اعملى اللى انتي عايزاه .. بس

صدقيني .. كل تعبك هيرسى على مفيش

هند : انت مش لسه قايل انك بردان

حمدي : أيوه

هند : (وهي تميل على ملابسها فوق السرير وتنحيتها جانبا) يبقى
سيبني أدفيك

حمدي : هتلبسيني هدومي تاني ؟!! (بعصبية) امال كنتي بتقلعين لي

هند : أنا بشيلهم عشان اعرف اقعد جنبك .. بعدين انا مش زوجه
خايفة عشان لما جوزي يبرد أدفيه بهدومه

حمدي : (بيكي) يبقى نويتى تولعى فيا

هند : (بدلال ورومانسية) أيوه هولع فيك

حمدي : عندك حق .. (بنبرة متأثرة) .. أنا خلاص حياتي بقت زى قلتها

.. حيث كده .. (وهو ينهض) يبقى بيدى لا بيد هند .. سيبيني

يا بنت الناس اولع فى نفسى بنفسى .. انتى ملكيش ذنب ..

كفاية الى حصل لك .. بختك يميل وكمان تلبسى جريمة

هند : (وهي تمسك بيده) هولع فيك من غير ما أمسك كبريت ولا

ادلقي بنزين

حمدى : تبقى هتكرى عليا حد يولع فيا .. وده برضو ما يرضينيش ..

لانه لو اتقفش هيرشد عنك

هند : (بضيق) حاول تخرج من الحالة دى .. افهم قصدى من الكلام .. اهدى وركز معايا .. مفيش داعى لحالتك دى

حمدى : مفيش داعى ازاي .. انا مش هقدر اعيش قلقان عليكى بعد ما اموت محروق

هند : افهمنى .. أنا هدفك وهولع فيك من غير ما شرارة تلسعك

حمدى : هتخطينى فى المكرويف يعنى .. بس تفتكرى هنلاقى مكرويف مقاسى

هند : (بعصبية ونفاد صبر) من غير مكرويف ولا فرن ولا هباب أزرق

حمدى : ازاي يعنى

هند : ببوسة

حمدى : بوسة؟! هتكرى عليا حد يبوسنى

هند : (تصرخ فيه) حمدى

حمدى : نعم

هند : فاكّر لما كنا مخطوبين

حمدى : فاكّر طبعاً

هند : فاكّر خدت منى كام قلم فى كل مرة كنت بتحاول فيها تبوسنى

حمدى : مش فاكّر طبعاً .. لانى بطلت اعد بعد خامس سنة من

خطوبتنا .. لكن بالويم .. ممكن يكونوا

هند : مش مهم الرقم .. المهم ان انا دلوقت بقيت مراتك .. يعنى

بقى من حقك تبوسنى من غير ما اقول لك بم

حمدى : (تتشى تعبيرات وجهه) يعنى أبوس وأنا مطمئن لانك مش

هتضربينى بالقلم

هند : أكيد

حمدى : (وهو يقترب منها) وبوسة طوييسيسيسيلة

هند : أيوه يا حبيبى .. طوييسيسيسيلة

حمدى : زى بوسة عبد الحليم حافظ لنادية لطفى فلا فيلم أبى فوق

هند : أيوه

حمدي : (تكتسي تعبيرات وجهه بالضيق) بس بوسة زى دى محتاجة
لنفس طويييييييل .. (ينهذه فتزداد أنفاسه تقطعاً) اجيب

لبوسة زى دى نفس منين دلوقتى

هند : نحاول

حمدي : صعب .. صعب يا هند .. أنا نفسى مكروش من كتر العياط

هند : مع التكرار ممكن نوصل

حمدي : أشك .. أشك يا هند

هند : مش هنخسر حاجة لو جربنا

حمدي : طب لو طلعت بوسة مقطوعة .. مكتومة .. زى بوسة أحمد

مظهر لفاتن حمامة فى فيلم دعاء الغراب .. قصدى دعاء
الكروان

هند : (بعصبية) يا اخى ان شالله تطلع زى بوسة نور الشريف لعبلة
كامل فى مسلسل لن أعيش فى جلباب أبى .. خلصنى .. انهى
بقى فى ليلتك دى .. لان انا خلاص اتخنقت وجبت اخرى

حمدي : (مرتبكا وهو يقرب وجهه منها) طيب .. طيب

هند : (تصرخ فيه) يلا يلا

حمدي : طب استنى لما اخد نفس جامد

(يسحب شهيقاً طويلاً.. ثم يقرب وجهه منها وهو يكتم
نهفته بصورة تجعل نصفه الأعلى يتشنج .. فينفجر باكياً قبل
ان تتلامس شفثيهما)

هند : (مصعوقة وهي تتأمله) معقول .. معقول يا حمدي .. حتى دى
مبقتش قادر عليها

حمدي : (بكبرياء وتحدي) لا طبعا مش معقول .. مستحيل انده
يكون معقول .. يلا نحاول تانى

هند : (بمرارة) نحاول تانى .. شايفان حاجة زى دى محتاجة
محاولات

حمدي : أيوه .. (متوسلاً) عشان خاطرى أيوه

هند : طيب واذا فشلنا

حمدي : يكفيننا شرف المحاولة

هند : (تلطم على وجهها) شرف المحاولة .. (تدمع عيناها) ليه ..

هو أنا طلبت منك تشارك في تصفيات كأس الأمم الأفريقية (تبكي)
شرف المحاولة .. دى بوسة

حمدى : (يصرخ فيها) لا يا هند .. لا .. أوعى تبكى

هند : حته بوسة .. (تبكي) فتفوتة بوسة

حمدى : (وهو يبكي) قولت لك ما تبكيش

هند : حتى البوسة يا حمدى (تبكي)

حمدى : (وهو يوغل في البكاء) أرجوكى بطلى بكا .. متبكيش يا هند
.. أرجوكى ما تبكيش

هند : حتى البوسة مش قادر عليها

حمدى : هقدر .. عشانك هقدر على اى حاجة .. بس انتى تبطلى تبكى
(يبكي) بس انتى متبكيش (يبكي بشدة) متبكيش يا هند ويلا
نحاول

هند : مش قادرة .. مش قادرة يا حمدى

حمدى : أنا هخليكى تقدرى .. (وهو يبكي) بس متبكيش .. (يبكي)

حمدي) عشان خاطرى ما تبكيش

هند : مش قادرة يا حمدي صدقنى .. (تبكي هند) صدقنى بقيت
حاسة .. أنى مش قادرة أعمل حاجة .. غير انى أبكى (تبكي
هند .. تبكي بشدة وهي تنهار ساقطة على الأرض)

حمدي : (يلحق بها ويمسك بيدها ويحاول رفعها) أرجوكى
ما تقوليش كده .. ما تقوليش الكلام ده (يبكي حمدي)

هند : للأسف دى الحقيقة .. (وهي تسحب يدها من يده) دى
الحقيقة يا حمدي (تبكي هند)

حمدي : ملعون أبو الحقيقة .. ملعونة كل الحقايق اللى بالبشاعة
دى ..

(يبكي حمدي وهو ينهار ساقطاً بجوار هند .. بينما تدخل
موسيقى مناسبة في نفس توقيت إظلام الجزء الأيمن من
المسرح .. فيصبح المسرح مظلماً بشكل كامل .. مع
الموسيقى نسمع صوت بكائهما .. ثم من خلال إضاءة
مركزة تكشف جسديهما فقط .. نلاحظ تبادلهما لنظرة
تحدي وإصرار .. بعدها في نفس اللحظة يقف كلا منهما

على ركبتيه ويتواجهان .. وفي نفس اللحظة يتوقفان عن
البكاء .. في نفس اللحظة يكتمان أنفاسهما .. في نفس
اللحظة يتقارب وجهيهما .. لكن قبل ان تلتقي الشفاه ..
يجهشان بالبكاء .. ويعودان للسقوط على الأرض .

إِظْلَام

المشهد الثانى القهو خانة

مذياع المقهى مفتوح على قناة تذيع برنامج لتعليم الطهي،
حالة البكاء المتواصل قد شملت كل المجموعة..
وهم يحدّقون بشغف وتركيز في المذياع (كأنهم
يشاهدون تلفاز) مثل حفنة مراقبين يتابعون فيلماً
إباحياً ساخناً.. خاصة علي الذي اقترب منه رضا)
رضا : شمر ذراعك يا عم علي عشان تاخذ حقنة الشاى الى
طلبتها

الشيخ شرفنطح : مشكلة كبيرة بتقع فيها ست البيت لما
بتيجى تعمل صينية قشر البطاطس بزعانف السمك
(الذي ضايقه عدم انتباه علي لوجوده فحال بجسده
بينه وبين المذياع وهو يقول بعصية)

رضا : قولت شمر ذراعك يا عم علي (ثم بعصية ونفا

د صبر) بعدين مش كل مرة هتطلع ربع ساعة على ماتشمر
دراعاك (يلتفت مخاطبا مجموعة الزبائن)

بعد كده الى عايز طلب يفك زورار قميصه ويشمر دراعه
قبل ما يطلب الطلب يا اسطوات

علي : وهو يحملق في المذياع .. سك ع المطلوب يا رضا .. لاني
جوعت خلاص

الشيف شرفنطح : جاتنا رسايل كتير بتقول ليه سوا الزعانف
مبيقاش مضبوط .. (بنبرة العليم بيواطن الأمور) وانا هقول
لحضراتكم ليه

رضا : (وهو يشير نحو المذياع) قطعة تقطع شرفنطح والى جابت
شرفنطح قادر يا كريم

الشيف شرفنطح : (بغضب) ان شاء الله انتا والى جابتك يا قهوجى يا
حقير (ينظر رضا نحو شاشة المذياع مستغرباً .. بينما يعود
شرفنطح لنبرة الخبير) لازم كل ستات البيوت ياخدوا بالهم
من حاجة مهمة .. وهى ان الزعانف الى بنستوردها بتبقى
مقسومة لحاجتين ..

(نلاحظ دخول حمدي من الكالوس الأيسر وهو يجز أقدامه

من شدة تهالكه وشعوره بالإعياء .. يتأمله رضا وهو يقول (

رضا : العريس وصل يا رجالة .. وبيجر جر في رجليه ومفرهد زى
ما يكون فتح عكا ورجع

حمدي : (باكياً) اهو عين أمك الوحشة دى الى جابتنى الأرض

الشف شرفنطح : الاولانية هى الزعانف نفسها .. الى بتبقى فى
جناب السمكة وضهرها .. ودى مش بتاخذ سوا كتير ..
والحاجة الثانية هى ديول السمك ..

(يسحب حمدي مقعداً ويتتحي جانباً .. وهو يشير نحو ظهور
المجموعة الملتفة حول المذياع

حمدي : هو فيه ماتش النهاردة

رضا : (هامساً) ده الشيف زفت الى ربنا ابتلانا بيه عشان نتحسر
على عيشتنا ..

حمدي : (ساخراً وهو ينظر نحو ظهور المجموعة) قال يعنى فى

بيوتهم حاجة تتطبخ .. صحيح .. عالم جعانين ويحلما
بسوق العيش (وهو ينهض ويتجه بمقعده نحو علي) هات لى

حقنة ليمون بالنعناع جنب عم علي

الشيخ شرفنطح : ولان الدليل يبقى أكبر من الزعانف في الحجم
وأنسجته متماسكة عنها .. ياخذ سوا أكثر .. عشان كده
لازم تقسمي ديل السمكة لنصين .. قبل ما تحطيه في التتبيلة
.. عشان ميتأخرش عن سوا الزعانف .. ومعانا اتصال ..
مدام أمل .. نقول ألو

متصلة (1): معاك أمل من قشر السويس ..

الشيخ شرفنطح : تقصدي حضرتك من جسر السويس

متصلة (1): أسفة يا شيخ .. أعذرني لانى قايمة نايمة بحلم بطريقة
بفتيك قشر البطيخ

حمدي : (معلقاً) قشر .. قشر .. قشر .. كل حاجة بقت قشر .. حتى
احنا .. بقينا قشر بنى ادمين

علي : (صارخا في حمدي) .. اقفل بقك .. يا تقوم من جبنى خالص
.. (وهو يشير نحو المذيع) عايزين نتفرج

حمدي : (يشيح لعللي بغضب) طيب يا عم .. انفرج يا حلو .. (وهو
ينهض ساجباً مقعده) الى يشوف حمقتك دى يفتكر ان
ولادك وأحفادك بيتز حلقوا على بلاط الشقة من كتر قشر

البطيخ المترمى ع الأرض .. (وهو يعود إلى مكانه الأول) جاتكم
الفقر ..

الشيخ شرفنطح : تقدرى حضرتك تتفرجى على حلقة الخميس الى
فات على اليوتيوب .. والى شرحنا فيها طرق عمل بفتيك
قشر البطيخ وفيليه قشر الرومان وهتلاقى كمان فى نفس
الحلقة طريقة جميلة جدا لعمل المربى من قشر الموز

وقوالح الدرہ الشامى .. معانا اتصال تانى .. مدام انجلينا .. حرم
سفير بريطانيا فى مصر .. اهلا بحضرتك

متصلة (2): موس أرفه أبر أن إيجابى بهضرتك وبالاطباك الى
بتقدمهنا

الشيخ شرفنطح : ده شرف ليا يا حرم معالى السفير .. تؤمرينى
حضرتك

متصلة (2): مدمس نوى البله سيف سرفلطح

الشيخ شرفنطح : شرفنطح معاليكى .. بعدين الى فى مقام حضرتك
يقول الى يقوله .. كملى حضرتك مدمس نوى البلح .. ماله
يا فندم

متصلة (2) : جوزى بيهبه جدا ولانى بهاف اليه من أكل السارع بهاول
أأملهوله فى البيت .. لكنه موس بيقيفى The same quality

الشيخ شرفنطح : بتنقى نوى البلح قد ايه يا مدام سحر

متصلة (2) : أنقعه : What I do not understand what you meaning of

الشيخ شرفنطح : يعنى تحطيه فى ميه يا مدام سحر

متصلة (2) : Sure انا بهطه فى ميه بأدبن بهطه ألى النار

الشيخ شرفنطح : لا يا مدام سحر .. تحطيه فى المية وتسييه منقوع
فيها سنة ميلادية على الاقل .. بعدين تسوية على نار هادية ..
وصدقنى .. لو ربنا أدى معالى السفير العمر وكل منه
هيعجبه جدا .. شكرا مدام انجلينا .. ودلوقت نطلع فاصل
اخبارى .. بعده نكمل موضوع حلقنا .. وهو طريقة عمل
عجينة الطعمية من قشر الفول السودانى .. استنونا ..
ومتروحوش فى أى حلة .. لان مع الشيخ شرفنطح .. مش
هتقدر تقفل بقك

على : (يبتلع ريقه وهو يشيح بوجهه عن المذيع) جريت ريقنا يا
ابن الحرام

حمدي : هو انتا ريقك فيه حيل يجرى .. بقى تبخ فيا بخة زى دى يا
راجل يا كركوب .. وعشان مين .. عشان واحد أسمه
شرفنطح

على : (وهو يسحب مقعدة ويسير نحو حمدي) معلش يا حمدي يا
ابنى .. الجلالة خدتنى .. كنت سخنان حبتين من اصناف
الاكل الى بيعملها المدعوق ده .. المهم .. انت ايه منزلك ع
القهوة .. فيه عريس يسيب مراته فى يوم صباحيته

(مع سماعنا لصوت موسيقى النشرة من المذيع، ينظر حمدي نحو
علي محرجا ،نشعر بأنه يقاوم رغبة تدفعه إلى الحديث ، لكنه
يتمالك نفسه ويتهرب من الاجابة)

حمدي : استنى يا عم على لما نشوف أخبار الدنيا شكلها ايه

(((((الجزء بتاع النشرة يتراجع يا استاذة قمر))))))

المذيع :على خلفية قرار الحكومة برفع أسعار السلع الأساسية ،
جاءنا البيان التالي

.. أعلن مصدر مسؤول بوزارة الصحة .. أن ما يعرف
بظاهرة البكاء الهستيرى والتي ادعت ثلة مغرضة من عناصر

هدامة الإصابة بها ،ليست إلا محاولة مبتذلة لدغدغة مشاعر
الرأي العام والتأثير على المواطنين الشرفاء .. به دف إجبار
الحكومة على التراجع عن قرارها الأخير برفع الأسعار

كما صرح مصدر مسؤول بوزارة الداخلية ،بأن عيون رجال
الأمن الساهرة .. (ترتفع نبرة صوته بالتهديد) سوف ترصد
أية محاولة للبكاء الجماعي الهدام .. و أن اي مواطن
سيضبط متلبساً بحالة بكاء أو شحفتة أو نههة .. أو يضبط
حاملاً لأي مواد محظورة .. كالمناديل القماش أو الورق ،

بين قوسين (الكليנקس) ، سوف يكون عرضة لتوقيع
العقاب القانوني المقرر على مثل هذه الأفعال الهدامة

(يلتقط أنفاسه) ننتقل إلى الشأن العربي وهذا الخبر من العراق ..
أعلن المتحدث الرسمي باسم البيت الأبيض ،أن أعمال
العنف الدائرة بالعراق والتي راح ضحيتها قرابة السبع
وثلاثون مليون مواطن عراقي ،لن تنال من الوغبة الحثيثة
للولايات المتحدة الأمريكية و المجتمع الدولي الحر في
تحقيق السلام والأمن لشعب العراق.

(يصمت برهة يعود بعدها صوته)

المذيع : عودة الى أرض الوطن وهذا الخبر الفنى ، صرح المطرب الشعبي صفر محرم رجب رمضان شعبان عبد الكريم ، بأنه على وشك الانتهاء من البوم هالجدید والذي يحمل أسم .. أنا بكره نفسي

في الختام إليكم أسعار الماء العذب في الأسواق العالمية ، برمیل ماء منخفض التلوث الف دولاراً للبرمیل ، برمیل ماء شديد التلوث ثمانمائة وخمسون دولاراً للبرمیل ، برمیل ماء غير صالح للشرب خمسمائة وسبع وثلاثون دولاراً للبرمیل .. وإلى هنا تنتهي أخبار الموجز والى أن نلتقي .. لكم تحيات فريق الإعداد .. و تحياتي .. أنا .. وليد هيثم حمادة وائل تامر أمين كمونى .. تصبحون على خير .

(بنبرة يائسة مصدومة)

حمدي : يعنى حتى العياط حرموه على الناس على : انت لسه فاكّر .. دى اخبار بايئة يا ابنى .. دا زوار الفجر جم الاسبوع الى فات قبضوا على عرفة بتاع المكرونة ومن ساعتها محدش عارف له طريق جرة

حمدي : وعرفه يتقبض عليه ليه .. داراجل طيب وبتاع ربنا
علي : (يتلفت حوله ثم يقول هامسا) ولاد الحرام شكوه كام تقرير ..
قالوا فيهم ان عنيه دايم حمره ومدمعة

حمدي : مهو من البصل اللى بيخطر فيه طول النهار عشان الصلصة
علي : (بنبرة يائسة) ومين يثبت يا ابنى .. هو نفسه طلب تحويله
للطب الشرعى لبيان سبب البكاء لكنهم رفضوا

حمدي : ربنا يفك ضيقته بقى

علي : (وهو يتفحصه بنظرة خبيثة) وضيقتك انت كمان

حمدي : (محاولا التماسك) ومين قال لك انى فى ضيقة

علي : سحتتك المتلخطة

حمدي : (بحدة) حاسب على كلامك يا عم علي

علي : يا ابنى ريحنى .. وصارحنى بالحقيقية عشان اقدر اساعدك ..
انت شكلك خدت خازوق امبارح

حمدي : (وهو ييكى) أسكت يا عم علي والنبي .. بلاش تفكرنى

علي : يا وكستك .. أوعى تقول

حمدى : أقول إيه يا عم على (بيكي) ودى حاجة تتقال
على : يا نهار أسود يا ولاد .. دا اللى يشوفك قبل الجواز كان يفتكر
عتيل وهتخر بها

حمدى : أنا فعلا خربت بها يا عم على .. مش خربت بها بس .. أنا خربت بها
(وهو بيكي) وقعدت على تلها

على : (مشفقاً) بس يا ابنى بس .. ما تقهرش نفسك .. دواك عندى
حمدى : (يمسح الدمع عن عينيه وهو يتأمل مشدوها) ب ب بجد يا
عم على

على : جد وستين جد كمان .. (بنبرة ثقة) هوانت فاكرا الكام
وسبعين سنة اللى أنا عيشتهم راحوا هدر .. دا أنا اتأسأت
فيهم خبرة .. شوفت صينية البسبوسة لما بتطلع م الفرن

موهوجة ويسقوها الشرابات

حمدى : شوفتها كتير فى الراديو

على : (بغضب) انت هتسطعبط .. من امتى الراديو بيحيب صورة

حمدى : تخيلت يا عم على .. تخيلت انى شوفتها .. زى ما انتم

بتتخلوا انكم شايفين الأكل الى ييطبخه شرفنطح

على : اه .. قول كده .. (يعود لنبرة الثقة) اهو زى البسبوسة ما
بتتسأسأ شربات .. أنا بقى اتسأسأت خبرة .. (منتشيا وهو
يضرب كتف حمدي بيده) ولحسن حظك معظم السأسأة فى
الموضوع ده

حمدي : طيب سأسأنى .. (وهو يمسك بيد علي من على كتفه
ويوسعها بالقبلات) أبوس أيدك سأسأنى يا عم على ..
سأسأنى عشان ربنا يكرمك فى ولادك واحفادك و
على : (وهو يسحب يده بقرف من بين يدي حمدي وشفتيه) خلاص
.. خلاص .. هسأسأك .. قولت خلاص .. خلاص ..
هنيلك .. (وهو يتأمل ظهر يده بغیظ) انتى بتعيط من عنيك
ولا من مناخيرك .. الله يقرفك

حمدي : طيب قول يا عم على .. طلباتك كلها أوامر

على : أول طلب تخلى رضا يجيب لى حقنة شاى بحليب عشان
الجوع قرصنى

حمدي : (يتجهم وجهه برهة بعدها يأمر رضا) حقنة شاى بحليب هنا

يا رضا .. (وهو يرمق علي بنظرة جادة) نخش في السأسأة بقى

علي : أول خطوة في السأسأة لازم تتغدى غدوة جامدة .. غدوة
تكون في الجون

حمدي : لو علي غدوة جامدة تبقى ساهلة

علي : ظروفك المادية كويسة

حمدي : (بعصية) أنتا هتجوزنى تانى يا عم علي ولا أیه

علي : يا ابني رد علي قد السؤال .. لان علي قد فلوسك هدبر لك
الغدوة اللى تناسبك

حمدي : (بحماس) في الموضوع ده كل حاجة مناسبة .. أى حاجة
مناسبة .. دوسع الاخر .. ميهمكش أى حاجة .. اطلب
الى تطلبه .. ان شالله حتى تقول لى اشترى بيضة فرخة بلدى

علي : لا لا لا .. مش للدرجة دى .. انت فى عز شبابك ومش

محتاج نتعة شديدة زى دى .. لو كنت عديت الستين كنت هقول لك
هات حاجة محملة زى دى .. لكن بالنسبة لك انتا .. (وهو
يتفحصه وكأنه يراه لأول مرة) .. انت تيجى بالبتنجان (بنبرة

تأكيد) البتنجان هيجيب معاك نتائج كويسه

حمدى : تؤمرنى (وهو ينهض من فوق مقعده) اروح اشترى كام
جرام

على : كام جرام ايه يا ابنى .. احنا هنلعب .. انتا تلزمك بتنجانة
مقفولة

حمدى : بتقول ايه ؟ (وهو ينهار جالسا على كرسية) ليه .. هو أنا هعزم
منتخب مصر يتغدى معايا

على : انت مش لسه قايل انك جاهز

حمدى : أيوه قولت بس مش للدرجة دى .. بتنجانة مقفولة ؟!!

على : أيوه مقفولة .. لازم تكون مقفولة عشان تبقى محافظة على
الدسم بتاعها .. (وهو يشمر عن ساعده) سيبك من شغل
جرام واتنين جرام ده .. انتا فى ورطة ولازم تاكل أكلة طازة
وتمرى عليك .. سامعنى .. بتنجانة كاملة وتخلي مراتك
تدبحها بأيدها

حمدى : وبعد ما تدبحها ..

(يأتي رضا ويغرس سن المحقن في ذراع علي ، فيتحسس على

مكان الحقنة ويفرد يده ويثنيها عدة مرات ثم يقول (

على : تاكل منها حتة قد ورقة الدومنة (هامساً وهو يميل على حمدي)
قبل الموضوع بساعتين

حمدي : حتة ! وقد ورقة الدومة .. كثير .. كثير يا عم علي على معدتي
.. مش هستحمل كل ده .. وهيتقل عليا واناام

على : خلاص .. يبقى استعمله كدهان

حمدي : (مصعوقاً) أدهن بتنجان

على : أيوه .. الحطة اللى قد ورقة الدومنة تحطها فى الهون وتفضل
تدق فيها لغاية ما تبقى زى المرهم .. بعدين تدهن بيها
حمدي : أدهن بيها أيه

(يقرب على فمه من أذنه ويهمس له بكلمة، يتجهم بعدها
وجهه ويبيكي بحرقة)

حمدي : هى حصلت .. أنا .. وبتنجان

(يدخل حازم ،يلقي نظرة على المقهى وعندما يكتشف
وجود حمدي يقترب منه وهو واجم)

حازم : معقول ده .. انت تعمل فى هند كده .. وكمات تسيبها

لوحدها وتنزل الشارع .. (يصدم عندما يراه باكيا) وبتبكي
كمان .. ازاي .. فهمنى ازاي .. (اجهاش حمدي بالبكاء مرة
أخرى يثيرة أكثر .. فيعيدها بصوت أكثر ارتفاعا) ازاي ..
ازاي يا حمدي .. لو جوازك من هند ما يعالجكش .. ايه
هيعالجك .. لو تحقيق حلم عمرك ما يعالجكش .. ايه
هيعالجك .. لو الحب ما يعالجكش ايه هيعالجك .. ليه يا
حمدي .. ليه

حمدي : (وهو يشير لعللي) قول له ليه يا عم يا بتاع السأسة انتا .. فهمه

على : (وهو ينهض) وانا مالي .. هتدخلوني ليه في مشاكلكم ..
بعدين الفاصل بتاع برنامج الشيف شرفنطح خلص .

حمدي : بقى كده .. بعد ما طفحت حقنة الشاي بحليب .. الالهى
تبزعها .. الالهى اشوفك بتتسأسأ فى نار جهنم يا بعيد

حازم : (وهو يجلس على مقعد عم علي) وعم على ماله .. انا صاحبي
انت .. الى وعدنى انت .. الى وثقت فيه انت .. الى صدقته
انت .. الى كنت فاكهه راجل انت

حمدي : (محتدا) يا حازم ما تغلطش .. انا مكذبتش عليك لما قولت
لك ان جوازي من هند هيعالجنى ..

حازم : (صارخا فيه) وادينى جوزتهالك .. اتحديت عمى وعيلتى

وجوزتهالك .. والنتيجة ايه .. محافظتش عليها .. وبدل ما
هى الى تطلعك من الدوامة الوسخة دى .. انت غرقته فيها

حمدى : غصب عنى يا حازم والله .. غصب عنى يا صاحبي

حازم : بعد جوازك من هند مبقاش ليك اعذار عندى

حمدى : يا حازم افهمى .. أنا .. (يجهش بالبكاء)

حازم : أنت أيه

حمدى : أنا فشلت مع هند .. أنا .. (يبكي)

حازم : (مصعوقا وهو يتأمل حمدى) تقصد ؟!

(يهز حمدى رأسه بالموافقة وهو يبكي)

حازم : ازاي .. يعنى تقصد محصلش حاجة

حمدى : أيوه .. نهائي .. نهائي يا حازم نهائي .. حتى البوسة معرفتش

ابوسها لها .. تصدق .. أنا .. (يقولها بزهو وكبرياء) أنا ..

حمدى .. الى انت والناس كلها عارفينه .. أفشل .. وفى أيه ..

فى بوسة

حازم : (مصدوما) انت بتقول أيه .. للدرجة دى .. (وكأنه تذكر

شيئا) هو انت مش حطيت حته اللحمه الى أنا اديتها لك تحت

لسانك زى ما قولت لك

حمدي : وأيه دخل لسانى فى الموضوع .. هو أنا بقول لك معرفتش

أبوسها (وهو ييكى) ولا معرفتش ألحسها

حازم : رد على قد السؤال .. حطيت حته اللحمه الى أنا اديتها لك

تحت لسانك ؟

حمدي : اه والنعمه حطيتها .. وفضلت أمصمص فيها لحد ما شفافى

اتبرت .. حتى شوف .. (يضم شففيه ويقرب وجهه من حازم)

حازم : (بغيط) كده حته اللحمه تبقى مغشوشه

حمدي : (يقشع بدننه) مغشوشه ؟!! .. (يهجم على حازم ويمسك

بتلابيبه) تطلع لحمة أيه دى الى خلتنى أمصمص فيها لغاية

ما كنت هرجع

حازم : (وهو يحاول تخليص رقبتنه من يدي حمدي) وأنا ايش

عرفنى .. هو انا الى صنعتها

حمدي : (يترك تلابيب حازم ويتحسس بطنه متألما) أنا حاسس ان

حتة اللحمه دى من زلمكة غراب .. أيوه .. زلمكة غراب ..

عشان كده أنا ...

(صوت ضجة شديدة تشد انتباه حمدي وحازم وكل رواد المقهى الذين وقفوا تباعا ، نميز من بينها أصوات متظاهرين .. يرددون هتافات يرج صداها جنبات المسرح

ص متظاهر (1): فول .. طعمية .. ميه من الحنفية

أصوات جموع المتظاهرين : فول .. طعمية .. ميه من الحنفية

حمدي : دى شكلها مظاهرة يا حازم .. بس معقول (متفكرا) الناس دى كلها فشلت فى البوس

حازم : (بعصبية وهو يقترب من الكالوس الأيمن) بوس أية .. اتنيل ..

(يهم حمدي بالرد لكن صوت متظاهر ثان يقاطعه)

ص متظاهر (2): مش بالكنكة ولا بالكوز .. عايزين نشرب لما نعوذ

أصوات جموع المتظاهرين : مش بالكنكة ولا بالكوز .. عايزين نشرب لما نعوذ

حازم : (يشير نحو الكالوس الأيمن وهو يتراجع للخلف) دى مش

مظاهرة .. دى ثورة .. الأعداد دى مشوفتهاش فى مظاهرة

قبل كده .. بص يا حمدي .. بص

(تنظر المجموعة كلها ناحية الكالوس الأيمن، حتى دخول
مجموعة المتظاهرين وفي مقدمتهم متظاهر 3 الذي اعتلى
كتفي احد الشباب وهو يهتف بصوت جهوري وهو يشير
نحو زبائن المقهى)

متظاهر (3): يلي ساكت ساكت ليه .. خدت كوزك ولا أيه

جموع المتظاهرين : يلي ساكت ساكت ليه .. خدت كوزك ولا أيه

(من خلف متظاهر (3) المحمول على الاعناق، تتنوع
المجموعة من حيث الجنس والسن والشريحة الاجتماعية،
فيمقدمة المجموعة نرى متظاهرة (1) وهي ترفع بيد لافتة
مكتوب عليها «الاستحمام كالماء والهواء» بينما ترفع يدها
الآخري وتحك باظافرها خلف ظهرها، كما نرى أيمنوهو
يرفع لافتة بطول ذراعيه مكتوب عليها «لا للفاسدين .. لا
للمتشطفين» وهو يميل برأسه للخلف ويقول لمتظاهر (4))

أيمن : والنبي يا زميلي .. اهرش لى فى ضهرى فوق الحزام بخمسة
سنتى لان ايديا مشغولين

(يمد متظاهر 4) يده ويحك بأظافره ظهر أيمن، بينما يخترق
حشد المتظاهرين بهجت أبو العنين رجل الأعمال الثري وهو
محاط برجال حراسته ومن بينهم سكرتيره الخاص حاملا

حقيقية، يرمق حازم بهجت بنظرة ثم يقول لحمدى)

حازم : أنا بشبه على الراجل ده

حمدى : أنهى راجل

حازم : الراجل المستحمى ده .. (وهو يشير نحو بهجت) الواقف
هناك

حمدى : اه .. انا كمان حاسس انى اعرفه .. شكله من الجماعة الى
بيطلعوا كتير فى التلفزيون

حازم : خلاص افكرته .. ده بهجت أبو العنين

حمدى : بتاع البيض (متفكراً) الى كان مرشح يمسك وزير الفقس فى
الحكومة الى فاتت

حازم : ايوه هو .. بياضه وصفاره

حمدى : طيب وايه الى يمشى واحد مستحمى زيه فى مظاهرة ضد
الحكومة

حازم : أكيد جاى يركب الموجة ويعمل نيولوك سياسى جديد ..
بعد ما ريحته فاحت ووضعه اتهمز فى الحزب بعد ما جرايد
كتير كتبت عن احتكاره لقشر البيض

حمدى : يعنى هو ذارق فى وسط دول عشان يكسب جماهيرية جديدة

(يهم حازم بالرد ،بينما يرفع متظاهر 3 عقيرته مرة أخرى

بهتاف جديد)

متظاهر (3) : يلى ساكت ساكت ليه .. ورك الفرخة بألف جنيه

جموع المتظاهرين : يلى ساكت ساكت ليه .. ورك الفرخة بألف جنيه

(يواجه بهجت المجموعة)

بهجت : اخوانى .. اخوانى

جموع المتظاهرين : ايسيسيسيه

بهجت : احنا مش هنقضيها هتافات ممشة .. انما لازم ننهض من

رقادنا ونصيح

جموع المتظاهرين : كاك .. كاك

بهجت : لا مش كده .. مش ده قصدى .. أنا أقصد نصيح بمطالبنا

القابلة للتحقيق .. مطالبنا الشخصية يعنى .. بلاش من

الكلام العام والطلبات العامة .. عشان مندور ش جوا بيضة

مفرخة .. قصدى بيضة مفرغة .. قصدى دايرة مفرغة .. أنا

عايز كل واحد فيكم يصيح بمطلبه .. وبقول هو عايز ايه

متظاهر (5) : أنا عايز أشرب

متظاهرة (2) : وأنا عايزة استحمى

متظاهرة (3) : (امراة في العقد الخامس) أنا مش عايزة أشرب ولا

عايزة استحمى

بهجت : امال عايزة أيه يا ست

متظاهرة (3) : عايزاهم يطلعوا ابني من المعتقل .. بقالى سبع سنين

مشوفتوش

بهجت : وهما خدوه ليه يا ست

متظاهرة (3) : قالوا انه عضو فى حركة قفايا

بهجت : (مستغرباً وهو يتحسس قفاه) قفايا

متظاهرة (3) : مش قفا سعادتك يا باشا .. قفاهم هم

(يقترّب حمدي متدخلا)

حمدي : دى حركة سياسية سلمية بتدعو الى ان كل مواطن فى مصر

يحافظ على قفاه وميخليش الحكومة تضربه عليه

متظاهرة (4) : أنا كمان بطالب بان بابا يخرج من المعتقل

بهجت : هو كمان كان عضو فى حركة قفايا

متظاهرة (4) : لا

بهجت : امال اعتقلوه ليه

متظاهرة (4) : وهو راجع من الشغل وقفه كمين .. الضابط اشتبه فيه
لما لقي عيونه حمرا وخدوده مندية .. شك انه كان بيبيكى
وخبى دموعه لما اتفاجىء بالكمين .. راح الضابط منزله من
العربية وفتشه تفتيش ذاتى وقبض عليه بعد ما حرز له
المنديل الى كان نافف فيه

بهجت : واعتقله بتهمة آيه

متظاهرة (4) : البكاء بدون تصريح

متظاهر (6) : أنا كمان مش عايز أشرب ولا عايز استحمى

بهجت : أنت كمان عندك حد عايز تطلعه من المعتقل

متظاهر (6) : أنا عيلتى كلها فى المعتقل لكنى مش عايزهم يطلعوا

(ردود أفعال مستغربة مستهجنة من جمع المتظاهرين)

بهجت : ازاي عيلتك كلها معتقلة ومش عايزهم يخرجوا

متظاهر (6) : (وهو بيكي) لانى مش هقدر أشيل همهم ولا أدبر
احتياجتهم لو خرجوا

(لحظات من الصمت نسمع خلالها بعض الهمهمات)

بهجت : طيب ايه طلباتك ؟

الوطن
متظاهر (6) : ان الحكومة تعتقلنى معاهم

(ترتفع الهمهمات مرة أخرى)

بهجت : ليه ؟

متظاهر (6) : لانى مبقتش قادر أشيل هم نفسى .. أبوس أيدك ..
خليهم يعتقلونى ويريحونى

بهجت : حاضر

(يرفع بهجت يده ويشير نحو الكالوس الأيمن، يهرول عدد من
العساكر نحو متظاهر ٥) ويسحبوه عنوة إلى خارج المسرح
بينما نلاحظ شدة تأثر حازم وهو يتحرك نحو بهجت)

بهجت : مين له طلبات تانية

متظاهرة (5) : أنا

(متظاهرة (5) فتاة جميلة جدا وىى مقبل العمر، تمسك بلافتة ،
يتفحصها بهجت بإعجاب وهو يقول)

بهجت : طلباتك أوامر يا ست البنات .. عايزة أيه

متظاهرة (5) : عايزة أشتغل

بهجت : (باشتهاء وشبق وهو يشير نحو السكرتير) شغلك عندى

الوطن
يقترّب السكرتير من بهجت، يأخذ منه الحقيقية، يفتحها
ويخرج منها ورقة، يوقع عليها ثم يشير بها نحو
متظاهرة (5)، بينما نسمع موسيقى مناسبة، ونرى
متظاهرة (5) تلقي باللافتة على الأرض وتسير خاضعة
منكسرة نحو الورقة التي أعطاها بهجت للسكرتير، تتحرك
متظاهرة (5) خلف الورقة التي مدها السكرتير بيد ومد باليد
الأخرى الحقيقية لأحد رجال بهجت (رجل الحقيقة) ..
يتحرك السكرتير في جنبات المسرح بظهره وهو يمد يده
بالورقة التي بدت مثل طعم لا يقاوم ، تتبعه متظاهرة (5)
وهي مسلوبة الإرادة ، وقد بدت كمن مسه سحر أو كمن
وقع تحت تأثير نوع قوي من المخدر، حتى تختفي في
الكالوس الأيمن من خلف السكرتير والورقة التي تمدها
يده ، مع نهاية الموسيقى يرتفع صوت بهجت)

بهجت : مين تانى عايز يشتغل (يقترّب حامل الحقيقة من بهجت حتى
يلاصقه)

متظاهرة (6) : أنا (تقولها بميوعة ثم تتحرك حركة إغراء مع أنها لا
تحمل أى مقومات الاغراء أو الجمال)

بهجت : (وهو يتفادى النظر إليها) على فكرة انتى حظك مش حلو ..

فرص العمل الى معايا داخل مصر خلصت .. انتو عارفين ان سوق العمل مرتبك .. والبلد مفيهاش شغل خالص

حازم : (رافعا صوته) ولما البلد مفيهاش شغل خالص .. انت والى زيك جبتوا المليارات دى من فين

(يتجاهل بهجت رد حازم ويوجه حديثه لمظاهرة (6))

بهجت : ها .. قولتى آيه .. أشوف لك فرصة عمل برة مصر

مظاهرة (6): انشالله حتى برة الكرة الأرضية .. المهم أطفش من البلد دى

بهجت : (وهو يشير لحامل الحقبة) عقد عمل فى الصومال (موجها حديثه لمجموعة المتظاهرين) مين تانى عايز فرصة عمل برة مصر

متظاهر (3) : (وهو يلقي بنفسه من فوق كتفي الشاب الذي يحمله) أنا .. (وهو يهرول مخترقا الحشد نحو بهجت) أبوس ايدك أنا .. انشالله حتى تشغلنى ألم تلج فى القطب الشمالى

(يعصف بحازم رد فعل متظاهر (3)) .. يقشعر بدنه عندما يراه يهبط من مكانه فوق الأعناق فى مقدمة المظاهرة ويهرول متذللا نحو بهجت .. فيرفع صوته إلى أقصى درجة

حازم : نخاس

بهجت : (يتجاهل حازم بعدما رmqه بنظرة غضب ويقول بتشفي ،
كأنه يتحداه) قـولـت مـين عـايز فـرصـة عـمـل بـرة مـصر

متظاهر (3) : انا (يعيدها بنبرة استعطاف) ابوس ايدك أنا

حازم : (وهو يشير نحو متظاهر (3)) وانت عبد (وهو يشير مرة
أخرى نحو بهجت متحديا) لنخاس فاسد عاهر دجال
مصاص دم

بهجت : (يصرخ في حازم) اخرس يا وقح (وهو يستعدى جموع
المتظاهرين على حازم لئـمـغل العـنـاصـر المـنـدسـة ابتـدى اـهـو ..

حازم : انت وامثالك المندسين مش أنا .. مش في مظاهرة زى دى
بس .. انما في البلد كلها .. انت وامثالك شوكة في كبد البلد
دى .. دمل في لحمها .. انت وامثالك وجعها ومرضاها
والقشة الى بتقسم ضهرها (يخاطب جموع المتظاهرين وهو
يشير نحو بهجت) .. متصدقوش الكداب ده .. النخاس ده
.. ده مش هنا عشان يساعدكم .. ده هنا عشان يبيعكم .. أو
يبيع الى فاضل منكم .. فوقوا .. (صارخاً) فوقوا

الوطن
بهجت : (صارخاً في حازم) عميل .. افاق .. طابور خامس (وهو
يشير نفس الإشارة نحو الكالوس الأيمن) اقبضوا على
الكلب ده

(تدخل نفس مجموعة العساكر وتهرول نحو حازم .. لكن
قبل أن يصلوا إليه يحول بينه وبينهم حمدي ورضا وعم علي
وعدد من المتظاهرين ، فيشير بهجت نحو مجموعة رجاله)

بهجت : اتصل بمدير الأمن وخليه يبعث لنا دعم

حامل الحقبة : السكرتير بتاع حضرتك مش هنا يا فندم

بهجت : راح فين الغبي ده

حامل الحقبة : راح يوصل البنت المتظاهرة لاستراحة المنصورية

بهجت : (ينظر نحو حازم والمجموعة التي تحميه بضيق ، ثم يلتفت
نحو جمع المتظاهرين) مين تانى عايز يشتغل

متظاهرة (6) : أنا

(يشير بهجت لحامل الحقبة _ مع كل فرصة عمل يشير
بهجت لحامل الحقبة نفس الإشارة فيقوم حامل الحقبة
بكتابة كلمة على الورقة قبل أن يعطيها للشخص _ وهو ينظر
نحو حازم متحدياً)

بهجت : عقد عمل في أمريكا

(حالة هياج وتكدس تتاب معظم المتظاهرين وهم يلتفون
من حول بهجت)

بهجت : مين تانى عايز يشتغل

متظاهر (7) : أنا

بهجت : المانيا ..

متظاهرة (7) : أنا

بهجت : بلجيكا

(ينظر حازم بضيق نحو بهجت ثم يصرخ في حمدي
ومجموعة المقهى ومجموعة المتظاهرين الذين لا زالوا
يلتفون من حوله كي يحموه من مجموعة العساكر ويقول
بأعلى صوته)

حازم : الى عايز ياخذ حقوقه كاملة .. ياخذها بكرامة وشرف .. مش
وهو موطى وزاحف تحت رجلين نخاس زى ده .. يحصلنى
(يهزول حازم خارجا من الكالوس الأيمن ومن خلفه حمدي
ورضا وأيمن ومجموعة من المتظاهرين .. ومن خلفهم

مجموعة العساكر .. بينما يرفع بهجت صوته (

بهجت : مين تانى عايز يسافر

متظاهر (8): أنا

بهجت : اسرائيل

متظاهرة (8) : أنا

بهجت : النمسا

متظاهر (9) : أنا

بهجت : اسرائيل

(يظلم المسرح تدريجيا .. بينما يظل معنا صوتي بهجت

ومجموعة المتظاهرين)

متظاهرة (9): أنا

بهجت : إسرائيل

متظاهر (10): أنا

يهجت : إسرائيل ..

متظاهرة (10): أنا

(بعد تمام الاظلام .. يستمر معنا صوتيهجت ومجموعة
المتظاهرين ، بنفس إيقاعه في البداية .. ثم يتسارع تدريجيا
.. حتى يذيب صدى الصوت الفارق بين النبرات ، فيصبح
ضمير المتكلم واسم الكيان الغاصب جملة واحدة .. وكأن
بهجت .. يقوم بتعريف نفسه).

أنا .. اسرائيل .. أنا .. اسرائيل .. أنا اسرائيل .. أنا اسرائيل
.. أنا اسرائيل .. أنا اسرائيل .. أنا اسرائيل ..



الفصل الثالث

تأشيرة هجرة إلى الوطن

المشهد الأول مكتب التحقيق والحجز

المسرح منقسم الى نصفين .. يربط بينهما باب مغلق .. النصف
الأيسر مظلم .. والنصف الأيمن له باب من ناحية
اليمين ويحتوى على مكتب يشغله المحقق ومساعدته،
على الجدار خلف كرسي المكتب نرى برواز عريض
مذهب لصورة الرئيس ، بجوار الباب من الداخل ،
يقف مُخبر (مُخبر ضرب القفا) نرى يده اليمنى
مرفوعة دائماً في وضع من يستعد لتسديد صفعه ، انه
يبدو مثل تمثال حجري منحواً في هذا الوضع ، ثابتاً
مع ثبات من يتم التحقيق معه.. ويتحرك مع حركته
.. بحيث يبدو مثل ظله ، نسمع طوال المشهد من
وقت لآخر أصوات تعذيب - وقع سياط ، صراخ ،
استغاثة - مصحوب بأصوات ضحك هستيري
بأصوات المعذبين ، يرفع المحقق عييه عن ورقة
أمامه ثم ينظر نحو شاير يجلس أمامه ، نظرة من نفذ
صبره .. ثم يقول مؤكداً للشاب الجالس عند يمينه

المحقق : لو مضيت انت وصاحبك على اقولك فى المحضر ده ..
مش هينفع اعمل لك حاجة .. وبكرر .. لك كامل الحرية فى
انك تتصل بالباشا باباك وتعرفه المشكلة الى انت واقع فيها
.. وليك عليا يا سيدى لو خليته يكلمنى .. تقديرا لمكانته فى
البلد هطلعك انت وصاحبك من الموضوع .. زى الشعرة
من العجين

شاب (1) : لا يا فندم .. أنا متمسك بأقوالى ومصر على موقفى ..
ومستعد اتحمل أى نتائج تترتب على كده

المحقق : (للمساعد) مضيهم

(يضغط المحقق على زر الاستدعاء، بينما يقوم الشaban
بالتوقيع على المحضر ، يفتح الباب ويدخل منه عسكرى
(1))

المحقق : (للعسكرى) فاضل عندك كام متهم

عسكرى (1) : اتنين يا فندم

المحقق : (وهو يشير نحو الشابين) دخل الاتنين دول الحجز ..
ولما ارن الجرس دخل الاتنين الى فاضلين

(بمجرد خروج عسكرى (1) مع الشابين یرن هاتف
المحقق فيفتح المكالمة ونسمع صوت الرجل المهم)

الرجل المهم : عندك ولدین اسم واحد فیهم هیثم العنانی

المحقق : هیثم مصطفی العنانی یا فندم ومعاہ زمیلہ الی اسمہ حسام

الرجل المهم : عندك یعملوا ایه .. انت متعرفش الاتین یبقو ولاد
مین فی البلد

المحقق : عارف طبعا یا فندم .. وعرضت علی هیثم انی اطلعه هو

وصاحبه من الموضوع لو كلم باباه وخلاه كلمنی

الرجل المهم : (بعصبية) مكش فیہ داعی للتعقيدات دی .. خد منه

الرقم واتصل انتا یا أخی .. مش طريقة رجل أمن ناجح دی
یا هشام

المحقق : یا فندم أنا أسف .. واوعدك .. بمجرد ما أقفل مع

حضرتك الخط .. المحضر هیتقطع وهخلی السواق بتاعی

یوصلهم بعربیتی لغاية باب البيت .. (مفكرا) بس كده فیہ

مشكلة یا فندم

الرجل المهم : مشكلة ایه دی ؟

المحقق : معظم الی اتقبض علیهم سعادتک طلعا من ولاد حباینا

و

الرجل المهم : (مقاطعا) مهی دی نتیجة الجامعات الأجنبية یا هشام

.. یعلموا العیال غلط .. ویحشوا دماغهم بحاجات غربية

ملهاش طعم ولا ريحة .. قال أياه حرية وعدالة اجتماعية
وحقوق انسان .. عشان كده العيال باظت و ...

المحقق : (مقاطعاً) أنا مع حضرتك يا فندم .. بس مش دى المشكلة
الى أنا قصدتها

الرجل المهم : (محتدا) طيب ما تقول .. هتحاول عليك عشان تتكلم

المحقق : (مرتبكا) معدش فاضل غير اتنين بس من الى اتقبض
عليهم يا فندم .. لو الاتنين دول كمان طلوعوا من ولاد
حباينا و جانى تليفون زى تليفون حضرتك .. مش هنلاقى
حد نشيله القضية

الرجل المهم : (بضيق) فى الحالة دى يبقى تشيلها انت يا هشام

المحقق : (مصعوقاً ومتلعثماً) أأأأأأ .. أنا يا فندم ..

الرجل المهم : (وقد زادت نبرته حدة وجبروتاً) أيوه تشيلها انت ..
ما دمت مصمم تغير انطباعى عنك يا هشام (صارخا فيه) لو
الاتنين الفاضلين طلوعوا من ولاد حباينا تطلعهم من غير ما
تستنا تليفونات من حد .. واذا كان على الى يشيلها مالحجز
بتاعك مليون يا أخى .. بلاش الحجز .. مالشوارع وقهاوى
وسط البلد مليانين شباب .. ته ز طولك .. وتنزل تشرب
حجرين قصص على أى قهوة وتاخذ فى ايدك وانت قايم واحد

ولا اتنين تلبسهالهم .. ده الشغل يا هشام .. ورجل الأمن
الى عايز ينجح ويتصعد لازم ميكونش تقليدى فى شغله..
وتكون عنده المرونة والحنكة الى تخليه يقدر يتصرف فى
كل الحالات مهما كانت صعوبتها

المحقق : حا.....

(يغلق الرجل المهم الخط قبل ان يكمل المحقق كلمته ،
فيلتقط المحقق انفاسه ثم يضغط على الزر ، فيدخل
عسكرى(1))

المحقق : اخر اتنين دخلتهم الحجز

العسكرى : أمر سعادتك يا فندم

المحقق : تطلعهم حالا .. (وهو يشطب على أسمين فى الورقة)
وتدخل لى الاتنين الى فاضلين (بخبث) بس بعد ما تطمئنهم
بالكلمتين الى انا محفظهم لك

(ينحنى عسكرى (1) موافقا ثم يخرج وبعد لحظات من
خروجه يدخل حمدى ومن خلفه رضا وقد بدا عليهما
الخوف والارتباك البالغ)

المحقق : اهلا اهلا بالثوار .. شرفتونا والله ورفعتم راس مصر فوق
.. (وهو ينهض) .. الى انتو قمتم بيه النهاردة عمل لوزارة

الداخلية شو كبير في الرأي العام العالمي .. (وهو يضع يده على كتف حمدي) دلوقت نقدر نقول للعالم كله ان مصر فيها حرية رأى وحرية تعبير وحق تظاهر .. (وكأنه سيطير من الفرح) حقيقى برافوا عليكم

(نلاحظ ان حمدي قد ابتلع الطعام سريعا .. على عكس رضا الذى لازال متوجسا قلقا وهو ينظر نحو يد المُخبر المرفوعة فوق قفاه)

حمدي : يا باشا ما تشكرناش .. احنا معملناش غير الواجب ..
المحقق : (وهو يعود الى مقعده) بالمناسبة .. احب اعتذر لكم عن أى سوء معاملة ممكن تكونوا تعرضتوا له (بعد سماعنا لأصوت وقع سياط وضحك) انتم عارفين ان أشخاص ومنظمات كتير بتندس فى وسط التجمعات الوطنية دى ..
عشان تثير البلبلة وتعمل حاجات تتعارض مع أمن الدولة ..
وطبعا أحنا مينفعش نقف نتفرج

حمدي : (لرضا) مش قولت لك ياض ان الناس الى بتضحك من شدة التعذيب دى ناس وحشة .. (للمحقق) عندك حق يا سعادة الباشا .. الحلو ياخذ حقه (وهو ينظر نحو يد المخبر بقلق) والوحش برضو ياخذ حقه

المحقق : (وهو يشير نحو المقعدين أمام مكتبه) اتفضلوا .. واقفين
ليه .. اقعدوا .. اقعدوا حلوين .. (وكأنه سيقوم من فوق
مقعده ويقبل ايديهم شاكرا) انتو ورد الجنان الى فتح في
شوارع مصر بجد؟

(يجلس حمدي على المقعد فيزداد شعوره بالاطمئنان
وتقمصة لشخصية المناضل الثوري، بينما يظل رضا واقفاً،
قلقاً ومن خلفه المُخبر، فيقول له حمدي بعصبية)

حمدي : ما تقعد يا عم الوردة

المحقق : (متصنعاً التأثر وهو يشير نحو رضا) سيبه .. سيبه براحتة
.. هو اكيد مش مصدق ان فيه رجل أمن ممكن يتعامل مع
المتهمين بتوعه بالطريقة دي .. (موجهها حديثه لحمدي
وبنبرة مهمومة) محدش بيستوعب بالساهل ان الحفاظ على
مصالح الدولة العليا ومؤسسات الوطن من عبث المندسين
عب كبير جدا .. بيخلينا نتجاوز في بعض الأحيان ...

حمدي : (بحماس) يا فندم حضرتك زى ما تكون سمعتنى وان بتكلم
في اجتماعتنا .. أنا دايمًا بقول للولاد نفس كلامك ده ..
حافظوا على مصالح الدولة العليا والسفلى والوسطى يا ولاد
.. وياما حذرهم من الأشكال المندسة الى حضرتك بتقول

عليهم دول (وهو يشير نحو رضا) حتى أسأل الرفيق رضا
(ينتفض جسد رضا ويتراجع خطوة للخلف بعد سماعه
لكلمة الرفيق ، فيتراجع معه المُخبر نفس الخطوة ، بينما
تبدو علامات الاهتمام البالغ على وجه المحقق وهو يشير
لمساعدته اشارة تجعله يضع القلم على الورقة ويسجل كل
كلام حمدي)

المحقق : طب ماتعرفنا الأول بشخصية الرفيق رضا يا رفيق حمدي
حمدي : ده يا سعادة الباشا المساعد بتاعى وبعتبره أهم صباع فى
صوابع أيدي اليمين .. المناضل الرفيق رضا جمعات
المحقق : من اصل فلسطيني

حمدي : لا يا فندم .. لا فلسطيني ولا سورى ولا عارفين له أهل
لغاية دلوقت

المحقق : أصل أسم الأب مش مصرى
حمدي : اصل ده أسمه الحركى يا باشا .. (وهو يضع ساقا فوق
ساق) يعنى الى بيتحرك بيه فى المظاهرات لا مؤخذه

المحقق : واخترتوا له الاسم ده تحديدًا ليه ؟

حمدي : لانه تخصص يوم جمعة يا فندم .. (وهو يقرب فمه من أذن
المحقق) تقدر سعادتك تعتبره وتد مدقوق في كل مظاهرة
بتطلع يوم جمعة

المحقق : أشمعى الجمعة يا رفيق حمدي

حمدي : لان ده يوم اجازته من القهوة سعادتك

(ينهض المحقق ويتحرك نحو رضا وهو يقول)

المحقق : على كده يا رفيق رضا .. أكيد انتا كنت ضالع في جمعة
علمنى العوم والنبي يا أحمد

رضا : أحمد مين يا فندم .. انا معرفش حد بالأسم ده

(صفعة قوية من يد المخبر على قفا رضا تجعله يهرول

مدفوعا الى الأمام حتى يصطدم بالمكتب)

(يرمقه المحقق بنظرة شامته وهو يقول)

المحقق : الظاهر انك متعرفش الى بينكر الحقيقة عندنا بيحصل له
ايه

رضا : (وهو يتحسس قفاه متألما) يا باشا أنا حتة قهوجى على قد
حالى .. لا ليا فى سياسة ولا مظاهرات

المحقق : ومظاهرة النهاردة مشيت فيها ليه

رضا : عشان ألم الحساب سعادتك .. لان مسيرة فى المظاهرة دى
عدت من قدام قهوتى .. ونص القاعدين ع القهوة قاموا
ودابوا فى زحمتها عشان ميدفعوش الحساب (وهو يشير نحو
حمدى) ومن ضمنهم المعفن ده

المحقق : يعنى انتا مشيت فى المظاهرة عشان تلم حساب المشاريب
رضا : اه والنعمة يا باشا

المحقق : (وهو يشير للمخبر) حاسبه على المشاريب الى نزلت على
ما ارجع له تانى

(صفعات متلاحقة يسدها المخبر الى قفا رضا ووجهه على
مدار الحوار ، بينما يتحرك المحقق نحو حمدى بتعبيرات
وجه متجهمة)

المحقق : نرجع لموضوعنا .. كنت عايزنى اسئل الرفيق رضا عن
أيه يا رفيق حمدى

حمدى : (ما لاقاه رضا يجعله يوغل فى الكذب وهو فى قمة الارتباك
والقلق) عن الأشكال المندسة سعادتك .. اسئلته وهو يقول
لحضرتك أنا قد آيه ريقى نشف وأنا بحذر الولاد منهم ..

دايما بقول لهم لما تشتغل أى مظاهرة يا ولاد وتشوفوا أى عيل
مندس أو بيفكر يندس أو بيحلم انه يندس .. حطوا عليه قبل
ما يعمل حركة اندساس واحدة .. وأنفخوه وقتى

المحقق : جميل .. جميل جدا .. أنا يعجبني زعماء الثورة اللى واثقين
فى نفسهم زيك كده

حمدى : أصلها مش بالساهل يا فندم .. الثورة دى مسئولية

المحقق : اكيد .. خصوصا لما تكون عن تنظيم كبير زى بتاعك

حمدى : أكيد يا باشا .. (وهو ينظر نحور رضا مشفقا بعدما رآه يسقط
على الأرض مع صفعه قوية من يد المخبر) ادعى لنا انتا بس
عشان ربنا يوقفنا ونقدر نرفع راس مصر فوق أكثر واكثر

المحقق : (بنبرة حادة صارمة) عدد أعضاء تنظيمك كام يا رفيق
حمدى

حمدى : بخاف اعدهم يا فندم

المحقق : ليه ؟

حمدى : عشان ما يتحسدوش

المحقق : (وهو يتسم ابتسامة باهتة صفراء) دا احنا هنهزر بقى طيب

(يشير نحو المُخبر اشارة تجعله يترك رضا ويتحرك حتى
يصبح من خلف المقعد الذى يجلس عليه حمدى ، بعدها
يردف المحقق وقد زادت نبرته حدة وصرامة)

المحقق : أسماء وعناوين القادة الأساسيين فى التنظيم بتاعك ايه يا
رفيق حمدى

(يرتبك حمدى ، ليس لخلو رأسه من أى معلومات فقط ، انما
لتعالى الحدة فى نبرة المحقق ، يحاول انه يتماسك ثم يقول)
حمدى : يا فندم أعد لك مين ولا مين .. (متظاهراً بمحاولة التذكر)
عندك مثلاً على سبيل المثال وليس الحصر .. المناضل حازم
احتجاجات وعم على اعتصامات ومن الحرائر عندك مثلاً
على سبيل المثال وليس الحصر برضو .. المناضلة هند
وقفات و...

المحقق : (بحدة ونفاذ صبر) مش عايز أسماء حركية وكلام عايم
وحوارات فارغة (يتنزع ورقة من أمام المساعد ويضرب بها
المكتب أمام حمدى) عايز الاسم الرسمى الثلاثى لكل
واحد فيهم .. (وهو يمد له القلم) وعنوان بيته و شغله
بالتفصيل

(يسقط فى يد حمدى ، يمتقع وجهه وهو يلقي نظرة نحو رضا

، الذى نراه يتسلق الجدار محاولا النهوض، يهب حمدى
واقفاً، متراجعا للخلف ويد المخبر تتبعه وهو يقول بنبرة
واهنة متقطعة)

حمدى : لا .. لا يا فندم .. مقدرش .. مقدرش

المحقق : (ساخرا) ليه متقدرش .. (بنبرة تهديد وغل) يا رفيق حمدى
حمدى : لان دى أسرار شغل يا ياشا

(فجأة تهوى صفعه جبارة على قفا حمدى ويصبح المحقق فى
شراسة نمر جائع وهو يضرب بيده فوق المكتب)

المحقق : وحية امك .. أنطق يا ض

(يتراجع حمدى مفزوعا بعد تلقيه الضربة ،حتى يصطدم
ظهره بصدر المُخبر)

المحقق : هتقول أسماء وعناوين العيال الى معاك .. أماكن
تجمعكم .. مين بيدعمكم و ..

حمدى : (مقاطعا فى رعب) يا فندم ما ينفعش

المحقق : (وهو ينهض ويواجهه) ليه يا روح أمك .. هتعمل لى فيها
بطل وتشيلها انت والقهوجى الى معاك

حمدى : لا أنا ولا القهوجى الى معايا عملنا حاجة عشان نشيلها
المحقق : (وهو يشير نحو اوراق المحضر) يا ابنى انت لسه معترف
بالتخطيط لأعمال بتضر بأمن الدولة وقيادة تنظيم سرى ..
(وهو يشير نحو اوراق المحضر) كلامك ده ولا مش
كلامك ؟

حمدى : مش كلامى
المحقق : امال كلام مين ؟!
حمدى : كلامك انت .. العسكرى بتاعك قال لى أقول كده عشان
حضرتك تخرجنى
المحقق : خلاص .. (وهو يشير نحو الباب) انده للعسكرى عشان
يخرجك

حمدى : حضرتك كمان شجعتنى
المحقق : (يصرخ فيه) شجعتك ؟! شجعتك ازاي ؟
حمدى : حسستنى ان الى بيستجوبنى حمدى صباحى
المحقق : صباحى ؟! الأسم ده كمان مش مصرى .. عضو معاك ده
كمان فى التنظيم زى جمعات ..

حمدي : يا فندم عضو ايه بس .. ده من رموز الثورة اللى قامت فى بداية
القرن اللى فات

المحقق : صباحى .. (وهو يلتفت نحو المساعد) .. احنا ازاي
معندناش ملف للرجال ده .. (وهو ينظر نحو حمدي)
صباحى .. أسمه كده صح .. صباحى

حمدي : يا فندم متشغلش بالك بالأسم .. لانه أكيد أسم حركى زى
جمعات .. تلاقيه كان بيطلع مظاهرات شيفت الصبح بس ..
خلينا فى موضوعى سعادتك .. أنا معملتش حاجة .. والله
العظيم ما عملت حاجة ..

المحقق : (وهو يرمقه بنظرة شك) معملتش حاجة وانت متابع
تاريخ الثورة وحافظ أسماء ثوار عاشوا من ميت سنة فاتت
حمدي : يا فندم اهى معلومات بنلاقيها مكتوبة فى ورق الجرايد اللى
بتتلف فيه كبسولة الفول أو برشامة الطعمية اللى بنبلعها ع
الصبح

المحقق : (بنبرة تهديد ونفاذ صبر) هتكتب أسماء وعناوين القادة
الأساسيين فى التنظيم بتاعك ولا لأ

حمدي : لا .. لان مفيش تنظيم ولا نيلة .. ومتقوليش اعترافات ..

لانى مقولتش غير الى عرفت انك عايز تسمعه ..

المحقق : بالساهل كده

حمدي : أكيد مش بالساهل .. بس الى زى مقدموش غير كده ..
ربط الحمار مطرح ما يعوز صاحبه .. كان لازم أرضيك
عشان تخلىنى اطلع من هنا .. ومعاك فى ان ده مش بالساهل
.. وانه صعب .. ومش بس صعب .. ده صعب ومهين
ومقرف .. بس ايه فى حياتنا كلها .. حياة العبيد .. مبقاش
صعب ومهين ومقرف .. (رافعا صوته) احنا عبيدكم يا باشا
.. والله احنا عبيدكم .. لا أكثر من كده ولا أقل .. (متراجعا
بنبرة مكسورة خاضعة نازفة) لا .. أقل .. أكيد أقل .. وستين
أقل كمان .. أحنا عبيدكم .. وأقل من عبيدكم كمان ..
مزاجكم فى ثورة نبقى ثوار .. فى احتفال نحتفل .. فى غنا
نغنى .. فى تلت تيام حداد نهكى .. فى رقص نرقص .. حتى
لو طلبت معاكم تنظيط .. نتنطط ونبقى قروود .. قروود ؟ لا ..
بالتأكيد مش قروود .. انما أقل من القروود .. لان حتى لما
بنتنطط مش بنطول من ايديكم .. حق القروود .. فى صباع موز
أو حبة فول سودانى

المحقق : (ببرود) كلت أنا من الأونطة دى .. اتهزيت واتأثرت

وقربت اعيط (صارخا) جاوب ياض على قد السؤال

حمدى : الى عندى قولته يا باشا

المحقق : طيب خلىنى صدقتك (يشير نحو أوراق المحضر) مع ان

عندى ليك اعترافات مسجله بعكس كده .. قولى .. رجالتى

جابوك النهاردة من مظاهرة ولا دخلوا عليك بيتك وجروك

من فوق سريك

حمدى : لا يا فندم .. جابونى من المظاهرة بتاعة النهاردة

المحقق : ومين الى دعاك للمشاركة فى المظاهرة دى

حمدى : يا فندم دى مظاهرة .. مش عيد ميلاد عشان اروح بدعوة ..

قاعدين على القهوة لقينا مسيرة معدية فيها شباب مستحمين

وولاد ناس زى حلاتك كده .. سمعناهم بيهتفوا هتافات

بتطالب بحقوق عادلة احنا محرومين منها ومحتاجين

لتحقيقها .. فمشينا معاهم

المحقق : (بنبرة ظفر وهو يشير للمساعد) ده اعتراف تانى منه ..

سجل .. بيقول أن الشعب محروم ومحتاج .. ومدام الشعب

محروم ومحتاج يبقى نظام الحكم هو الى حارمه .. وحارم

يعنى مانع .. ومانع يعنى معاه ومش عايز يدى .. وده مالوش

تفسير غير ان نظام الحكم حرامى .. (وهو يرمقه بنظرة اتهام) بتتهم
نظام الحكم بالسرقة يا رفيق حمدى .

حمدى : يا فندم نظامك على راسى .. نظامك أشرف من الشرف .. أنا
بتكلم عن نفسى وعن الناس الى اتولدت لقيت نفسى
مزروع فى وسطهم .. احنا محرومين يا باشا بجد .. واكثر
من محرومين كمان .. احنا ميتين بالحيا .. مقتولين .. احنا
المحقق : (مقاطعا وهو يشير نحو المساعد) سجل دى كمان
..الشعب مقتول .. يبقى النظام قاتل ومجرم

حمدى : (بنبرة استعطاف) يا فندم انت بطريقتك دى بتتعمد
تورطنى و..

المحقق : (مقاطعا وهو يشير نحو المساعد) سجل دى كمان ..
طعن فى نزاهة جهة التحقيق واتهمها بالعمالة والتدليس
والتواطىء وعدم الشفافية وال.....

حمدى : (صارخا بنفاذ صبر وهو يشير نفس الاشارة نحو المساعد)
وسجل كمان عندك

(تحتد تعبيرات وجه المحقق ، فتهوى صفعة من يد المخبر
على قفا حمدى)

حمدى : سجل ان الله حق (صفعة من يد المخبر) سجل ان الكرامة
والشرف وكل القيم الانسانية حق (صفعة من يد المخبر)
سجل ان الخروج فى مظاهرة سلمية حق (صفعة من يد
المخبر) .. سجل ان كلمة اااه من المروجع حق (صفعة من
يد المخبر) سجل ان كلمة لا من المظلوم والمسروق
والمقهور والمنتهاك حق (صفعة من يد المخبر) سجل ان
الخالق خلق لنا صوت مش عشان نهتف (وهو يشير نحو
صورة الرئيس) اخترناه اخترناه بس .. (صفعة من يد
المخبر) أو عشان نقول تمام يا فندم وتحت أمر معالى حضرة
جنابك بس (صفعة من يد المخبر) لكن عشان لما يملانا
الوجع والقهر وظلم وخسف المخلوق للمخلوق نصرخ
ونرفض ونحتج ونقول لأ

(يهم المخبر بتسديد صفعة جديدة لكنه يمكسك بيده
ويصرخ فيه)

حمدى : لأ

(يحاول المخبر تخليص يده كى يعاود تسديد الصفعات لكن حمدى
يستमित فى الامساك بها.. حتى يجبره على الاستسلام ،
فيلتفت نحو المحقق الذى اشار له اشارة تطلبه بالانسحاب

وهو يتقدم نحو حمدى يقول بنبرة المتفاجىء)

المحقق : أيوه كده .. بان على حقيقتك .. شيل قناع الساذج
والمغيب الى اشتغلتنى بيه أكثر من ساعة واطهر شخصيتك
الحقيقية يا رفيق

(وهو يتأمل بنظرة حاقدة)

المحقق : سمعنى باقى الافتراءات والشعارات الواهية الى كنت
بتلهب بيها حماس المتظاهرين

(يشيح بوجهه عن المحقق ويطرق شاردا وكأنه يحدث
نفسه)

حمدى : فى المظاهرة مفتحتش بقى .. مهتفتش هتاف واحد .. كنت
ماشى مع الماشين وخلاص .. زى قشة فى موجة بتتحرك فى
اتجاه مش عارفه هيوصل لفين

المحقق : وعقدة لسانك اتفكت دلوقت

حمدى : كان الخوف مالينى .. كانت كل ذرة فى كيانى بتنسحق لما
بتخيل ان الموجة حدفتنى فى وش اصغر عسكري من
عساكرك

المحقق : (يصرخ فيه) وبقيت فدائي وبطل ومش فارقة معاك
ومحدثش مالى عينك دلوقت

حمدى : اه .. بالظبط (وهو يلتفت ليواجه المحقق) عارف ليه ؟
المحقق : عرفنى يا رفيق

حمدى : لانك مخلتلش حاجة أبكى عليها .. انت مسختنى

المحقق : أنا معملتش حاجة غير انى قومت بعمل الواجب ..
واجب مقدس فى موجهة كتايب من الافاقين والمرترقة
بتنخر زى السوس فى بنیان دولة .. رسالتى وواجبى بيحتموا
عليا انى احميها

حمدى : لا يا باشا .. انت كده بتحل الواجب غلط .. لان مفيش
واجب فى الدنيا يخليك تتعامل مع بشر زيك وكأنهم كلاب
أو ققط

المحقق : ققط ؟! (مستخفاً وبحدة) وهو فيه ققط بتأسس
تنظيمات سرية وتعمل مظاهرات تطالب فيها بإسقاط نظام
الحكم ..

حمدى : يا باشا لو الققط شافت الى احنا شوفناه وجاعت زى ما
جوعنا .. كانت عملت أمم متحدة ومجلس أمن قومى كمان
.. بعدين احنا عملنا ايه غير اننا فكينا عن نفسنا بكام هتاف

.. يا اخي دا القطط لما بينداس على ديلها .. مبتسكتش .. بتمد
ضوافيرها وبتخربش وبتعلن عن ألمها ورفضها واحتجاجها
بكلمة نأااااو(صارخاً في وجه المحقق) نأااااااو

المحقق : (برود وهو يتأمله بنظرة حانقة) لو كنتوا نونوتوا في
المظاهرة مكش حد جه ناحيتكم .. (صارخاً فيه) لكنكم
هتفتم بسقوط النظام

حمدي : لاننا مش قطط .. احنا بشر .. ولينا الحق في اننا نعيش كبشر
.. فهل كتير على بشر .. انه يطالبوا بانهم يتعاملوا .. كبشر

المحقق : (صارخاً فيه) جحود و خيانة وعدم انتماء وفراغة عين ..
يعنى اتحرمت من كل حاجة .. مخذتش حاجة من مصر ..
مشوفتش حاجة في مصر

حمدي : مكذبش على حضرتك .. مصر فيها كل حاجة .. لكن .. من
غير أى حاجة .. اه بنشوف فيها كل شىء .. كل شىء يخطر
على بالك .. (بمرارة وقد دمعت عيناه) بس بنشوفه وهو في
ايديكم انتم .. ايدكم انتم بس .. وأيدين ولادكم ومحاسبكم
وحبايبكم وكلابكم الناهشة في لحمنا ..

المحقق : أحمدا وربنا انكم بتشوفوا .. عايشين في أمان ومأنتخين

ومش فالحين غير في البصبصة والبحلقة لى في ايدين غيركم ..
شعوب كثير زيكم وأحسن منكم .. مبتشوفش غير الجثث
والانقاص وبرك الدم .. مبتسمعش غير أصوات القصف
والرصاص وطريقة البيوت والمدارس فوق روس الى فيها
.. شعوب كثير زيكم وأحسن منكم .. بتغير منكم
وبتحسدكم على الرخاء والاستقرار والتنمية ونعمة الأمن
والأمان الى انتو عايشين فيه .. وبتمنى يوم واحد .. يوم
واحد بس يعدى عليها من غير كوارث أو انفجارات .. لكن
نقول ايه .. (وهو يتأمله بحقد) شعب اتعود على الدلع
والجشع والبطر والنمردة .. عايزينها عراق ولا سوريا
ولاد الكلب

همدى : عايزينها وطن يا باشا .. عايزينها وطن بجد .. وطن بجد مش
مجرد يافطة كدابة .. بتحمل أسم وطن بالكذب .. انتو
خدتوا كل حاجة يا سعادة الباشا .. خدتوا كل البضاعة الى
فى الدكان .. شفتوه .. نفضتوه .. كنستوه .. مسحتوه ..
مسيبتوش فيه طوبة على حيط ولا بلاطة فى أرض .. (يبتسم
بمرارة) دا انتم كمان بتعايروننا ؟ .. بتعايروننا لانكم سبيتولنا
اليافطة .. (يضحك بينما تنهمر دموعه) يافطة كدابة مكتوب
عليها اسم وطن بالكذب (صارخاً فى هيسترياً) احنا جيل

اليافطة يا سعادة الباشا .. أحنا شعب اليافطة .. وجمهور اليافطة وابناء
اليافطة و....

المحقق : (يقاطعه مصعوقا) للدرجة دى ؟ .. ج بلطك الجرة تهين
الوطن وتزدرية وتحقره وتقلل منه للدرجة دى ؟ .. وفين ؟
فى تحقيق رسمى كمان ؟!!

حمدي : (وهو يعاود الاشاحة بوجهه والحديث هائلة غائمة وكأنه
يحدث نفسه) الى هان الوطن وحقره مش أنا يا سعادة الباشا
المحقق : آمال مين .. مين الى حقن دمك الأسود.. الملوث.. بكل
الغل والحققد وعدم الانتماء ده

حمدي : الى خد منى كل حاجة ومسابليش من الوطن حاجة .. غير
حتة الخشب .. اليافطة .. الى لا تنفع تابلوه يتحط فوق
رصيف أكل من وراه لقمة عيش .. ولا تنفعقارب أعبر بيه
البحر .. ولا تنفع حتى نعش ..

المحقق : حته الخشب الى انت مستقل بيها دى .. لو تعرف
المجهودات الى بتبذلها الدولة عشان تحافظ لك عليها
مكتتش تقول كده

حمدي : خلاص يا باشا .. تاهت ولقيها .. خدوا حته الخشب ..

وخذوا الكراسى والمناصب .. (بنبرة متأثرة) بس سييولى الوطن
المحقق : (بحقن) هتعمل لى فيها لطفى بوشناق يا ابن الكلب (وهو
يضغط بيده على زر الاستدعاء) نسيب لك الوطن؟! هو حد
كان خده منك .. ما انت عايش على أرضه وتحت سماه أهوه
يا ابن الجاحدة

حمدى : الفار والصرصار ودود الأرض هم كمان ليهم أرض وسما
يا سعادة الباشا .. الوطن مش أرض وسما بس ..

(يضغط المحقق على زر الاستدعاء بعصبية بينما يردف
حمدى)

حمدى : الوطن عدل .. الوطن رحمة .. الوطن حرية .. الوطن لقمة
عيش نضيصة وشريفة .. الوطن حق .. الوطن حب .. الوطن
كرامة

(يعادود الضغط على زر الاستدعاء وهو يرمقه بنظرات
نارية)

المحقق : انت شكلك هتطول معانا كثير قوى .. (متوعدا) بس
وحياة أمك .. ماهخليك تطلع من هنا غير لما اعرفك يعنى
أيه كلمة وطن

حمدي : انا عارف يعنى ايه كلمة وطن اكثر منك واكثر من اى حد فى
البلد دى .. انا محتاج أعرف حاجة تانية أهم

(يدخل عسكري (1) بينما يرمق المحقق حمدي بنظرة
مستخفة)

المحقق : ودى تبقى أيه يا رفيق

حمدي : تبقى .. هى فين الوطن ؟

(يطرق برهة نشعر خلالها انه يحاول ان يكظم غيظه ثم يشير
نحو حمدي ورضا وهو يقول لعسكري (1))

المحقق : خدhem على الحجز .. ووصى عليهم قوى .. سامعنى ..

وصى عليهم قوى .. عايز لما أشوفهم المرة الجاية

معرفهمش .. عايز لما أشوفهم المرة الجاية الاقيهم بقوا

حاجة تانية خالص .. حاجة تانية شبيه البشر

إِظْلَام

يظلم النصف الأيمن من المسرح ويضئ الجزء الأيسر، لنرى غرفة الحجز ، في اركان الغرفة نرى عدداً من المحتجزين .. معظمهم عراة الصدور التي تنسدل عليها لحاهم الطويلة المغبرة وهم يتحسسون مواقع السياط فوق ظهورهم ، بعضهم يصدر ضحكات متوجعة من حين الى اخر، والبعض نراه نائماً .. لكنه من حين الى اخر .. نراه ينتبه منتفضاً .. ليتحسس مواضع ضرب السياط على جسده قبل ان يعاود النوم .

في منتصف الجدار المواجه ، نرى فتحة شباك ، يتخللها قضبان حديدية سميكة صدئة .. يقف أسفلها (محتجز 1) وهو يرسل نظرات مستطلعة قلقة نحو باب الحجز بعد ان نسمع صوت خطوات من خلفه .

على مقربة من باب الحجز ، يجلس (شيخ وقور) ملتحي وهو يداعب حبات سبحة في يده ، يفتح باب الحجز فتقف مجموعة المحتجزين ببطء وتهالك وتراجع حتى تلتصق بالجدران ، يبتعد (محتجز 1) في وقفته خطوة عن الشباك ، بينما نرى (عسكري 2) ضخمة الجثة وقاسى الملامح ، يقف على باب الحجز المفتوح وهو يحرك كرباج في يده .. حركة من يهم

بتسديد ضربة قاسية قاضية ،يدخل حمدي من باب الحجز مدفوعاً
من الخلف دفعة قوية .. بينما يرتفع كرباج (عسكري 2)
ويهوى على مؤخرته بضربة عنيفة ، يعود بعدها (عسكري 2)
لتحريك الكرباج بنفس الطريقة .. حتى يدخل رضا مدفوعاً
نفس الدفعة وينال نفس الضربة العنيفة من الكرباج على
مؤخرته .

يغلق الباب ،فيتحرك حمدي ويمسك بتلابيب رضا ويصرخ فيه
حمدي : بقى أنا جريت منك عشان اهرب من الحساب يا قهوجى يا
معفن

رضا : (وهو يمسك برقبتة) وهو أنا يعنى الى كنت صباع فى ايدك
اليمين يا أهبل يا عبيط .. ضيعتنا .. روح منك لله .. الهى
صوابك العشرة يتشلوا وتتفرج عليهم وهما مدلدلين من
كفوف ايديك

حمدي : (يتركه بغيط) ربنا يشل لسانك الوحش ده .. حتى دول عايز
تدلدهم يا قهوجى يا نتن .. اتفوه عليك

(نسمع صوت هند من خارج غرفة الحجز)

صوت هند: برضو مجاش الى اسمه حمدي يا اخويا

محتجز (1): (يقترّب من فتحة شبّاك الحجز ويقول هامسا) لا يا
ست .. الى دخلوا اتنين .. واحد قهوجى نتن والتانى
أحمرانى مش أبيضانى زى ما انتى قولتى

صوت هند: طيب يا اخويا .. تسلملى .. ربنا يسوقه قادر يا كريم
حمدى: (وهو ينصت لصوت هند) الصوت ده زى صوت هند مراتى
(رافعا صوته) هند .. يا هند

صوت هند: حمدى

حمدى: (وهو يقترّب من فتحة الشبّاك) هند

صوت هند: (بلهفة) حمدى

(يدفع محتجز (1) صدر حمدى دفعة قوية بتعبه عن الشبّاك)

محتجز (1): أبعد عن الشبّاك يا زميلى وبلاش تبوظ لى الشغل

حمدى: (مستغرباً) شغل أيه يا ابنى .. أنت اهيل .. دى مراتى

محتجز (1): لا مش مراتك .. (وهو يشير نحو فتحة الشبّاك) هى
قالت ان جوزها أبيضانى وانت أحمرانى .. (وهو يتأمل قفا
حمدى وخديه) أحمرانى مزرق كمان

حمدى : (يقترّب من الشباك وهو يصرخ فى محتجز (1)) هوانت
كنت مستنى بعد السبعين قفا الى خدتهم أبقي أخضرانى
مقلم ولا فحلقي كاروهات (وهو يزيح محتجز (1)) .. أبعد
.. بقول لك مراتى .. مراتى

صوت هند : ده صوت جوزى .. سيبه .. سيبه يا اخويا انشالله حتى
لونه يكون فسدى

حمدى : (وهو يقرب وجهه من فتحة الشباك) هند .. هندوتى ..
هندوتى حبيبتى

صوت هند : حمدى .. حبيبى .. جوزى ونور عينى .. (وهى تبكى)
حمروك يا قلبى

حمدى : حمرونى وشونى (وهو يبكى) ولو كان عندهم زيت بيغلى
كانوا قلونى وقرمشونى كمان يا حبيبتى

.. بس صدقنى .. (محاولا التماسك) أنا نسيت حمرانى
وزرقانى بمجرد ما سمعت صوتك .. وحشتينى .. وأمى
وحشتنى .. والشارع وحشنى

هند : هترجع لكل دول يا حبيبى .. كلها سواد الليل بس

حمدى : لا ياهند .. المحقق حطنى فى دماغه .. (وهويكى) شكلى
مش هطلع من هنا غير على طريقة حسين رياض فى فيلم أمير
الدهاء

صوت هند : متقولش كده .. ان شاء ..

حمدى : (مقاطعا) لا .. زى ما بقول لك كده .. هى شكلها هترسى
على أمير الدهاء .. (فجأة يزداد تماسكه ويفرد قامته) بس
أوعدك انى مش هطلع زى حسين رياض .. لا .. (صارخا)
هطلع زى أنور وجدى .. عشان الندل ابن عمك الى اسمه
حازم يبقى الأول .. عارفه يعنى ايه الأول .. لان هو الى
اتنحرر وعمل فيها سعد زغلول .. جاب رجلنا ولما اتزنقنا
غطس ومشوفتوش تانى .. قوليله حمدى طالع لك يا حازم
وهي

صوت هند : أقول له ايه بس .. ده مرجعش من ساعتها وشباب فى
الحارة بيقلولوا انه اتصاب فى المظاهرة

حمدى : اتصاب ولا حتى اتقتل .. والنعمة ما هسييه لأنه السبب فى ..
(صوت فتح الزنانة يسكته فيقول لهند هامسا محذرا)

حمدى: ما تتكلميش .. الظاهر ان بدران جاى

(يدخل عسكري (2)، يتفحص المحتجزين بنظرة وهو
يقول)

عسكري (2): الاتنين بتوع مظاهرة النهاردة فين

(يقترّب حمدي ورضا من عسكري (2)، الذي سحب رضا
من ذراعه وهو يقول لحمدى متوعداً)

عسكري(2) : خليك انت للآخر .. عارف ليه ؟
حمدى : ليه ؟

عسكري(2) : عشان انت حلو

(يخرج رضا مع عسكري (2) ثم يغلق الباب ، فيهرول
حمدى نحو الشباك)

حمدى : هند .. يا هند

صوت هند : نعم يا سبعى

حمدى : (برعب) سبعك خلوه للآخر يا هند (وهو يبكى) هيحلوا
بالسبع بتاعك يا بنت الفقرية ..

صوت هند : (تهمس له مقاطعة) أسمع .. العسكرية الى دخلنى
بيشاور لى عشان اطلع .. أنا عملت لك شوية أكل يخلوك

تصلب طولك على ما نشوف اخرتها ايه .. مد ايدك من فتحة الشباك

(يرفع حمدي جسده ويدخل ذراعه من بين القضبان وبعد
برهة من تحريكها يعود باصابعها وهي تمسك بعلبة كبريت،
يتأمل علبة الكبريت بضيق وهو يقول)

حمدي : كل ده .. كل ده يا هند .. مكنش فيها داعي تكلفى نفسك
كده .. انتى كمان محتاجة لمصاريف على ما أطلع

صوت هند : متشيلش همى .. لو ضاقت بيا هبقى اروح بيت بابا ..
المهم انت متبقاش نفسك محرومة من حاجة .. يلا سلام

حمدي : (متأثرا وهو يرج علبة الكبريت بجوار أذنه) سلام يا حبيبتي

(بمجرد جلوس حمدي على الأرض وفتحه لدرج علبة
الكبريت يلتف من حوله مجموعة المحتجزين - ما عدا
الشيخ - وهم يتلمظون جوعا ، ينظر نحوهم بقلق وريبة
وهو يقول)

حمدي : وحركات فيلم المغتصبون لزومها أيه دلوقت

الشيخ : مكانك يا ض انت وهوا .. (صارخا) ألزم محللك يلا

(ينفض جمع المحتجزين من حول حمدى ، ويشير له الشيخ
إشارة تدعوه للاقتراب ، فيزحف فى وضع الجلوس وهو
يرفع علبة الكبريت على إحدى يديه حتى يصبح جالسا فى
مواجهته)

حمدى : (للشيخ) ربنا يوقف لك ولاد الحلال يا مولانا

الشيخ : (وهو يعود لمداعبة حبات السبحة) مش من الانسانية ولا
من الذوق تاكل قدام ناس جعانة

حمدى : (وهو يلوح بعلبة الكبريت) ما أنا قولت الحق الأكل قبل ما
يبرد

الشيخ : (وهو يمد يده لحمدى) هات العلبة دى

حمدى : اتفضل

الشيخ : (وهو يضع علبة الكبريت فى جيبه) مش هتشوف العلبة دى
غير لما كل الى فى الحجز يبقوا نايمين (وهو يتفحصه
بنظرة) أسمك حمدى

حمدى : أيوه يا مولانا .. حمدى فؤاد

الشيخ : (هائما وهو يداعب حبات السبحة) حمدى من الحمد وفؤاد
من القلب .. أسم حلو وله أشارات أحلى .. تعرف ان سيدنا
النبي كان يتفاءل بالاسماء

حمدى : عليه الصلاة والسلام

الشيخ : (وقد زادت نبرته شفافية وهياماً) أطمئن يا ابنى .. فرج الله
قريب

حمدى : (بلهفة) بجد يا مولانا .. قلبك الطيب الطاهر حاسس بكده
(باكيا) ربنا هيفرج كربتى دى قريب

الشيخ : اقرب مما تتخيل

حمدى : قول والنعمة

الشيخ : (وهو يرمقه بنظرة غضب) انت رغاى قوى

حمدى : معلش .. معلش يا مولانا .. أصلى ما صدقت الاقى حد
ارتاح له .. تعرف يا مولانا .. وحق الى جمعنا من غير معاد
أنا من ساعة ما شوفتك وأنا متفاءل

(لا يرد الشيخ ولا يعيره أدنى اهتمام ، فيلح عليه حمدى
قائلاً)

حمدى : عارف يعنى أيه متفاءل ؟ .. متفاءل يا مولانا متفاءل ؟

الشيخ : (وقد زاد غضبا) طيب غور من قدامى دلوقت

حمدى : الى تشوفه يا مولانا .. بس لما تحقق لى طلب

الشيخ : (بنفاذ صبر) اتنيل أطلب

حمدى : (وهو يخرج ورقة وقلم من جيبه) عايز رقم تليفونك
وأسمك وعنوانك .. عشان لما اخرج من هنا الاقدر أوصل
لك

الشيخ : أما انت حمار بجد .. ودى محتاجة تليفون وأسم وعنوان ؟
حمدى : اكيد

الشيخ : لما تخرج من هنا وتحب تشوفنى تانى أبقى تعالا هنا
حمدى : لا يا شيخنا .. ان متفاعل لك زى ما متفاعل لي .. عشان كده
انا واثق من ان انت كمان هتخرج قريب .. ولما احب
اشوفك تانى هروح لك هناك

الشيخ : (بعصبية) يعنى انت عايز منى آيه عشان تسيبنى فى حالى
حمدى : تليفونك وأسمك وعنوانك

الشيخ : 0140243789034388

تأشيرة هجرة إلى
الوطن
(يكتب حمدى الرقم بلهفة)

حمدى : والأسم يا مولانا .. أكتب الشيخ أيه

الشيخ : غراب

حمدى : (مصعوقاً) قولت أيه يا مولانا .. أسمك الشيخ أيه ؟

الشيخ : (وقد زادت عصبيته) غراب .. قولت لك غراب .. أسمى

الشيخ زفت غراب .. (صارخا) غراراراراراراراراراراب

(يفتح باب الحجز .. يدخل رجل بدين جدا وطويل جدا
مدفوعا من ظهره دفعة قوية تجعله يهرول حتى يصطدم
بجدار الحجز ويسقط على الأرض دون حراك، ومن خلفه
يدخل عسكري 2 وهو يشير نحو حمدى)

العسكري : يلا يا حلو دورك جه

2 (ينهض حمدى ممسكا بالورقة والقلم ، ويواجه عسكري

قائلا بحدة)

حمدى : لا أسمع .. أنا قبل ما اتحرك خطوة من هنا وقبل ما قلم تانى

يطرق على قفايا لازم اعرف صاحبي فين .. رضا القهوجى

فين .. انا سييتهولكم عشان تعذبوه مش عشان تقتلوه ..

رضا فين يا عسكري .. وديت الواد فين

العسكري : (وهو يرفع الكرباج حتى اخر ذراعه) خليك في حالك
ويلا

حمدي : مش هيلا .. هاتولى رضا الأول (يهزول نحو باب الحجز
ويتعلق في فتح بوقه هو يصرخ) رضا .. يا رضا

(تهوى يد عسكري (2) الممسكة بالكرباج على ظهر حمدي)

عسكري (2): يلا يا كلب

(من داخل الحجز نسمع صوت رضا يقول متوسلا)

رضا : سييه يا عسكري .. متضربوش .. متضربوش بسبيبي .. أنا
رضا يا حمدي

حمدي : (وهو لازال يرسل صرخاته نحو الخارج) أيوه يا رضا ..
سامعك .. سامعك يا صاحبي انت فين .. وعائش ولا ميت
.. وليه مرجعتش الحجز تاني

(يرفع عسكري (2) الكرباج ويهوى على ظهر حمدي بضربة
اخرى)

رضا : (بنبرة واهنة متقطعة) أنا في الحجز يا حمدي .. ولسه داخل
عليك دلوقتي

(يلتفت حمدي ليلقي نظرة نحو جسد الرجل الطويل البدين
الساقط على الأرض)

حمدي : لا .. ده مش انت يا رضا .. ده واحد تاني أتخن واطول منك
بكتيير

رضا : لا .. أنا .. أنا رضا .. رضا يا حمدي

حمدي : (بعصية) أيه رضا يا حمدي دي .. حاجة كده زى أحمد يا عمر
.. بقول لك اللى دخل دلوقت حد تاني .. اطول واتخن منك

رضا : (باكيا) الحد ده أنا .. والنعمة أنا .. أنا رضا القهوجي يا حمدي

(يترك فتحة الباب ويستدير نحو الحجز ، يتحرك بخطوات
متثاقلة نحو الجسد الساقط على الأرض وهو يقول بنبرة
حزن شديد)

حمدي : ازاي .. ازاي يا رضا .. بقيت كده ازاي

رضا : نفخوني يا حمدي .. نفخوني

حمدي : (وهو يميل على جسد الرجل الساقط على الأرض) الى
بيتنفخ بيتخن .. وانت متختش بس يا رضا .. (وهو يرفع
رأس الرجل من على الأرض) انت تختن وطولت

رضا : مهم نفخونى بالعرض وبالطول .. نفخونى من كل الزوايا
ولاد الكلب

(مع موسيقى مناسبة تسقط رأس رضا على الأرض وهو
يهمس بنبرة من تفارقه الروح)

رضا : ول ادال كلب

(يرفع عسكرى (2) الكرباج ويهوى على ظهر حمدى بضربة
اخرى وهو يقول)

عسكرى (2) : يلا يا كلب

(ينظر حمدى مصعوقاً نحو رأس رضا ويستكين جسده برهة
رغم توالى ضربات كرباج عسكرى (2) فوق ظهره .. بعدها
.. يهتز جسده .. يهتز متشنجاً ونسمع صوت بكاءه ..
وفجأة .. تفلت شفتاه صرخة عميقة مكلومة عاصفة مدوية)
حمدى : رضا ||||| ..

(يرفع عسكرى (2) الكرباج ويهوى على ظهر حمدى بضربة
اخرى وهو يقول)

عسكرى (2) : يلا يا كلب

عسکری (2): یلا یا کلب

(استكانة جسد رضا يزیده صدمة وهلعاً)

حمدي : لا يا رضا .. متموتش .. ماتموتش يا صاحبي .. رضا ..
رضا |||||

(يهوى عسكرى (2) بضربة على ظهر حمدى .. لكن حمدى يلف جسده بسرعة ويمسك بطرف الكرباج وينزعه فى حركة قوية مفاجئة من يد عسكرى (2)، ثم يمسك بمقبض الكرباج ويرفعه فى مواجهته وهو يصرخ)

حمدي : يا ولاد الكلب

(اضلام تدريجى للمسرح بينما نسمع صوت المحقق مع صوت حمدى ويتداخل بينهما أيضا صوت هند من المشهد القادم)

صوت المحقق : بتعتدى على عسكرى ؟!! .. وفين ؟ .. فى مكان
احتجازك؟!

صوت حمدى : رضا برضو اتقتل فى مكان احتجازه .. وقبل ما يتقتل
اتعمل فيه كل حاجة ماينفعش تتعمل مع بشر

صوت هند : بطل ترفيص بقى .. هو انت نايم ولا بتلعب كورة

صوت المحقق : احنا هنحمراء ولا آيه .. هتكلم ليه عن البشر
وحقوق البشر دلوقت .. انت مش أنكرت ادميتكم فى
التحقيق الى فات

صوت حمدى : حتى لو رضا مكنش بنى ادم .. ده ميدكمش الحق
تقهروه وتذلوه وتقتلوه بالشكل البشع ده

صوت هند : رضا تانى .. وقتل كمان .. هو انت حكايتك آيه

صوت المحقق : يا ابنى ومين قال لك أنه اتقتل .. رضا انتحر

صوت حمدى : (صارخا) رضا منتحرش .. رضا اتقتل .. واخر
حاجة عملها قبل ما يموت على دراعى ده .. انه لعن الكلاب
الى قتلوه

صوت هند : الحمد لله ان الصبح صبح .. يلا قوم ..

صوت المحقق : على دراعك ده !!.. يبقى انت الى قتلته (مغيرا نبرة
صوته) سجل عندك

صوت حمدي : انت بتقول أيه

صوت المحقق : وفي مساء يوم الثلاثاء الموافق الثامن من يونيو سنة
الفين ومائة وعشر ، ووفق ما أكد شهود عيان داخل الحجز

صوت هند : حمدي .. حمدي .. (بعصبية) قوم يا راجل

صوت المحقق : قام المتهم حمدي فؤاد مصطفى بالاعتداء المبرح
على المحتجز رضا سيد عبد العال

صوت حمدي : كذاب ..

صوت هند : يا راجل مين الى كذاب .. قوم بقى

صوت المحقق : بسبب رغبته في تقديم معلومات الى جهة التحقيق

صوت حمدي : كدايين

صوت هند : (محتدا) انت أكيد اتجننت

صوت المحقق : ثبت تورطه في تأسيس وإدارة تنظيم سرى يهدف
إلى تكدير الأمن العام وقلب نظام الحكم

صوت حمدي : قتلة ..

صوت هند : قتلة كمان .. لأبقى .. شكلك مش هتصحى بالذوق

صوت المحقق : وتلقى معونات مالية وعينية من جهات أجنبية ...

صوت حمدي : سفلة ..

صوت هند : طيب .. أنا هفرجك على السفالة الى بجد

صوت المحقق : مما دفعه الى التحرش به واصابته باصابات قاتلة
أدت الى وفاته ..

صوت حمدي : يا ولاد الكلب ..

صوت هند : وكمان بتغلط في الأبهاث .. طيب خد

المشهد الثانى شقة والد حمدى

(يضىء المسرح في الثلث الذى تشغله غرفة نوم
حمدى، لنراه نائما على سريره في وضع من يعاني من
رؤية كابوس ، بينما تجلس هند بجواره في عصر قطنة
مبللة بالماء على وجهه، حتى نراه يستيقظ مفزوعا)
حمدى : أشهد ان لا اله الا الله واشهد أن محمد رسول الله ..
أيه .. فيه ايه (وهو ينظر نحو هند مندهشا) انتى
دخلتى الحجز ازاى

هند : حجز ؟! هى فيها كمان حجز

حمدى : (وهو يتلفت حوله) أيوه الحجز .. الى جبتى لى فيه
الزيارة .. (في محاولة لأن يجعلها تتذكر) الى مليتى
بيها علبة كبريت خمسين عود

هند : والله أنا لو معايا خمسين عود كبريت مرة واحدة ..
كنت عملت بيهم حاجة تانية خالص (وهي تتأمل به غيظ)
طيب قوم (وهي تلطم على وجهها) قوم يا أبو بتنجانة

حمدي : (مندھشاً) بتنجانة (متفكرا) بس الحلم مكنش فيه بتنجان

هند : البتنجان كان في الواقع .. قبل ما تتخمد .. وياريتك فلتحت
(تهمس بنبرة مهمومة وهي تهبط من فوق السرير) يعنى يا
رب توقعنى فى واحد فاشل حتى بالبتنجان

حمدي : (وهو يمعن متفكرا) بتنجان .. أنا سمعت الاسم ده قبل كده
.. اه .. عم على .. السأسة .. (رافعا صوته وهو يشير نحو
هند) هو أنا دخلت عليكى امبارح ببتنجانة

هند : أيوه .. وياريتك ما دخلت

حمدي : (برعب) اوعى تقولى خدت منها حتة قد ورقة الدومنة

هند : (وهي تنظر له بغیظ) الأولانية الى كانت قد ورقة الدومنة
(وهي تشير بيدها إشارة الدق بالهاون) بتاعة الهون

حمدي : (وقد تجهم وجهه) عايزة تقولى انى خدت حتة تانية

هند : أيوه .. ومش قد ورقة الدومنة .. دى كانت (وهي تفرد كف
يدها اليمنى) قد ورقة الكوتشية

حمدي : (بحزن) ودى عملت بيها آيه .. غطست جواها

هند : بزعتها .. وبعدين قعدت تهلوس وترفص فوق السرير يجى

ساعة .. لحد ما اتخمدت ومحطتش منطق زى اللى داست فوق منه
دبابة

حمدى : تبقى جرعة البتنجان زادت وحت بأثر عكسى .. هو كده ..
اى شىء بيزيد عن حده بينقلب لضده

هند : أنا كمان اللى شوفته معاك من ساعة ما اتقفل علينا (وهي تشير
نحو باب الغرفة) باب المخروبة دى .. زاد عن الحد
وهيخلينى انقلب بجد

حمدى : (برعب) لا والنبي .. بلاش من سيرة الانقلابات ..
متفكر نيش بلى حصل لرضا .. كفاية اللى شوفته فى الكابوس
(نسمع صوت دقات على باب الشقة ، فيشير نحو باب
الغرفة)

حمدى : وده مين اللى هيجى لنا دلوقت .. روحى افتحى
تهم هند بالخروج بينما نسمع صوت الدقات مرة أخرى ،
تفتح باب الغرفة فى نفس توقيت إضاءه الجزء الأول من
المسرح وظهور منال وهي تعدل من وضع الروب على
جسدها)

منال : (وهي تتجه نحو الباب) حاضر .. حاضر .. لحظة واحدة

هند : (وهي تغلق باب الغرفة) منال راحت تفتح

حمدي : (وهو يهبط من فوق السرير) هحصلها يمكن يطلع
المحصل بتاع شركة الهوا .. (بحمية وحماس) لازم أشده
شدة حلوة .. ايصال الهوا بتاع الشهر الى فات جه مولع
كالعادة .. مع أن البيت كله مناخيره كانت مسدودة .. ودور
الانفلونزا الى لف على العيلة كلها .. خلى محدش فينا كان
قادر ياخذ نفسه.

(يظلم الجزء الثاني من المسرح وتفتح منال باب الجزء
الأول فيدخل حازم ، لنراه يلف رأسه بقطعة شاش ملطخة
بمسائل أحمر)

منال : اهلا حازم .. (بلهفة) مالك .. الف سلامة

حازم : اطمنى .. مفيش حاجة .. ده أثر طلقة خرطوش اتضربت
عليها في مظاهرة امبارح

منال : ونضفتها كويس .. أحسن تكون بذرة سفندى سكنت جوا
الجرح

حازم : (مستخفاً) سفندى أيه يا منال .. خرطوش بذر السفندى ده
كان زمان .. النظام المجرم بقى بيستعمل أسلحة محرمة

دوليا في فض المظاهرات (بغیظ) بقى بيستخدم خرطوش بذر التين
الشوكى .. شوفتى إجرام أكبر من ده

منال : (وهي فاغرة فاها) المجرمين .. الظلمة .. ربنا ينتقم منهم
(وهي تربت على كتفه) أقعد على ما اعمل لك حقنة عناب
ساقع تعوض الدم الى نزل منك

حازم : مفيش داعى .. أنا لسه ماصص ورقة كركديه خام عشان
تأثيرها يبقى سريع

منال : ماشى يا حبيبى .. شوية كده (وهي تشير نحو المطبخ)
واجيب لك حاجة تلحسها .. اقعد .. خد راحتك

(يدخل حمدي من باب الجزء الثاني من المسرح ، فيفاجأ بوجوده)
حمدي : الله .. حازم ! .. (وهو يشير نحو رأس حازم) وأيه ده ..
(بغضب) مين ابن الكلب الى عمل فيك كده

(ينظر حازم نحوه نظرة عتاب مستخف ولا يرد ، فتشور حمية حمدي
أكثر)

حمدي : مين عمل فيك كده .. قول لى عشان أنفخه .. (متراجعا) ولا
بلاش من سيرة النفخ عشان بتفكرنى برضا .. قول لى عشان
أقطعه

حازم : بلاش انت يا حمدى .. خلاص .. مبقتش أصدقك .. لان

هروبك من الميدان امبارح كشفك

حمدى : يا حازم أنا مهربتش .. أنا امبارح انسحبت انسحاب تكتيكى

حازم : (ساخرا) عشان تحمى البتنجانة الى أول ما لقيتها واقعة

خدتها فى حضنك وجريت

حمدى : ما انت شوفت البلطجية كانوا بيستغلوا الانفلات الأمنى الى

سببته المظاهرة بيعملوا ايه فى المحلات

حازم : قوم لما تعوز تنقذ حاجة .. تروح تنقذ بتجانة

حمدى : مش هى الى وقعت فى وشى .. هو كان وقع قدامى علبة

حلاوة طحينية ولا حتى بطيخة وأنا قولت لأ

حازم : (بطريقة محقق) أفهم من كده انك عملت زى أى مواطن

شريف .. وروحت سلمت البتنجانة لاقرب قسم شرطة

حمدى : كنت ناوى أعمل كده .. (بنبرة دفاع عن النفس) صدقنى ..

وكنت هطلع على مديرية الأمن رأسا مش القسم بس .. لكن

لما فكرت فى الموضوع كويس تراجع

حازم : (بنبرة اتهام) يعنى ما سلمتش البتنجانة للشرطة

حمدي : مش طمع فيها يا حازم .. صدقني

حازم : امال يعنى حماية لمستقبلها .. قول لى .. (وهو يشير نحو منار ونحو هند التي دخلت من باب الجزء الثاني) قدام اختك ومراتك .. مسلمتش البنجانة للشرطة ليه

حمدي : لان البنجانة مكنش ليها رقم شاسيه .. يعنى كده كده يا ناصح لو سلمتها للشرطة مكنوش هيقدرُوا يستدلوا على صاحبها ..

حازم : ده مش مبرر يا حمدي (بصدمة) مكنتش اتوقع ان انت تعمل كده

منال : (وهي تتحسس بطنها متألمة) يعنى أيه .. يعنى شورية البنجان الى أكلتها انا امبارح من بتنجانة حرام .. مسروقة

هند : (وهي ترمقه بنظرة ضيق شامت) وأنا أقول ليه وكستك امبارح كانت زى وكسة الباباغونج

حمدي : (وهو يلتهم هند بنظرته) ده كلام يتقال قدام حد (وهو يشير نحو باب الجزء الثاني من المسرح) قومي ادخلي جوا

منال : ااااه يا بطني

حمدي : (وهو يشير نحو منال) وخدي دي كمان معاكى قبل ما ترجع
 فى وشنا .. (بحدة) يلا عشان عايز حازم فى كلام رجالة

(تنهض منال بمساعدة هند وتغيبا خلف باب الجزء الثاني
من المسرح ، بينما يلتفت حمدي نحو حازم ويقول بغضب)
ارتحت .. ارتحت كده بعد ما سيحت لى .. (بحدة) انت
عايز تقضحنى

حازم : (شامتاً) انت لسه شوف فضايح .. (وهو ينهض) لما تنزل
على القهوة هتعرف الفضايح الى بجد

حمدي : (بغضب وعصبية) يعنى كمان سيحت لى ع القهوة
حازم : مش أنا اللي سيحت

حمدي : أmaal مين .. جوز البتنجانة عرف انها بتخونه معايا فحب
يتنقم منا بتجريسنا على القهوة

حازم : لا يا ناصح .. قناة الجزيرة هي الى ظبطتك متلبس مع
البتنجانة .. والفيديو بتاعك وانت واخدها في حضنك
وهربان بيها بقى التيللر بتاع الجزيرة مباشر مصر

حمدي : (مصعوقا) ولاد الكاااااالب .. هما سابوا الدنيا الوالعة دى
كلها وركزوا على التنجاة .. (بحرقة) الله يخرب ست أمك

وبيت أم شورتك السوداء يا عم علي .

حازم : (وهو يتحرك نحو باب الشقة) قدرك بقى

حمدى : (صارخا) يعنى أيه قدرى .. وأشمعنى أنا .. حازم

حازم : نعم

حمدى : تفتكر لو نزلت الشارع هتيجى لهم الجرأة يواجهونى

حازم : أكيد .. ومش بعيد العيال الصغيرة يزفوك ويقولوا حرامى
البتنجانة أهوه

حمدى : (يهرول نحو حازم ويمسك بيده) طيب استنى .. متسبينش
.. أبوس أيدك متسبينش

حازم : مش فاضى يا حمدى .. لان أنا كمان فى ورطة كبيرة

حمدى : الجزيرة صورتك فى حضن بتنجانة انت كمان

حازم : لا .. لكن الشباب الى عالجونى امبارح جاينين لى كمان شوية على
القهوة .. اتفقنا نتجمع وننسق سوا ونتحرك مع بعض خصوصا
بعد ما عرفنا المصيبة الى بيخطط لها بهجت أبو العينين

حمدى : ومالوا بتاع البيض ده كمان

حازم : فاكر عقود العمل الى فرقها على المتظاهرين امبارح .. عشان
يفض المظاهرة ويقضى عليها فى مهدها

حمدى : اه .. واستفزنى أكثر لما عرفت ان معظم عقود العمل كانت
في اسرائيل

حازم : الاستفزاز والمصيبة الأكبر مش في كده .. انما في الشغل الى
هيشغلوه في اسرائيل وفي غيرها

حمدى : واللى زى دول هيشغلوا ايه يعنى في اسرائيل .. ولا في غيرها
.. هما بيعرفوا يعملوا حاجة غير انهم يعيطوا

حازم : مهو ده مربوط الفرس

حمدى : ليه ؟ هما هيشغلوا ايه هناك

حازم : معيطاطية

حمدى : معيطاطية .. يعنى أيه ؟

حازم : يعنى يعيطوا

حمدى : في الجنازات

حازم : لا .. في الغيطان .. والمزارع

حمدى : ياااه .. هى الناس دى بتحب الزرع للدرجة دى .. ويوصل
بيهم الحب لدرجة انهم يشغلوا عندهم ناس مخصوص ..
عشان تعيط على الزرع لما يموت

حازم : لا يا ناصح .. دول بيشغلوا المعيطاطية عندهم .. عشان
يعيطوا على الزرع بدل ما يموت .. يعيطوا على البذر عشان
ينبت والنبت عشان يخضر

حمدي : (مصعوقاً) تقصد ؟!!!

حازم : أيوه .. الناس الى سافرت سافرت عشان تبقى مصادر رى
دائم ومنخفض التكلفة فى الدول الى سافرت لها

حمدي : أنت أكيد بتهرج

حازم : انت الى عييط ومش فاهم حاجة .. العالم كله بيعانى من ندرة
المياه العذبة .. خصوصاً بعد جفاف أهم وأطول اناهار العالم
.. النيل فى مصر والأمازون فى امريكا الجنوبية والمسييسى
فى الشمالية واليانجستى فى الصين والكونغو وأركون ولينا
وفنلاى وغيرهم .. يا ابنى ده خلال سنين قليلة جاية .. نقطة
المية هتبقى أغلى من برمىل البترول

حمدي : أيوه .. أيوه .. (متفكراً) بس زرع أيه ده الى يتروى بالدمع

حازم : وهو الدمع أيه غير ميه

حمدي : بس مالحة .. ساعات لما بيعيط فى بقى .. (موضحاً بعدما
لاحظ استغراب حازم) يعنى لما نقطة دمع تنزل على شفتى

.. بحس ان طعم الدمع مالح

حازم : هيكون أشد ملوحة يعنى من مية البحر

حمدى : لا طبعاً .. بس حتى لو سلمنا بكل كلامك .. من حيث الكم

مش هينفع .. بمعنى .. لو جينا بنى ادم لسه امه ميتة ودفسنا

راسه تحت جدر بطاطساية مش هيشبعها مية

حازم : ده لو الرى هيبقى بطريقة الدفس .. يعنى الغمر يا ناصح

حمدى : تقصد ...

حازم : (مقاطعاً) أسم الله عليك .. اديك ابتديت تفهم .. طرق الرى

الحديثه يا حمدى .. رش وتنقيط وكمان نشع

حمدى : (مستغرباً) نشع .. يعنى الفلاح لما يستيقظ مبكراً و حد يقول

له رايح فين يقول له أنا رايح أنشع الزرع بتاعى

حازم : (بضيق) لو هترجع تستظرف أمشى أنا .. واروح استنى

الناس المحترمة اللى هتجبنى

حمدى : (وهو يمسك بذراعه) لا استنا .. استنا .. دا انت فتحت عنيا

بكلامك ده على حاجات كتiiiiiiiiiiير

حازم : زى أيه؟

حمدى : زى السفر

حمدي : سفرى

حازم : أنت تسافر؟!

حمدي : وليه مسافرش .. هما الى سافروا أعيط منى فى آيه .. دا أنا
أقدر أنقط قد خمستاشر من الى سفرهم بهجت

حازم : وتسب مصر .. يجى لك قلب تسيبها

حمدي : هو انت شايف مصر بتتصل بيا كل شوية عشان تظمن على
صحتى .. ولا قولت لك ان مصر بتيجى تخبط كل يوم على
باب اوضتى ولما اقولها بتخبطى ليه يا مصر؟ .. تقول لى ..
كنت عايزة اعرف اذا كنت محتاج حاجة منى قبل ما أنام ..
(بحدة) حازم .. مصر متعرفش الأشكال الى زىي .. ولا
تفرق معاها الأشكال الى زىي .. عشان كده بعدتنى
وأنكرتنى وسابتنى لحد ما جوعت واتحرمت واتمسخت
وبقيت مجرد برميل دمع .. برميل دمع مبيعرفش يعمل
حاجة .. غير أنه ييكى

حازم : حتى لو كلامك صح .. الهروب مش حل .. وتراب الأرض
دى له حق عليك و ..

حمدي : (مقاطعا) كلامك مش هييجيب نتيجة .. هسافر يا حازم يعنى

(ينفتح باب الجزء الثاني وتخرج هند وهي تتصل من ذراع
منال بصورة توشي بأن منال كانت تحاول منعها من
الدخول)

هند : (بعصبية لحمدي) سفر أيه الى هتسافره عشان تنقط لوحذك
(الذي فوجيء بدخولها وسماعها للحديث ، يرتبك برهة ثم يقول)
حمدي : هبقى وحدي مؤقتاً يا حبيبتى .. سنة ولا اتنين بالكثير .. على
ما ظروفي تستقر هناك وابتعت اجييك تنقطي معايا

(وهو يسحب حمدي من ذراعه ويواجهه بحدة)

حازم : لأ حاسب .. أنا ماليش بنات عم تنقط برة البيت

حمدي : (بنبرة تحدُّ وهو يخلص ذراعه) بنت عمك دى مراتى .. وأنا
الوحيد الى يحدد اذا كانت تنقط ولا متنقطش .. ولما تطلب
معايا انها تنقط .. يبقى هتنقط .. وفي المكان الى أقول لها
تنقط فيه .. ان شالله في الاسكيمو .. (بنفاذ صبر) يا اما عليا
الطلاق ل....

حازم : بس .. متكملش

(يمتقع وجه هند ويرتبك حازم من شدة صدمته في رد فعل
حمدي المبالغ فيه ، يتحرك نحو هند ، يربت على كتفها مهدئاً

ثم يلتفت نحو حمدي)

حازم : واضح ان اعصابك تعبانة .. عشان كده مش هضغط عليك .. وواضح كمان اني تجاوزت حدودي في الكلام عن هند.. وده لانها مش بنت عمي بس .. وانت عارف كده.. هند اختي الصغيرة .. لكن انت كمان جوزها وقبل ما تكون جوزها انت حب عمرها (وهو يشير نحو منال) زي ما منال حب عمري .. احنا الاربعة كنا وهنفضل طول العمر في مركب واحد .. وعشان كده

حمدي : (بنبرة اعتذار) متكلمش يا حازم .. انا اسف .. بس عشان خاطري .. بلاش تكلمني تاني في موضوع السفر

حازم : حاضر .. مش هقول لك متسافرش .. لكن عشان أطمئن عليك .. قول لي .. هتسافر فين ؟

(ينظر برهة نحو حازم متفكرا ، ثم يطوف في أرجاء المسرح وكأنه يفتش عن شيء وهو يقول)

حمدي : فين .. فين .. تنقط فين يا حمدينو .. تنقط فين .. فين ؟

حازم : أسهل عليك الموضوع .. أقول لك اختيارات .. امريكا روسيا ايطاليا فرنسا

حمدى : (وهو يشير بعلامة الرفض) لا .. يا حازم لا .. ولا دولة من
الدول دى تلزمنى

حازم : ليه ؟

حمدى : مش حابب أنقط وأنا سقعان .. فكر معايا فى بلد دافية

حازم : الهند مثلاً

حمدى : هند أيه بس .. هم الهنود بيزرعوا غير جوز الهند والموز
والرز والمانجة والتمر هندی

حازم : يبقى نشوف لك دولة فى الخليج او على الساحل الافريقي
حمدى : عشان يقولولى بطاطس وبامية وقلقاس والحاجات المزحلقة
دى .. لا يا حازم .. لأ .. الراجل منا لما يقرر ينقط .. يبقى
لازم ينقط صح .. وفى المكان الصح

حازم : زى أيه مثلاً

حمدى : زى أفغانستان (وقد لمعت عيناه وهام صوته) أفغانستان ..
هى أفغانستان

حازم : (بنبرة شك) وليه أفغانستان تحديداً

حمدى : عشان أنقط بمزاج .. أنقط وأنا متكيف وأعمل فى شهر

واحد أكثر من الى هيعمله خمسين نطع من الى سفرهم بهجت في سنة
كاملة

حازم : (بنبرة ذاهلة .. كنظرات هند ومنال) تبقى نويت تنتقط على
مخدرات

حمدي : (وقد زاد هياما) أيوه .. ومش هعتق .. خشخاش ماشى
كوكابين ماشى هيروين ماشى بانجو ماشى .. انشالله حتى
أنقط على غيط مزروع برشام أبو صليبة .. هنقط وأدوس
ومعتقش .. وفي نفس الوقت أمسك إيدى واحوش الى
يطلع لى بعد ما ابعت المصاريف لهند .. سنة والتانية يبقى
معايا فلوس .. اشترى بيهم فدانين ثلاثة .. ازرعهم
مخدرات وأنقط عليهم لحسابى .. بعدها

حازم : (مقاطعا) بس .. بس

حمدي : لا لسه .. انا مسلسل صعودى لسه منتهاش

حازم : لكن مسلسل سقوطك انتهى .. انت خلاص ركعت
وسقطت وانتهيت ..

حمدي : انت بتقول أية

حازم : بقول الحقيقة .. أنت انتهيت يا حمدي .. مت .. عارف يعنى

أيه مت .. أنا دلوقت بتكلم مع انسان ميت

حمدي : ميت ؟!! ميت عشان بقى عندى طموح ؟

حازم : (بعصبية) الى عندك ده مش طموح .. دى انتهازية
وانتفاعية وانانية وانسحاق وتقزم وتردى ووهن .. ده الى
فكرت فيه .. ده الى قدرت تقدمه لمصر فى محتتها

حمدي : (بضيق بالغ) تانى هيقول لى مصر

حازم : تانى وتالت وعاشر .. (بيأس) بس حتى لو قولتها لك
مليون مرة .. ده هيغير أياه فى انسان ميت .. (وهو يرمقه بنظرة
ازدراء) انت ايه .. بدل ما ضميرك الوطنى يتحرك وتحط
ايدك فى ايدنا عشان نرجع ولاد بلدنا الغلابة .. المغرر بيهم
.. تقول لى هسافر .. يا اخى عيب .. عيب عليك بجد ..
امبارح تبيع الثورة بيتنجانة والنهاردة عايز تبيع البلد كلها
عشان فرصة عمل ضد كرامتك كبنى ادم

حمدي : (صارخا فى حازم) وأيه فى البلد دى مش ضد كرامتى كبنى
ادم .. اللقمة الى باكلها ولا المية الى بشرها ولا المواصلة
الى بركبها .. ولا ولا ولا .. وبعدين احنا هنروح بعيد ليه ..
يا سيدى شوف لى شغلانة أوضع من دى هنا وأنا استنا ..

شوف لى حتى مودة كريمة فى البلد القاسية دى وأنا أموت راضى
واقول احمدك يا رب .. يا حازم دى مش بلدنا .. صدقنى ..
البلد الى ميقاش لينا فيها كرامة لا واحنا عايشين ولا حتى
واحنا ميتين .. تبقى مش بلدنا

حازم : البلد دى بلدنا .. وهفضل بلدنا .. بس انت الى بقيت
أعمى وجاحد

حمدى : خلاص .. خليك فى بلدكم .. وسيبوني أنا ادور على بلدى
الحقيقية .. الى الاقى فيها حقوقى وكرمتى وانسانيتى

حازم : براحتك .. بس لو لفيت الدنيا كلها .. وملقتش الى انت
بتدور عليه .. لو اكتشفت بعد فوات الاوان ان جذورك
وهويتك وقيمتك الحقيقية فى البلد دى .. وفكرت ترجع لها
تانى .. متنساش وقتها تبقى تفكر حاجة تانية أهم

حمدى : ودى تطلع أيه

حازم : (وهو يتحرك خارجا) ان مبقاش ليك فيها صديق أو أخ
أسمه حازم

حمدى : (وهو يهرول خلفه) حازم

هند : (وهي تهرول نحو غرفتها) ولا زوجة اسمها هند

حمدي : (وهو ينظر نحو هند مصدوما) : هند

منال : (وهي تغادر المسرح) ولا أخت أسمها منال .. عارف ليه
(وهي تهرول باكية) لان النهاردة أخويا الوحيد مات

(يرتعد جسد حمدي كمن اخترق صدره ثلاثة رصاصات ، يدور
حول نفسه دورة كاملة ، نسمع خلالها صوت إغلاق الأبواب
الثلاثة ، ثم يقول هامساً وهو يقترب من مقاعد المتفرجين)

حمدي : ليه ؟ بتحكموني ليه .. بتعذبوني ليه (صارخاً وهو يشير نحو
الأبواب المغلقة) انت ميت .. انت ميت .. انت ميت .. ماشي
.. أنا ميت .. طيب لو حتى افترضت اني مت .(فترة صمت
يفكر خلالها) دا الميت بيصعب على العايشين .. الميت بيبيكى
عليه العايشين .. الميت .. العايشين بيفتكروا له حاجة حلوة
..(بعد فترة صمت أخرى) ليه مصعبتش عليكم ؟!!!.. ليه
محدث فيكم بكى عليا ؟!!!.. ليه محدش فيكم افتكركى حاجة
حلوة ؟!!!..(صارخاً) ليه يا عايشين يا فاهمين يا
ولادال .. ليه ؟ ..(يصمت برهة متفكراً ثم يقول) أنا عارف
ليه ؟ .. لان انتو كمان ميتين .. كلكم ميتين .. أيوه .. مش أنا بس
الى ميت .. انتوا كمان ميتين

(ثم وهو يستدير ليوأجه الجمهور) انتو كمان ميتين

(يسقط على الأرض بينما يظلم المسرح تدريجياً)

المشهد الثانى القهو خانة

(جو المقهى العادي ، نفس الزبائن ونفس حركة رضا بينهم،
في ركن قصي نرى حازم على رأس مائدة تجمع عدداً
من الشباب ، يبدو منهمكا وقد بدا واضحاً أنه
امتلك سيمات الزعيم وهو يقول للمجموعة)

حازم : يا جماعة ده رابع اجتماع لينا بس .. يعنى احنا مش
متاخرين ولا حاجة .. كمان لازم مجموعتنا نتعرف
اكثر ببعض وتشكل فيما بينها تحالف واحد ينظم
حركة الكل .

ثائر (1) : وبالنسبة للتعامل مع الأمن .. انت شايف ان من
الصح نحافظ على نفس التكنيك

حازم : طبعا لا .. لان التكنيك الى انت بتتكلم عنه بتاع
2011 و 2013 و 2016 و 2024

واحنا دلوقت في 2110 .. زى ما التكنيك الامنى اتطور في
فض المظاهرات احنا كمان تكتيكنا في التحرك والمواجهة

لازم يتطور .. فى القرن الى فات كانوا بيستخدموا قنابل الغاز
المسيل للدموع ودلوقت استبدلوها بالغاز الحابس للدموع
.. زمان كانت خراطيم المية العذبة من ضمن وسائل الفض ..
وكان المتظاهر فى القرن الى فات لما بيعطش بيروح يفتح بقه
قصاد اقرب خرطوم ليه ويشرب ويرجع تانى لصفوف
المظاهرة .. دلوقت بقوا بيستعملوا خراطيم ميه مجارى عشان
هما عارفين ان الى هيتوسخ مش هيعرف يستحما وهيقدر وبعده
المظاهرة يقبضوا عليه من تتبع ريحته .. حتى ال...

ثائر (2) : (مقاطعا) بمناسبة موضوع الشرب .. أحنّا متكلّمناش عن
طريقة لعلاج السقطة الفظيعة بتاعة المظاهرة الى فاتت

ثائر (3) : (بضيق) بقى نص المتظاهرين يسيبوا المظاهرة ..
وينضموا للامن .. بمجرد ما يشوفوا ضابط من ضباط فض
المظاهرة بيلوح لهم بقزاة ميه مشبرة ..

(ينهض ثائر (1) متحمسا ليرفع صوتها هاتفاً)

ثائر (1) : مهما تشاوروا بميه ساقعة .. نار الثورة هتفضل والعة
مجموعة الثوار : مهما تشاوروا بميه ساقعة .. نار الثورة هتفضل
والعة

حازم : (بعد عودة المجموعة للجلوس) في منشور الدعوة

للمظاهرة الجاية هيكون من ضمن التعليمات .. ان كل
متظاهر يحط قطنته المبلولة بالميه أو بنوع العصير الى
بيفضله .. في كيس بلاستيك وياخذه معاه قبل ما ينزل
المظاهرة .. عشان لما يعطش يطلع القطنة ويمص

(ينهض مرة أخرى ليهتف بالحماس نفسه)

ثائر (1): دم شهيدنا في التحرير .. مش هنييعه بكانز عصير

مجموعة الثوار : دم شهيدنا في التحرير .. مش هنييعه بكانز عصير

(بعد جلوس مجموعة المتظاهرين ، يهم حازم بمعاودة
الحديث ، لكن نظرة منه نحو الكالوس الأيسر تعقد لسانه ..
عندما يرى حمدي وهو يجرح حقيقة السفر ومن خلفه والده)

فؤاد : أنا طول عمري مش طايقك .. وحاسس ان خلفتي ليك كانت

أكبر جريمة عملتها في حق نفسي .. لكن من ساعة ما
واجهتني بموضوع سفرك واحاسيسى كلها اتغيرت ناحيتك

حمدي : أنا كمان احاسيسى اتغيرت ناحيتك يا بابا .. وابدت احس
انك أبويا

فؤاد : طيب لو أبوك غالى عليك بلاش تفترى على نفسك .. وراعى

صحتك كويس وزى ما قولت لك .. لازم يوم فى الاسبوع متنقطش
فيه

حمدي : يا بابا مينفعش .. دا أنا لو اطول أنقط على شيفتين كنت نقطت .. أنا
عايز أسبق الزمن واحقق كل الاحلام الى فاتنى تحقيقها
(يتظاهر حازم بعدم الانتباه برغم اقتراب حمدي مع والده من
مائدته ، يترك حمدي الحقيقية ويهم بالتحرك نحو حازم ، لكن
نظرة باردة متجاهلة من حازم تجعله يتراجع ويعود ليمسك
بسحاب حقيبتة مع دخول هند قائلة)

هند : (لحمدي) قبل ما تنقط نقطة واحدة بعيد عن هنا طلقنى ..
وبالتلاتة

حمدي : يا هند افهمينى بقى .. أنا هسافر واتحمل تنقيطى فى الغربة
عشانك انتى وعشان اعمل مستقبل افضل لينا ولولادنا .. انا لسه
متمسك بيكى وهفضل متمسك بيكى لآخر نقطة دمع فى عنيا
هند : ما تحاولش تأثر عليا بكلامك الحلو .. أنا قرارى نهائى

(يدخل عزمي من نفس الكالوس ممسكا بعصاة)

عزمي : (لحمدي) يمين الطلاق هترميهِ على بنتى قبل ما تتحرك
خطوة واحدة من هنا .. (وهو يرفع العصاة فوق رأس
حمدي) يا أما هخبطك خبطة تصفى دموعك على

الأرض (وهو يشير نحوه إشارة تهديد) عشان يبقو بشغلوك تلطم على
شجر المخدرات فى افغانستان يا انتفاعى يا قدر
(يلتفت نحوه هند ويصرخ فيها)

حمدى : قوليله .. دى حاجة تقوليها له وانتى عارفه انه مستنى يشوف
فيا يوم

هند : مهو كان لازم يقتنع باسباب طلبى للطلاق

(يتحرك عزمى نحو رواد المقهى ويستعديهم على حمدى)

عزمى : اتفرجوا يا ناس .. اتفرجوا .. المعفن اللى بعد بوس الرجلين
وافقت اجوزه بنتى .. قبل ما تكمل شهر معاه .. عايز يسيبها
ويروح تورا بورا عشان ينقط فى مزارع المخدرات

حمدى : (بعصبية لهند) حتى موضوع تورا بورا قولتى له عليه ..
شكلى هيبقى ايه مع قبائل باكستان .. ليه كده يا هند

عزمى : (مخاطبا جمهور المقهى) ده يرضى ربنا يا ناس .. ده .(يتجمد
لسانه عند مشاهدته لحازم فيقول له بحدقة) هنا؟! .. وقاعد
مربع وولا على بالك حاجة .. وانت شايف عمك واقع مع
الشواضلى بتاع المخدرات (وهو يشير نحوه حمدى) ده

حمدي : تورا بورا وبتاع مخدرات وزفت من قبل حتى ما نلف
سيجارة .. روح يا شيخ .. دا انت راجل فقري

حازم : (لحمدي وهو ينهض محتداً) انا الى كان مسكتنى انى
حالف لسانى مايخاطبش لسانك .. لكن تغلط فى عمى لا ..
احترم نفسك يا حمدي

(قبل أن يرد حازم .. يتأمل ثائر (1) حمدي وهو يقول
لحازم)

ثائر (1) : مش ده المتظاهر الى صورته الجزيرة فى يوم جمعة الأرنبط
حازم : أيوه هوه

ثائر (1) : يعنى ده الى سرق البتنجانه

حازم : (بنبرة استعداد) أيوه .. هوه بشحمه ولحمه

(يرفع ثائر (1) عقيرته وهو يشير نحو حمدي)

ثائر (1) : سفرك برة عار وخيانة .. يا حرامى البتنجانه

مجموعة الثوار : سفرك برة عار وخيانة .. يا حرامى البتنجانه

(يتراجع حمدي مخبتاً خلف والده الذي تأمله مزدرياً وهو
يقول)

فؤاد : كذبت أنا لما قولت ان خلفتى ليك كانت أكبر جريمة عملتها
فى حق نفسى

(ينقلب حال المقهى رأساً على عقب ويقف عدد من الزبائن
بين حمدي ومجموعة المتظاهرين وفي مقدمتهم علي ورضا)

علي : حاسب يا ابني انت وهو .. مينفعش تغلطوا فى ابن حتنا قدامنا
حمدي : (هامساً لعلّي) الخيارة اللى اتفقت معاك ابعتها لك كل شهر
بقت خيارتين يا عمى علي

علي : (هامساً) بلاش خيارتين .. خليفهم خياراية وحتة بتنجان قد
ورقة الدومنة (وهو يلتفت نحو حمدي) لزوم السأسة ..

حمدي : انت تؤمر يا عم علي .. يا راجل يا مجدع .. يا أصيل

علي : (وهو يلتفت نحو حمدي مرة أخرى) ومتنساش الواد حوكشة
ابني .. أول ما ظروفك فى التنقيط تنظبط هناك .. تبعت له
دعوة عشان يجي لك هناك وترستته فى تنقيطة على مزاجك

حمدي : (بنفاذ صبر) أنا خدامك يا عم علي .. اطمن .. ابعتهولى انت
بس وانا هجيب له (بغيط) أحلى نقطة هناك

علي : (وهو يلتفت نحو حمدي مرة ثالثة) حوكشة دا واد جن مصور
وهيعجبك .. وعنيه بتسح سححان غريب .. متلاقهوش

عندى حد .. تقولش عنيه جالها إسهال

(ييصق حمدي على ظهر علي بمجرد التفاته عنه .. بينما نرى
رضا وهو يصوبنحو مجموعة الثوار سن حقنة تحتوي على
سائل أصفر غامق)

رضا : الى هيقرب منه هديه حقنة الجنزبيل دى فى عينه .. أبعد يلا ..

حمدي : (هامسا لرضا) حزمة الجرجير هتبقى حزمتين يا رضا

رضا : (هامسا لحمدي) خليههم واحدة جرجير وواحدة كرفس ..

بس ورور يا برنس .. ورور زى الى بيطلعهم الشيف
شرفنطح فى الراديو

حازم : (لحمدي وهو يحول بين رضا وبين مجموعة الثوار) ارتحت
كده .. ولعتها

حمدي : مهى طول عمرها والعة يا حازم .. أمتى كانت مش والعة

(رافعا صوته وهو يحاول اختراق المجموعة التي
تحميحمدي)

ثائر (1) : متكلمش عن الولعان .. يا حرامى البتنجان

مجموعة الثوار : متكلمش عن الولعان .. يا حرامى البتنجان

حمدي : (صارخا في جموع الثوار) ولعوها زياده .. ولعوها كمان
وكمان يا ثوار .. اسحلوني في الشوارع .. اصلبوني ..
ارجموني لحد اخر نفس .. (وهو يرفع يديه مستسلما
ويتحرك ليخترق المجموعة التي تحميه حتى يصبح في
مواجهة الثوار) .. يلا .. اسحلوني واصلبوني .. بس أمانة
عليكم .. متنسوش تعلقوا على رقبتى وأنا مصلوب على اطول
عامود في الميدان .. يافطة مكتوب عليها .. ده اللى خان
(يقولها بنبرة بالغة التأثير والتأثير). عشان كل اللى يعدى على
جشتى المتعلقة .. يلعنكم فى سره ويقرا على روحى الفاتحة وهو
بيتظاهر قدامكم انه بيرمينى بججر .. لانه من جواه هيبقيعارف
أنى سرقت عشان أكل .. مش عشان أبقي رجل أعمال ولا
مدير ولا وزير ولا فرعون جديد

(يخف الضجيج ويظهر التراجع على مجموعة الثوار والتأثر
البالغ على مجموعة المقهى وحازم وهند وعزمي وفؤاد)

حمدي : اكتبوا على الياطرة كمان .. ده الى دمر مصر .. ده نشف نيلها
وقلل خيرها وسرق بتنجانتها .. الى لو مكانتش اتسرفت ..
كان شبع الجعان وارتوى العطشان وشفى العيان واتعلم
الجاهل واتجوزت العانس واتكفل اليتيم واتسترت الأرملة

.. والعاطل فيكم كان لقي شغل .. (صارخا فيهم) يلا .. خدوا
حقكم وحق مصر منى .. مستنين أيه

هند : (صارخة وهي تسحب العصاة من يد عزمي وتهزول نحو
حمدي) لا .. محدش هيقدر يلمسك

(نسمع صوت منال صارخاً وهينهزول لتقف بجوار هند بين
حمدي ومجموعة المتظاهرين)

منال : أخويا

حازم : (وهو يستدير ليوواجه مجموعة الثوار، ليصبح بين هند
ومنال) اهدوا يا جماعة .. أهدوا .. عدونا الحقيقي مش
حمدي واللى زيه ..

(ينظر حمدي نحو ظهور الثلاثة — هند وحازم ومنال —
ويقول بنبرة متأثرة)

حمدي : الحمد لله .. الشدة رجعت لى أعلى الناس .. (وهو يبكي)
كده أقدر أسافر وأنقط وأنا ضميرى مرتاح

(نسمع أصوات بكاء متواصل لمجموعة من الجنسين ،
فيلتفت حازم مع المجموعة نحو الكالوس الأيمن ، فنرى
متظاهرين 3 و8 ومتظاهرات 7 و10 يجرون حقائب السفر

وهم سيكون بكاء هستيرياً)

حمدي : (لحازم) دول من ضمن المجموعة الى سفرها بهجت

حازم : (وهو يتأملهم) اه .. خدت بالي

حمدي : (بعدما فكر برهة) معقولة لحقوا يخضروا البلاد الى سافروا

لها بالسرعة دي .. (يشير نحو حقائبهم وعلى وجهه

تعبيرات السعادة والطمع) تلاقى شنطهم متعتة دولارات ..

(وهو ينظر نحو حازم بضيق) وأنا الى كنت هضعف واسمع

كلامك ومسافرش يا فقري يا ابن الفقرية

(تقترب متظاهرة (7) من حازم فيستغل الفرصة ويشير

نحوها)

حازم : ممكن حضرتك

متظاهرة (7): (بعدما مسحت دموعها بظهر كف يدها) عايز آيه انت

كمان

حازم : هو حضرتك مش كنتي من ضمن المجموعة الى سفرها

بهجت أبو العينين

متظاهرة (7): أيوه .. (بعصية) وبعدين انت مالك

حازم : (مرتبكاً) ابدا .. أنا بس ...

حمدي : (وهو يزيح حازم من أمام الفتاة) سيبنى أنا أتعامل .. أنا وهى
منقطين زى بعض وهنفهم بعض بسرعة

متظاهرة (7) : (لحمدي بنفس العصبية) عايز ايه انت كمان .. اوعى
من سكتى .. عايزة اعدى

حمدي : (وهو يوسع لها المجال) حاضر يا فندم تحت أمرك .. انا
بس كنت عايز اطمئن لان حضرتك اتوفقتى فى مهمتك
التنقيطية المباركة خارج البلاد

متظاهرة (7) : (تنفجر في وجهه) نقطة تاخذك وتاخذ أهلك يا بارد يا
ابن

حمدي : (يفاجأ بردها العنيف فيرفع يده ويهم بصفعها) أنا بارد يا
منقطة يا بنت ال

(يد حمدي في عودتها إلى الورا تصطدم بوجة متظاهر (3))

متظاهر (3): أه يا وشى

حمدي : (بعدها نظر إلى حقيته وعرف أنه من مجموعة العائدين)
أسف جدا يا زميلي .. معلىش يا صاحبي .. مكتتش شايفك

متظاهر (3): ولا يهملك (وهو يتأمل حمدي) أنا حاسس انى شوفتك
قبل كده

حمدي : (تنفرج أساريره ويشعر بأنه وجد ضالته) وأنا كمان ..
حاسس أنى شوفتك كتيير قبل كده .. الا قول لى الأول ..
مش حضرتك من الجماعة اللى سافرت عشان تنقط فى ..

متظاهر (3): (لا ينتبه لكلمات حمدي ويستمر في التدقيق في ملامحه
وهو يقول) أيوه انت .. انت اللى صح .. مش حضرتك
الى

حمدي : (بنفاد صبر وتساهل) أيوه يا سيدى أيوه .. كلامك مضبوط ..
أنا اللى ... المهم دلوقت .. قول لى عملتوا أيه فى

متظاهر (3): (وهو ينظر له بازدراء) أعذرنى .. مش هقدر اتناقش
مع حضرتك

حمدي : ليه يا زميلى .. دا احنا طلعلنا معارف .. انت نسيت ان انا اللى
.... ولا ايه (وهو يمسك بذراعه) .. المهم .. قول لى

متظاهر (3): (وهو يسحب ذراعه بعنف) قولتلك مش هقدر
اتناقش معاك

حمدي : ليه

متظاهر (3) : لاني متعودتش اتناقش مع حرامية بتنجان

(يسقط في يد حمدي وهو يميل على الأرض ليمسك بشيء
يقذف به متظاهر 3)

حازم : بتنجان .. بتنجان يا ابن المقلية .. غور يا ض

(من شدة الاجهاد ، تسقط حقيبة متظاهرة 10 على مقربة من
حمدي وحازم، فيهرولان ناحيتها ويحملانها عنها)

حمدي : خلي عنك يا ست الكل

حازم : قولى لنا رايحة فين واحنا نوصلك

متظاهرة (10) : مفيش داعى .. البيت قريب من هنا

حمدي : (لحازم وهو يزحزح الحقيبة عن الأرض) هى الدولارات
بقت ثقيلة كده ليه اليومين دول

متظاهرة (10) : (وهي تشير نحو حمدي بحنق) أهو القر والحسد
بتاع الأشكال الوسخة الى زيك هو الى جاب لنا الفقر

حمدي : (يكظم غيظه رغما عنه ويحاول أن يحصل على المعلومة)
ليه يا ست الكل بس .. هو انتى روحتى بتزغرتى ورجعتى
بتعيطى .. هدى نفسك .. هدى نفسك يا برنسيصة وقوليلى

على حاجة واحدة .. عايز اسمع منك حاجة واحدة بس

متظاهرة (10) : وأنا هقولها لك

حمدي : (وهو يميل عليها بأذنه) وأنا كل اذان صاغية

متظاهرة (10) : (وهي تشد من يده سحب الحقيبة) اتفوه عليك

(يمتقع وجه حمدي من شدة المفاجأة ويرفع يده بمواجهة
متظاهرة (10) لكن قبل أن تهوي يده بالصفعة يسمع صوت
متظاهر (8) الصارخ)

متظاهر (8) : ااااه .. ااااه يامه .. حد يغيتنى يا ناس ..

(تلتف من حوله المجموعة ويقترب حازم منه وهو يقول)

حازم : فيه ايه .. قول لنا محتاج أيه واحنا نساعدك

متظاهر (8) : محتاج وش تانى أدخل بيه على عيالى .. محتاج وش
غير وشى

(يقترب حمدي منه ويربت على كتفه مشفقاً)

حمدي : يا سيدى ادخل عليهم بوشك ده .. وهو يعنى انت قبل ما

تسافر كنت شبة أحمد عز .. بعدين صدقنى .. هما مش

هيهتموا بوشك الوحش ده .. قد ما هيهتموا بالهدايا الى

انت جبتهم

متظاهر (8): هداية أیه .. الشنطة مفیهاش غیر الهدمتین الی سافرت
بیهم وشویة تقاوی من البلد الی سافرتها

حمدی : اشتریلهم من هنا کام هدیه قبل ما تدخل علیهم

متظاهر (8): منین .. هو انا حیلتي حاجة

حمدی : امال الفلوس الی نطقت بیها ودیتها فین .. (بغیظ وتأنیب)
أکید فرتکتها علی النسوان هناك .. یا معفن .. یا أبو وش عکر

متظاهر (8): لا نسوان ولا هباب ولا زفت .. لا أنا ولا حد من الی
سافروا ینقطوا .. خد جنیه أحمر واحد .. مش بس كده (وهو
یلطم) دول کمان رجعونا مترحلین فی مرکب زی الغنم

حمدی : (مصعوقاً) لیه .. البلاد الی روحتها طلع مفیهاش زرع

متظاهر (8): فیها زرع مالوش أول من اخر .. لكن .. لكن احنا
(وهو یبکی) احنا الی لما وصلنا هناك لقینا عنینا مفیهاش
دموع .. زی ما یكون كان لعیننا محابس (وهو یلطم علی
وجهه) واتقفلت

(ترتفع همهمات الاستغراب من المجموعة، ینصت حازم

للرجل بشدة .. بينما يفترب حمدي أكثر من الرجل وهو
يتأمل به بنظرة استغراب)

حمدي : ازاي يا عم .. ما انت كل مواسيرك سالكة وعمال تسح اهو
متظاهر (8): مهو لما رجعنا مصر .. ورجلينا وقفت على أرضها ..
زي ما يكون لعيننا محابس وافتحت و ...

(ترفع الهمهمات للدرجة التي غطت على صوت الرجل ،
فيصرخ حمدي في الرجل)

حمدي : انت بتقول ايه .. واضح انك عيان .. عارف .. لو كنت
عرضت نفسك على سباك كويس هناك .. كان ظبطك

متظاهر (8) : كل واحد فينا لففوه كعب داير على سباكين البلد الى
سافر لها وبرضو ملقيوش حل

حمدي : يبقى اكيد معندكمش مهارات فردية في التنقيط .. يا بني ادم
النقيط الى يحترف برة بلده لازم يكون عنده مهارات فردية
تنقيطية عالية .. (وهو يتلوى بجسده) يعني يعرف ينقط
بجسمه كله

متظاهر (8) : والنعمة حاولت ومعرفتش

حمدي : (وهو يميل برأسه ناحية كتفه) طيب جربت تنقط بالكتف
متظاهر (8) : جربت ومعرفتش

حمدي : (بضيق ونفاذ صبر) طيب جربت تنقط تنقيط فرنساوى
متظاهر (8) : (وهو يلطم على وجهه) جربته .. ومش فرنساوى
بس .. حتى التنقيط فى وضع الضفدعة جربته ومفلحتش
حمدي : (مشككا) لا .. متحاولش تقنعنى .. أنا ...

حازم : (يقاطع حمدي) الكلام ده لو كان هو لوحده .. لكن زى ما
سمعت .. كل اللى سافروا .. (بسعادة وظفر) يعنى

(يصرخ فى حازم ويقاطعه بدوره وهو يقول)

حمدي : ماليش دعوة بكل اللى سافروا .. أنا ليا دعوة بنفسى بس ..
مش عشان مجموعة خايبة زى دى .. حلم شباب مصر فى
التنقيط ينتهى ..

حازم : (بنفس نبرة السعادة والظفر) متقولش الكلام الفاضى ده ..
بلاش تتعلق بالوهم ..

حمدي : انت اللى موهوم وعائش دور الزعيم ع الفاضى .. انت اللى
نظرك قاصر ومش فاهم حاجة ومصمم تعمل فلوطة

و خلاص .. هسافر يا حازم .. وهنقط في البلد الى هسافر لها
ومفيش قوة هقدر تمنعنى من التنقيط .. (وهو يشير نحو
حازم متحديا) واتحداك

حازم : (بنبرة هادئة واثقة مطمئنة) مش هتقدر .. لان الدمع الى في
عينيك مش ملكك

همدى : (ساخرا) لما هو مش ملكى .. يبقى ملك مين يا عم المفتى ؟
حازم : ملك الأرض دى .. الأرض دى بس

همدى : ليه .. (بنبرة نكران وجود) هى الأرض دى ادتنا أيه ؟!!
عشان حتى شوية الدمع الى جمعتهم سنين عذابنا وشقانا فيها
بيقوا من حقها

حازم : ادتكوا أغلى ما فيها .. وأحلى ما فيها .. حتى وانتو كارهينها
وقاسين عليها وجاحدين حقها

همدى : تانى .. هترجع تعمل فيها مصطفى كامل تانى .. طيب قول
لنا فين .. (وهو يكشف جيوبه) قول لنا اديتنا أيه .. وبأملرة
أيه

حازم : (وهو يشير نحو عيني همدى) بامارة الى في عينيك دى (وهو
يشير نحو عيون المجموعة) بأمارة الى في عنيكم دى ..

(حالة من الارتباك واللغط تسود المجموعة)

حمدي : لا .. انت شكلك لسعت

عزمي : ايه اللي في عنينا يا ابني .. وضع تقصد أيه

حازم : (لعزمي) النيل يا عمي .. (يخاطب المجموعة) النيل في

عنيكم .. (صارخاً) النيل في عنيكم .. (وهو يتحرك بين

المجموعة) اللي في عنيكم ده مش مجرد دمع .. مش مجرد

ملكية وجع خاصة .. لا .. اللي في عنيكم دى .. النيل نفسه

.. النماء نفسه .. الخير نفسه .. الحياة نفسها ..

(ترتفع الهمهمات ، تحديق فيه العيون)

فؤاد : يا ابني وضع أكثر .. انت كده لخبطنا زيادة

حازم : (لفؤاد) النيل اللي اتحرمتوا منه .. واتحرم عليكم تشوفوه ..

الا وانتوا محشورين زى أعواد الكبريت جوا المواصلات

الى بتعبر كباريه .. رحمة بيكم .. ربنا طواه .. رفعه زى ما رفع

سيدنا عيسى .. نقاه وطهره زى ما طهر قلب سيدنا النبي عند

حليمة وعند البعثة وفي الاسراء والمعراج .. بعدين بدره

تاني .. زى ما بدر المن والسلوى على أهل سيدنا موسى ..

بدره تاني .. بس في عنيكم .. عشان انتوا اللي تملكوه

وتحموه وتصونوه وتتحكموا فيه وتتهنوا بخيره .

حمدى : (متهكما) يا سلام .. دا احنا رجعنا لزمان الف ليلة وليلة يا
جدعان ..

متظاهر (8) : طيب لما هو كده .. لما كل واحد فينا خد نصيبه من
مية النيل بما يرضى الله .. عنينا نشفت ليه لما كنا برة

حازم : لان اللى فى عنيككم .. مكنش ولا هيكون .. ملك لأرض غير
دى .. ولا طير غير طيرها ولا ناس غير ناسها

حمدى : ليه ؟

حازم : لأن ربنا لما خلق الكون .. مخلاش مصر تبقى حجر أساس

فيها من فراغ .. أقل بنا أو مقاول .. لما بيحجى يبنى بيت و

يختار حجر الاساس .. بيختار أقوى أحجاره وأبقاها

وأصلبها .. عشان كده بلدنا باقية .. وهتفضل باقية .. طول

ما فيه حياة على الأرض .. ونيلها هيفضل ليها .. هيفضل

فيها .. طول ما فيه فى الأرض بذور بتتبت وشجر بيخضر

وطير بيرفرف .. (وهو يشير الى أعينهم مرة اخرى) من

الآخر .. النيل فى عنيككم .. فاختاروا .. بين انكم تضيعوه فى

بكاء ونهنة وتفضلوا جعانيين ومحرومين .. أو .. تعملوا هنا

.. (وهو يشير نحو حمدي إشارة تائب) زى ما كتتو هتعملوا فى البلاد
الغريبة ..

حمدي : (مذهولاً) يعنى ...

(يقترّب متظاهر (8) من حازم وهو يقول مقاطعا حمدي)

متظاهر (8) : طيب ليه يا استاذ عينا أنا من دون الناس .. بتنزل دمع
معكر وريحته غريبة شوية

(وهو يزيج متظاهر (8) بيده ويقترّب من حازم أكثر)

حمدي : لان الرشة بتاعتك انت كانت من بحر البقر .. (يصرخ فيه)
غور .. غور دلوقت .. وسيبى أستوعب الى بيقوله (وهو
يشير نحو حازم) المجنون ده

حازم : أنا مش مجنون .. (مخاطبا المجموعة) انا قولت الحقيقة ..
ومستعد اثبت لكل واحد فيكم صدق كلامى

حمدي وأصوات متعددة : ازاي

حازم : تشتغلوا .. تزرعوا .. انتوا مش كده كده بتعيطوا طول النهار
المجموعة : اه

حازم : جربوا كل واحد يعيط ساعة او ساعتين فى اليوم على شوية

زرع يزرعهم

(نسمع أصوات ضحك .. يصبح بعضها بعد برهة همهمات ثم ترتفع
أصوات)

صوت (1): ده بيستعبط

صوت (2): وفيها ايه لما نجرب

صوت (3): قال النيل فى عنىكم قال

صوت (4): يعنى احنا خسرانين ايه

صوت (5): طيب مية النيل وعرفناها .. راح فى السمك

صوت (6): أقول لك ومتزعلى

صوت (7): يا سلام لو كان كلامه صح

صوت (2): مهو عشان نعرف اذا كان صح ولا غلط لازم نجرب

صوت (4): أيوه نجرب

باقى الأصوات : نجرب .. نجرب .. نجرب

حمدى : (وهو يمكن متفكرا) وأيه المانع .. هو التنقيط المحلى عيب

علي : (مخاطبا حازم) بس يا ابني احنا كده محيلتناش غير المية ..
يعنى يلزمننا تقاوى .. هنجيب تقاوى منين

حمدي : (لعلي .. بحماس) يا راجلانت مش فالح الا في السأسأة ..
هو بلدنا فيها غير البذر والقشر

حازم : حتى لو مفيهاش بذرة واحدة .. ربنا هييعت لنا البذر مع
الريح .. بس احنا نبتدى ونقول يا رب

حمدي : يا رب (يلتفت نحو متظاهر (8) ينأمله متفكرا) أبو دموع
عكرة زى وشه ده .. تنقيطه هيجيب أعلى انتاج .. مية وسباخ
عضوى فى نفس الوقت .. (يشير نحوه) انت يا راجل يا أبو
شكل وحش انت

متظاهر (8) : بتنده لى أنا

حمدي : أيوه .. تعالا

متظاهر (8) : (وهو يهرول نحو حمدي) نعم

حمدي : تشتغل معايا

متظاهر (8) : هتشغلنى أيه

حمدي : هشغلك مطرب مثلا .. (بغضب) هتسيل تنقط

متظاهر (8): ولما أنا انقط انت هتعمل أيه

حمدي : انا كمان هنقط

متظاهر (8): يعني احنا الاتنين هنقط على بعض

حمدي : (مصعوقا) ننقط على بعض .. (وهو يدفعه دفعة قوية) غور ..

غور .. أنا دلوقت عرفت انت مفلحتش ليه في البلد اللي

روحتها .. اكيد اتعقدوا من سحتك الوحشة الغبية دي

وخافوا ان الزرع بتاعهم يصطبج بيه

متظاهر (8) : (وهو يتراجع نحو حقيقته) والنعمة ابدأ .. دول

استقبلوني هناك استقبال مهند لما راح لبنان .. والأفغانية

بنت صاحب المزرعة وقعت في دباديبي وكانت عايز

تتجوز...

حمدي : (مشدوها) بتقول الأفغانية ؟!!

متظاهر (8): اه وربنا .. حتى

حمدي : (وهو يهرول ناحيته) بس .. متكملش .. (وهو يتلفت حوله

كاللص) ورد عليا بصوت واطي (وهو يشير نحو حقيقته

متظاهر (8)) والتقاوى اللي في شنطتك دي من هناك

متظاهر (8) : اه ...

حمدي : (يرفع حقيبة متظاهر (8) على كتفه ويسحبه من يده ويهرول
نحو الكالوس) طيب اسكت .. مصدقك .. يلا بينا

حازم : (وهو يشير نحو حمدي) واخذ الاخ ورايح فين يا حمدي
حمدي : على سينا .. أنا والاخ (وهو يشير نحو متظاهر (8)) مهند ..
هنعمر لك سينا كلها

(يخرج حمدي مع متظاهر (8) من الكالوس ، بينما تهرول هند من
خلفه)

هند : خدني معاك يا حمدي .. ده أنا من زمان نفسى أنقط في شرم
(ينظر حازم نحو حمدي بسعادة .. ينظر نحو المجموعة ويرى حماسها
وسعادتها فتدمع عيناه أكثر ، يقترب منه علي ويقول له بنبرة
عرفان وشكر)

علي : أنا دلوقت بس عرفت ليه ربنا استثناك من شوطة العياط الى
ملت البلد

حازم : تقصد أيه يا عم علي

علي : اقصد ان ربنا حرم على عينيك غشاوة الدمع ووجعه عشان

تبقى عيننا الى نشوف بيها الحقيقة

حازم : (بنبرة بالغة التأثير) متقولش كده يا عم على .. دا أنا أقل واحد
فيكم

(تقترب منه منال ، تتأمله بنظرات زهو وافتخار وهي تقول)

منال : متقولش كده على نفسك .. انت أعظم راجل في الدنيا ..
صدقنى .. (وهي تقترب منه وتمسك بيده) صدقنى يا حازم
.. أنا فخورة بيك .. وفخورة أكثر بانك حبيبي

(تدمع عينا حازم أكثر وهو يسحب يده من بين يدي منال)

حازم : بس يا منال .. بس .. ارجوكى كفاية

منال : لا مش كفاية .. أنا فعلا فخورة بيك و..

عزيمى : (رافعا صوته) لا مش كفاية .. لان منال ليها حق تفتخر بيك
وأنا كمان

(تسقط دمعاً من عين حازم وهو يصرخ في عزيمى)

حازم : يا عمى بس .. ارجوك كفاية

عزيمى : (بحماس) لا مش كفاية .. (مؤكدًا) أيوه انا كمان فخور بيك
.. فخور بانى عمك .. فخور بانك ابن اخويا

(ترتفع أصوات المجموعة تباعاً بعبارات المدح والتبجيل
لحازم ويرتفع أيضاً صراخه مطالباً إياهم بالتوقف ، حتى
يتشنج باكياً ، ويسقط على الأرض وهو يبكي بشدة .. فيظلم
المسرح بينما نسمع صوته)

حازم : قولت لكم كفاية .. حرام عليكم .. كفاية .. كفاية
المجموعة : ليه

حازم : لأنكم خلितوني أعيط .. خلितوني أعيط يا ولاد ال.....

نهاية